

# ВИЛЬЯМ ШЕКСПИР

---

ТАНЛАНГАН АСАРЛАР

Беш жилдлик

*Учинчи жилд*

Тошкент

Faafur Fулом номидаги Адабиёт ва санъат нашриёти  
1983



# АНТОНИЙ ВА КЛЕОПАТРА

КОМИЛ ЯШИН  
таржимаси

## ИШТИРОК ЭТУВЧИЛАР

Марк Антоний	}	триумвирлар.
Октавий Цезарь		
Марк Эмилий Лепид		
Секст Помпей.		
Домиций Энobarб		
Вентидий		
Эрос		
Стар		
Деркет	}	Антоний тарафдорлари.
Деметрий		
Филон		
Меценат		
Агриппа		
Долабелла		
Прокулей		
Тирей		
Галл	}	Цезарь тарафдорлари.
Менас		
Манекрат		
Варрий		
Тавр, Цезарь саркардаси.		
Канидий, Антоний саркардаси.		
Силлий, Вентидий қўшинидаги аскарбоши.		
Евроний, Антонийнинг Цезарга юборган элчиси.		
Алексас	}	Клеопатранинг яқинлари.
Мардиан		
Селевк		
Диомед		
Қуръачи.		
Мискин киши.		
Клеопатра, Миср маликаси.		
Октавия, Цезарнинг синглиси ва Антонийнинг рафиқаси.		
Хармиана	}	Клеопатранинг чўрилари.
Ирада		
Аскарбошилар, аскарлар, чопарлар, сарой аҳли, хизматкорлар.		
Воқеа Рим империясининг турли томонларида бўлиб утади.		

## БИРИНЧИ ПАРДА

### I-САҲНА

Искандария. Клеопатра саройидаги зал.  
Деметрий билан Филон кириб келишади.

#### Филон

Саркардамиз жудо бўлмиш ақлидан буткул!  
Авваллари қўшин тортиб юрганларида  
Зирҳли Марсдай паршираган оташ кўзлари  
Келиб-келиб шу лўлининг бадчехрасига  
Маъюс ва зор термилишдан қолди бўшамай  
Ёвлар билан олишганда ҳар зарби ила  
Не-не пўлат қалқонларни чок этган юрак  
Эндиликда ошуфтаҳол паст синриндига  
Бамисоли бир еллигич қилмоқда хизмат.  
Ана, улар келишяпти.

Бурғулар чалинади. Антоний ва Клеопатра аъёнилари билан кириб келишади. Ҳарам қуллари қўлларида елпуғич билан Клеопатрани елпишади.

Қара, яхшилаб,  
Бу оламни тутиб турган учта устуннинг  
Бириси деб ҳисобланмиш ушбу калонио  
Нафсибад бир фоҳишага бериб жиловин.  
Эртаю кеч силаб-сийпаб, папалар уни.

**Клеопатра**

Муҳаббатми? Улуғлиги нечоғлик экан?

**Антоний**

Муҳаббат ҳеч ўлчов билмас, чексиз, бепоён.

**Клеопатра**

Излаб етсам дейман унинг поёнига мен.

**Антоний**

Бу дунёнинг ташқисидан излайсан уни.

Антонийнинг хизматкорларидан бири киради.

**Хизматкор**

Ҳукмдорим, этинг рухсат, Римдан бор хабар!

**Антоний**

Суҳбатни ҳам совутдинг-ку, калта қил, тез бўл!

**Клеопатра**

Чопарларнинг сўзларини эшишт, Антоний.  
 Ажаб эмас, Фульвияни бўлсанг ранжитган?  
 Ёғизидан она сути кетмаган Цезарь  
 Буюргандир ваҳшат ила: «Жимтурма, ошғич  
 Анов шоҳни қувиб солиб, бунисини қўй,  
 Амрим бажар, йўқса ўзиңг олассаң жазо»,

**А н т о н и й**

Нималар деб жавраяпсан, шириң маҳлиқо?

**К л е о п а т р а**

Невлай, балки сенинг буңда қолиб кетишинг  
Хуш келмаган Цезарь ила ёстиқдошингга.  
Ё бўлмаса Цезарь сени четлатган ишдан.  
Билиб олгин — нималарни буюрган экан  
Римда қолган хотининг... Йўқ, кечиргил, Цезарь...  
Ҳа, иккови. Чопарларнинг эшитгил гапин.  
Қип-қизариб кетдинг, ҳозир тож ҳаққи, айтсам!  
Бу Цезардан ҳайиқишинг аломати, ё  
Фульвиядан тегадиган дашном қўрқуви?  
Чопарларни чақиринглар тезда бу ерга!

**А н т о н и й**

Римни Тибр тўлқинлари айласин вайрон!  
Кул-кул бўлсин менга деса тожи салтанат!  
Бас, паноҳим шу ер энди. Шоҳликлар битар!  
Ер бир ўғит; боқар бирдай жонворлар билан  
Одамни ҳам. Аммо юксак фазилат, бу бурч  
Зоҳир бўлар фақат ишқда, оҳу кўзлигим.

*(Клеопатрани қучади.)*

Исботлайман эндиликда бутун дунёга,  
Шу ҷоққача ўтган бирор ошуфта дилнинг  
Ўз ёрини биз сингари севмаганлигин.

**К л е о п а т р а**

Лофни қаранг! Ишққа шундай сайқал берган зот  
Үйландию Фульвияга бедард,bekўнгил.

Эсин еган тантиқ хотин эмасман ҳали,  
Антонийнинг кимлигини хўпам биламан.  
Антоний...

### А н т о н и й

...Ҳа, Клеопатра мафтун этган зот.  
Ёлвораман: севгимизни ардоқласанг гар,  
Унинг totли онларини надомат тўла  
Машмашага сарфламоқнинг йўқдир ҳожати.  
Ҳар сония бағишиласин роҳат ва лаззат,  
Қандай эркак бу оқшомнинг бўлар соҳиби?

### К л е о п а т р а

Чопарлардан эшитайлик.

### А н т о н и й

Чўрткесар, ўжар!  
Нима қилса ярашади гул чеҳрасига —  
Ғазаб қилса, хандон урса ёки йиғласа.  
Мен бўлсам-чи, шавқу завқдан жон-дилим ўйнаб  
Лол қоламан латофату назокатига.  
Чопарларинг даркор эмас менга бу лаҳза!  
Сенга эса ўзим ёрмаи, сенга жон фидо.  
Икковимиз бирга-бирга мана шу оқшом  
Сайр этамиз кўчаларни, боқамиз юртга.  
Юр, маликам. Ахир кўнглинг нақ куни кеча  
Турганди-ку шуни истаб...

(Хизматкорга.)

Йўқол! Тилинг тий!

А н т о н и й в а К л е о п а т р а а ъ ё н л а р и б и л а н ч и қ и б  
кетишади.

### Деметрий

Цезарии ҳам менсимасдан қўйди Антоний.

### Филон

Тонг қоламан гоҳи пайтлар уни танимай  
Ва дейманки: наҳотки бу ўзимиз билган,  
Бизнинг оташқалб соҳиби буюк Антоний?

### Деметрий

Минг афсуски, тасдиқлайди ўз тили билан  
Римга етган нодўстона мишмишларни ҳам.  
Қайдам яна, бугун-эрта, ноумид шайтон,  
Эсин йигиб олар дейман. Хуш қол, элатдош!

Кетадилар.

## 2-САҲНА

Клеопатра саройидаги бўлма.

Хармиана, Ирада, Алексас ва қуръачи кириб  
келадилар.

### Хармиана

Ҳазрат инсон Алексас, ширинзабон Алексас, меҳри  
дарё Алексас, марди майдон Алексас! Маликага оғиз  
кўпиртириб мақтаган қуръачинг қайдা? Қимга тегаркин-  
ман, деб юрагим така-пука бўляпти. Ўзинг ўша одам  
жонингга ора киради, девдинг-ку?

Алексас

Хой, қуръачи!

Қуръачи

Тайёрдирман хизматларига.

Хармиана

Ҳа, у шуми?— Кўп каромат кўрсатармиссан?

Қуръачи

Табиатнинг асрор тўла буюк китобин  
Ўқиб қолгум у-буларни гоҳо чўқилаб.

Алексас

(Хармианага)

Қафтингни тут, кўра қолсин, майлига, бир қур.

Энобарб билан хизматкорлар киришади.

Энобарб

(хизматкорларга)

Қани, чаққон таом тортинг! Майи нобни ҳам.  
Клеопатра сиҳатига ичамиз оппоқ.

Хармиана

Ёргуғ, ойдин фол оч менга, авлиё одам.

Қуръачи

Чор-ночор эплаганим фақат каромат.

Хармиана

Қўрсат кароматингни...

Қуръачи

Бўлур ҳусну малоҳатинг бундан ҳам зиёд.

Хармиана

Тўлишаманми?

Ирада

Иўқ, эс-хушинг, қариб боргач, бўлар пардозда...

Хармиана

Ажин юзга тирноқларин ботирмаса бас.

Алексас

Пиримуршид авлиёнинг сақланг иззатин.

Хармиана

Хап бўл. Хап!

Қуръачи

Севасану севилишдан бўлурсан йироқ.

## Хармиана

Ишқдан кечиб шароб ичиб, бўлай жигар хун.

## Алексас

Гапларини бўлмай, мундоқ эшигтгани қўй!

## Хармиана

Қани, менга бирорта ажиб мўъжиза, каромат кўрсат. Аломат кунлардан бирида биратўла учта шоҳга тегиб, ўша заҳоти тул қола қолай. Эллик беш ёшимда кўрган болам нақ Ёхудиялик Ироднинг ўтакасини ёрсин. Октавий Цезарнинг хотини бўлиб, маликам мақомига етиб қолишимни ҳам ваъда эт.

## Куръачи

Маликангдан узоқ умр кўришинг аниқ.

## Хармиана

Мана бу гап ажиб! Узун умр кўришни майдан ҳам афзалроқ кўраман.

## Куръачи

Ўтмишда бўлғансан ҳамроҳ толега,  
Энди у тобора сендан йироқлар.

## Хармиана

Унда бояги олий наслу насаб, аслзодалар ҳақидаги орзумга ета олмайдиганга ўхшайман-ку. Қани, айт-чи, пешонамга нечта ўғилу нечта қиз ёзилган?

### К уръачи

Мустажоб бўлганда дуо — истагинг.  
Шу ҷоқҷача миллион бола кўрардинг.

### Хармиана

Бор-е, бетамиз! Одам тахлит эмас, афсунгар бўлганинг учун ҳам сени кечираман.

### Алексас

Истакларимдан ёлғиз тўшак воқиф деб  
ўйловдингми?

### Хармиана

Шошма! Энди бир фол очгин Ирадага ҳам.

### Алексас

Тақдиримиз не бўлишин билсақ ҳаммамиз.

### Энобарб

Ҳар ҳолда бугун бошимизга не савдолар тушишини биламан. Итдай ичамиз.

### Ирада

Қафтимдаги манави чизиқларга қараб фақат битта нарсани айтиб берса бўлади: Менинг тақдирим иффатли кечади.

## Хармиана

Нилнинг тўлиб оқаётганини кўриб... қурғоқчилик бўлишини билгандай.

## Ирада

Жим турсанг-чи, очофат, этаксиз сатанг, фолбинликни сенга ким қўйибди?

## Хармиана

Кафтнинг намлиги зурриётдан дарак бермаса, қўлимдан ҳеч бало келмас экан. (*Қуръачига.*) Менга қара, унга шунчалик арзимас нарсаларни каромат қиласавер.

## Куръачи

Иккингизнинг тақдирингиз бирдай бўлажак.

## Ирада

Қандай тақдир? Қандай экан? Айт-чи дурустроқ.

## Куръачи

Айтдим барин.

## Ирада

Наҳотки, ундан қилча ҳам баҳтлироқ бўлмасам?

## Хармиана

Хўш, қилча баҳтлироқ бўлсанг, ўша қилни қаерда ўсишини истардинг?

### Ирада

Фақат эримнинг бурнидан бўлак жойда.

### Хармиана

Хунук нарсалардан эгамнинг ўзи асрасин. Хўш, энди Алексаснинг гали! Қисмат қандай бўлишини айт. Муруватли Изида! Унга маймоқ хотин ато қилгин! Мана бу хотинидан айрилиб, ундан ҳам беш баттарига йўлиқсин. Бу ишдан охирабад боши чиқмасин, ахири энг расво бир хотин ўйнаб-кулиб туриб, гўрга тиқсин, унгача шармандаи шармисор бўлсин. Бу илтижоларимга қулоқ солгин, меҳрибоним Изида! Шуни қилу бўлак илтижоларимни, майли рад эт. Утинаман, меҳрибоним Изида!

### Ирада

Омин! Нолаи додимиизга қулоқ сол, сарвари коинот маъбудамиз. Дуппа-дуруст эркак расвойи радди маърака хотинга уйланганини кўрсанг алам қиласди. Бироқ нотанти аҳмоқнинг шарманда бўлганини кўрмасанг ундан ҳам ёмон бўларкан. Шу боисдан ақалли бошқа одамлар тўгри йўлдан тоймасинлар, деб қилмишга яраша жазосини бер, меҳрибонимиз Изида!

### Хармиана

Омин.

### Алексас

Оҳ-ҳо, қаранг-а! Борди-ю, қўлларидан келса борми, улар шармандамни чиқаришда ҳеч нимадан қайтиш масди.

Э н о б а р б

Жим! Антоний келар, ана.

Х а р м и а н а

Йўқ, бу — малика...

К л е о п а т р а    Ариб келади.

К л е о п а т р а

Кўрдингизми Антонийни?

Э н о б а р б

Йўқ, давлатпеноҳ.

К л е о п а т р а

Келмадими бу ерга?

Х а р м и а н а

Йўқ, малика.

К л е о п а т р а

Бугун у кайф-сафо кўйинда экан,  
Бирдан Римни эслаб қолди.— Энобарб!

Э н о б а р б

Лаббай, давлатпеноҳ?

### Клеопатра

Уни қидир, топ,  
Сўнг келтир бу ерга. Қайда, Алексас?

### Алексас

Мен шундаман. Антоний ҳам кепқолди, ана.

Антоний, чопар ва шотирлар кириб келишади.

### Клеопатра

Йўлиқмайман. Қани юринг, кетайлик бундан.

Клеопатра, Энобарб, Алексас, Ирада, Хармиапа, қуръачи ва хизматкорлар чиқиб кетишади.

### Чопар

Қўшин тортиб борди хотининг шунда...

### Антоний

Акамга қарши-я?

### Чопар

Ҳа, худди шундоқ.  
Бироқ тортиб қўймоқ учун Цезарь танобин,  
Тил топишиди иккаласи ўтмасдан фурсат.  
Цезарь бўлса илк жангдаёқ қилди тору мор,  
Сўнг иккови қочиб қолди Италияга.

## А н т о н и й

Хўш, ёмонроқ хабар йўқми?

## Ч о п а р

Келса шум хабар,  
Кетгусидир кўп ҳоллрда әлчининг боши!

## А н т о н и й

Овсар ёки қўрқоқларга етказса хабар.  
Борин гапир, яширма ҳеч, бўлар иш бўпти.  
Замирида яширинган бўлса ҳам ажал  
Улуғроқдир мақтовлардан менга ҳақиқат.

## Ч о п а р

Аччиқ, заҳар хабар ҳам бор, қулоқ сол, сардор:  
Парфиянинг қўшинларин бошлаб Лабиен  
Фрайдан ҳам ўтиб, кирди Осиёга нақ  
Сурия-ю Лидиянинг хонликларида  
Қисқа қўлсам, Иония узра ҳам бугун  
Голибона ҳилпирайди найзатуғлари...  
Бунда эса...

## А н т о н и й

Нега энди ғўлдираб қолдинг?  
Демоқчисан: нашъу намо сурар Антоний.

## Ч о п а р

О, ҳукмдор!

### А и т о н и й

Яширмагин мишмишларни ҳам.  
 Римда не деб атасалар Клеопатрани,  
 Шуидай ата. Аямагин мени ҳеч бир,  
 Фульвияга ўхшаб койи, айла дағдаға,  
 Не гуноҳим бўлса барин тўкиб солавер,  
 Нафрат, ғазаб ҳақиқатдан тайсалланма ҳеч.  
 Гар ён берсанг, ҳа, заардан бўлак иш чиқмас,  
 Гина-кудурат дил куйдирар жингиртоб қилиб.  
 Боравергил!

### Ч о п а р

Фармонингни бажаргум доим!

(Кетади.)

### А и т о н и й

Сакондан келмиш бизга қандай хабарлар?

### Б и р и н ч и х из м а т к о р

Сакондан келган ким бор? Қайда чопари?

### И к к и н ч и х из м а т к о р

Шу ердадир, мунтазирдир фармонингизга!

### А и т о н и й

Айтгил, кирсин ҳаялламай эсим борида,  
 Маҳкам Миср занжирини узмасам бўлмас.

(Иккинчи чопар киради.)

Хўш, келтирдинг нечук хабар? Сўйлагил дадил!

**Иккинчи чопар**

Естиқдошинг дунёдан кўз юмди, Фульвия.

**Антоний**

Наҳот ўлди, Фульвия, а? Қаерда ўлди?

**Иккинчи чопар**

Сакионда.

(Хатни беради.)

Унинг дарди-касали ила  
Кўп нарсалар борасида билурсан хатдан.

**Антоний**

Боравер.

**Иккинчи чопар** кетади.

Тарк этмиш у қалб ёруғ дунёни.  
Кўнгилгинам турган эди бу ишни тилаб.  
Буни қаранг, яқинларда нафрат-ла қувган  
Нарсаларни кўнгил қўмсаб қолади гоҳо.  
Пайти келиб ёнингдаги жоно, дил хушинг  
Еқмай қолар ва тегадир меъданга жуда.  
О, қанийди Фульвияни тобутга солган  
Қўллар яна ўша жойдан тортиб чиқарса.

Раҳматлик, бу дилу жоним тўрида яна...  
 Бу дилбарни тарқ этмасам бўлмайди энди.  
 Акс ҳолда майшату ишқу ҳаваслар  
 Лак-лак бало келтиргуси менинг бошимга.  
 Ҳой, Энобарб!

Э н о б а р б    киради.

Э н о б а р б

Бордир яна қандай фармонинг?

А н т о н и й

Жўнамасам бўлмас имкон борича шитоб.

Э н о б а р б

Унда бу ерлик аёлларни ҳалокатга ташлаймиз-ку.  
 Улар бу шафқатсиз мазаллатга дош беролмайдилар-ку.  
 Мабодо кетсанк борми, бари худа-беҳуда оҳу надомат  
 чекишиб адойи тамом бўлишади.

А н т о н и й

Бормасам бўлмас.

Э н о б а р б

Бордию бу жуда зарур бўлса, бемалол адойи тамом  
 бўлишаверсин. Аёлларни арзимас нарсага қийнаш увол  
 бўлади, бироқ муҳим иш турганда, уларнинг бари сариқ  
 чақага арзимайди. Клеопатра буни эшитса борми, у ҳам-  
 мадан олдин жон беради. У йигирма марта менинг кўз

олдимда ўлган, ҳаммасидаям тағин арзимаган нарсага.  
У бу гапни эшитса жон-жон деб ўлаверади, нимага де-  
санг ўлимни ҳам ёр қучоғига ўхшатади чоғи.

### Антоний

Ҳеч ким билмас унинг нечук айёрлигини.

### Энобарб

Йўғ-э! Унинг барча ноз-итоблари, ичкуярлиги соғ  
севгисининг самимий ифодасидир! Нафаси бамисоли на-  
сим, кўз ёшларини абри найсон томчилари десанг ҳам  
кам. Бунаقا довулу жалаларни шу чоққача кўрмаган-  
ман. Булар унинг айёрлигини кўрсатмайди. Айёрликка  
келганда Клеопатра шунақанги ногаҳоний бўронлар кў-  
тарадики, унинг олдида Юпитер шарманда!

### Антоний

Қаердан ҳам кўзим тушди унинг ҳуснига!

### Энобарб

Наҳотки сен пушаймон бўлсанг? Уни учратмага-  
нингда борми, оламдаги ажиб мўъжизаларнинг биридан  
бенасиб қолардинг. Бу толе сенга ёр бўлмаганида, са-  
фарим хайф кетди, деяверсанг бўларди.

### Антоний

Фульвия ўлди.

### Энобарб

Нима?

**Антоний**

Фульвия ўлди.

**Энобарб**

Фульвия-я?

**Антоний**

Улди.

**Энобарб**

Начора, худоларга энди бир нима атамасанг бўлмайди. Худо эри бор хотиннинг жонини олмоққа хоҳиш билдирган экан, ўша хотиннинг эри оламда эски журлар ўрнига гард қўнмаган янги либос тикувчилар борлиги билан юпанмоғи лозим ва лобид. Мабодо оламда бошқа аёллар қуриб кетган бўлса, ана унда Фульвиянинг ўлими сенга оғир савдо бўлиб, ийллаб мотам тутсанг арзирди. Бироқ бошингга тушган қайғуни бартараф қиласа бўлади. Эскиси эскиганда янги этак топилади. Эскиси учун йиғламоқчи бўлсанг, кўзингни пиёз билан артақол!

**Антоний**

Неки тугун қилган бўлса Фульвия — барин  
Бир-бир ечиб ташлай олсам, маъқул бўлур хўп.

**Энобарб**

Унда бу ердаги сен боғлаган тугун нима бўлади?  
Бў ердан олисда сен тугунларни ечиш билан банд бўлсанг, Клеопатра бу ерда баттар тугилмайдими?

## А н т о н и й

Бас қил энди ҳазилингни. Саркардаларга  
 Менинг ушбу сўзларимни етказгил ошғич,  
 Малика-ла хайрлашиб тушунтиргайман  
 Бунча шитоб қайтишимнинг сабабларини.  
 Фульвиянинг ўлими-чи, уйга чорловчи  
 Талайгина даъволарнинг фақат биттаси.  
 Кўп нарсадан воқиф бўлган аҳбоблар тезда  
 Римга қайт, деб номаларни турдилар битиб,  
 Цезарь билан қасдлашиб бош кўтарган Помпей  
 Уммонларнинг жиловини олмишdir қўлга.  
 Киши қадрин ўлгандан сўнг билгувчи авом,  
 Об-ҳавога қараб тез-тез турар ўзгариб.  
 Шу боисдан оталарнинг буюклиги ҳам  
 Кўп ҳолларда тиркалади ўғилга фақат.  
 Довюраклик, мардлик, қудрат бу ёқда қолиб  
 Ўз номию қўшинини пеш қилган Помпей  
 Авом халқнинг мишлиши-ла ҳозир қаҳрамон.  
 Назаримда, салтанатга қилмоқда таҳдид.  
 Хуфиёна гимирлаган кимсалар ҳам бор,—  
 Қил эмас-ку от думидан юлинган жонсиз,  
 Ва лек ҳали заҳри қотил илон ҳам эмас.  
 Бас, хабар бер қўшиндаги барча аскарга,  
 Жўнамоққа кемаларга чиқсин.

Э н о б а р б

Лйтаман.

Кетадилар.

**3-САҲНА**

**Уша жой. Бошқа бўлма.**

Клеопатра, Хармиана, Ирада ва Алексас кириб келишади.

**Клеопатра**

Қани ўзи?

**Хармиана**

Кўрганим йўқ ўшандан бери.

**Клеопатра**

(Алексасга)

Бориб бил-чи, қаерда у, бандми, ким билан?  
 Аммо менинг юборганим билмасин зинҳор.  
 Маъюс бўлма, мени айтки — ўйин тушяпти,  
 Қувноқ эрса, мени носоғ, дея бер хабар.  
 Тезроқ бору яна жадал қайтгил изингга.

Алексас кетади.

**Хармиана**

Маликам, сен ҳақиқатда севсанг, у ҳолда,  
 Антонийнинг муҳаббатин қозонмоқ учун  
 Танлаётган ушбу йўлинг нотўғри, ғалат.

## Клеопатра

Хўш, сенингча нималарни қилмоғим даркор?

## Хармиана

Ихтиёрин бер ўзига, тўсма ҳеч йўлини.

## Клеопатра

Тентаксан-да, Хармиана. Қилган бу ишим  
Ундан жудо бўлмоқ йўли.

## Хармиана

Тегма ғашига,  
Дилимизга қўрқув солиб турганларга биз  
Изҳори ишқ даъвосини қилолмаймиз ҳеч.

Антоний киради.

Ана, келди Антоний ҳам.

## Клеопатра

Мадорим йўқ ҳеч.

## Антоний

(четга)

Қандай айтдим ўшал маъшум хабарни энди?

**Клеопатра***(Хармианага)*

Юр, кетайлик бундан, тағин йиқилиб қолмай,  
Үйлайманки, бу азоб ҳам бормайди кўпга,  
Яратганинг ўзи бергай унга хотима.

**Антоний**

**О маликам, гулбаданим, жоним, маҳбубам!**

**Клеопатра**

**Утинаман, яқинлашма!**

**Антоний**

**Не бўлди сенга?**

**Клеопатра**

Хушхабарни кўзларингдан билиб турибман.  
Шаръий хотин не гапларни ёзмиш хатида?  
Уйингга бор. Ҳурмати зўр ўшал занфанг  
Бу ёқларга сени йўллаб адашган жуда.  
Боргандан сўнг унга обдон тушунтириб қўй,  
Узоқ туриб қолганингга дахлим йўқлигин.  
Наҳот бунга етса қурбим? Сен уникисан.

**Антоний**

**Худоларнинг ўзларига лён бу.**

## Клеопатра

Уят!

Олам — олам бўлибдики, бирор малика  
 Мен сингари расво ҳолга тушмаган асло!  
 Бевафолик қилишингни сезарди кўнглим.

## Антоний

Клеопатра!

## Клеопатра

Худоларни солиб ўртага  
 Ўшандা сен садоқатдан иссанг-да қасам  
 Фульвияни ташлаб келган сен беоқибатнинг  
 Сўзларига чин кўнгилдан ишонай қандай?  
 Қасамхўрнинг сўзларига ишонмоқ эса,  
 Калтабинлик, тентакликнинг ғирт ўзгинаси.

## Антоний

Маликам!

## Клеопатра

Пўқ, ширин сўзлар излаб ўтирма,  
 Хайр, дея юртинг кўзлаб чиқавер йўлга.  
 Бир вақтлар қолайин деб ялинганингда,  
 Одамларни лол қилгувчи сўзамол эдинг.  
 Лаблариму кўзларимга тўймасдинг боқиб,  
 Кошларимнинг меҳробига қиласдинг сажда.

Бошдан-оёқ мени мисли фаришта дердинг,  
 Мен ҳозир ҳам бошқа эмас, ўшал-ўшаман.  
 Аммо сен-чи, сендай донғи кетган сарлашкар  
 Каззоб деган зўр унвонни олиб турилти.

### Антоний

О, маликам!

### Клеопатра

Бўлсам эди чорпахил аскар  
 Тан берардинг мисрликлар жасоратига.

### Антоний

Қулоқ сол, эй гулузорим. Юртимга мени  
 Чорлаяпти энди масъул, зарур юмушлар.  
 Кетсам ҳамки қолар мудом юрагим бунда,  
 Қўп қиличлар қиндан чиққан Италияда,  
 Улус ҳоли тангмиш, юртлар вайрон, хомталаш.  
 Секст Помпей эса мутлақ ошиб ҳаддидан  
 Қўймоқчимиш Римни буткул дengиздан тўсиб.  
 Қўш ҳокимлик бўлдими юрт, қолмайди тартиб.  
 Бир замонлар Римдан буткул қувилган Помпей  
 Отасининг шавкати-ла тиклаб қаддини,  
 Аламзада кимсаларга бўлмиш раҳнамо.  
 Қўлмаклик бор юртда, гўё тўнтириш ила  
 Бор иллатдан халос бўлар юрт, деб ўйлашар.  
 Сафаримнинг яна битта сабаби ҳам бор;

Гар эшитсанг жўнашимга ризо бўлурсан:  
Бандаликни бажо қилган шўрлик Фульвия.

### Клеопатра

Ёшимга мос келмайди-ю ҳавойилигим,  
Мен барибир чўпчакларга учиб юрмайман.  
Қачон ўлиби?

### Антоний

Бу хабар ростдир, маликам!  
Манавини ўқиб кўриб бўлурсан огоҳ.  
Не ғалвалар кўтарганин олурсан билиб.  
Бошқалари ўз йўлига пировардида  
Қачон, недан ўлганин ҳам яхши фаҳмлайсан.

### Клеопатра

Мана шундай сенинг ишқинг, билсанг, Антоний!  
Киши дилгир пайтларида қўлга олгувчи  
Май солинган ул муқаддас кўзалар қайда?  
Фульвиянинг ўлимидан кўриб турибман,  
Бир кун ўлсам ўэни қандай тутишингни мен.

### Антоний

Ғалвани қўй, тушунсанг-чи, нозик фаҳмсан.  
Не маслаҳат қилсанг шуни тутаман маҳкам.  
Ул руҳафзо офтоб ҳаққи, қасам ичай, мен —  
Содиқ қулинг, аскарингдай чиқурман йўлга.

Уруш десанг урушаман, ё ярашаман,  
Сен не десанг бажо этар мафтункор қулинг.

### Клеопатра

Еқам ипчин бўшатгил сал. Кетдим бўғилиб.  
Йўқ, керакмас. Тобим қочиб, кўз тиниши ҳам  
Бирдан келиб, бирдан кетар, қарори йўқ ҳеч,  
Антонийнинг ишқи мисол.

### Антоний

Қўзингни очгили,  
Сенга бўлган муҳаббатим, инонгил албат,  
Барча синов, бардошлардан ўтгай bemalol.

### Клеопатра

Ҳа, Фульвия тирик бўлса дерди тасанно.  
Юзинг бур-да, унинг ҳаққи, кўз ёш қилиб ол.  
Хайрлашиб сўнг мен билан, бўзлагин аччиқ,  
О, маҳбубам, айрилиққа чидолмайман, де.  
Имилламай бошла тезроқ, юракларни эз!  
Елғонларинг ўхшаб кетсин озгина ростга.

### Антоний

Тилингни тий. Тўлиб борар сабр косаси!

### Клеопатра

Чакки эмас бу сўзларинг. Зўрроқ олавер.

## Антоний

Қилич ҳаққи, қасам ичай!

## Клеопатра

Қалқонни ҳам айт!

Дуруст сўзлар айтаяпсан. Аммо бундан ҳам  
Зўр сўзларни келтирмоққа кучинг етгулик.  
Хармиана, кўрайлик-чи қани, иккимиз,  
Нималарга қодир экан римлик Геркулес.

## Антоний

Хуш қол энди, Клеопатра.

## Клеопатра

О, шаҳсуворим,  
Икки оғиз сўз айтмоққа бергин ижозат.  
Сен кетасан, мен қоламан... йўқ, йўқ, ундеймас!  
Иккимиз ҳам севишардик... йўқ, йўқ, ундеймас!  
Ўзинг яхши биласанки... Не демоқчийдим?..  
Эҳ, эсим ҳам Антонийдай хиёнат қилди.  
Унут бўлдим, ҳаммасини унудим мен ҳам.

## Антоний

Бу оламда топилгуси бор саркашлигу  
Тентакликлар бўлмиш бари сенда мужассам,  
Сенга ошиқ бўлмоқлик-чи — ўта тентаклик.

### Клеопатра

Ута мушкул, қийин әкан бу тентаклика  
 Қалб тўридан бериб жойни, силаб-сийпамоқ  
 Маъзур тутгин, неки феълим бўлса, Антоний,  
 Қиммати йўқ менга унинг, сенга ёқмагач.  
 Сени ҳозир виждон амри чорлар сафарга.  
 Шу важдан ҳам қулоқ солма оҳу зоримга.  
 Ишларингга ёр — мададкор бўлсин худолар.  
 Ёвларингни енгиг жангда ғалаба қучгил,  
 Қиличинингни туширмагин қўлингдан асло,  
 Поёндозинг бўлаверсин доим зафарлар.

### Антоний

Хуш қол энди. Ҳижронда ҳам бирга бўлурмиз,  
 Жисман бунда қолгунг, руҳан кетгунг мен билан,  
 Жўнайдирман, аммо кўнглим сендадир, сенда.  
 Хайр, кетдим!

### Кетадилар.

### 4-САҲНА

Рим. Цезарь уйидаги бўлма.

Окта́вий, Цезарь қўлида хат кўтариб киради. Лепи́д ва хизматкорлар ҳам шу ерда.

### Цезарь

Мана, Лепид, кўргин ўзинг, бадфеъллигимдан,  
 Ҳукмронлик бобидаги ҳамкори олий  
 Биродарим ёмонлашга бел боғламадим.  
 Искандария шаҳаридан ёзишар бундоқ:

Антонийнинг қиласи иши балиқ овлашу.  
 Эртаю кеч майхўрликдан ўтмасмиш нари.  
 Клеопатра сабоқ берар унга мардликдан,  
 Антонийдан назокатни ўрганармиш у;  
 Элчилар ҳам Антонийга йўлиқмиш аранг,  
 Ҳамкорлари ким эканин эслабди зўрга.  
 Сенга айтсам, ўзимизнинг ўшал Антоний  
 Заифлигу баъд ишларга муқкадан кетмиш.

### Л е п и д

Бўлса ҳамки Антонийда қанча заифлик,  
 Кўрк бўлгулук сифатларни яшира олмас.  
 Билиб қўйки, зулмат бўлса гар қанча қуюқ  
 Самодаги юлдузлар ҳам чақноқ, жилвагар.  
 Антонийга у қусурлар ўтмишдан мерос,  
 Фақат ўзи қусурлардан қутулолган йўқ.

### Ц е з а р ь

Муруватинг зўр-да, Лепид. На чора унга  
 Птолемей тўшагида ором гуноҳмас.  
 Оташзабон одам чиқса таҳт инъом этиб,  
 Қуллар билан ичиб турса бир косадан май,  
 Куппа-кундуз яна кезиб кўча-кўйларда  
 Кир, итриди кимсалар-ла муштлашиб юрса.  
 Ҳурмат учун бу ишларни кечирса бўлар,  
 Гарчи улар ҳар кимга ҳам келтиргай иснод.  
 Биласанми, Антонийнинг енгилтаклиги  
 Иккимизга келтирмоқда хунук оқибат.  
 Кошкийди, у бўш вақтини ишқий можаро,  
 Кайфу сафо, ишрат билан юрса ўтказиб.  
 Ҳозир эса вақт ғанимат, юрт таҳликада,

Ҳар сония тайёргарлик сари чорлайди  
 Бонг уради салтанатнинг юмушлари деб!  
 Шу ғанимат дамларни ҳам бериб ишратга,  
 Қилма деган ишни қилган гўдак сингари,  
 Эрмаклар деб ўз бурчини эсдан чиқарган  
 Антонийни чақирмоқлик зарур тартибга.

Ч о п а р киради.

Л е п и д

Мана, келди янги хабар.

Ч о п а р

Шавқатли шоҳим!

Бажарилди фармонларинг. Ҳар бир соатда  
 Янги гаплар келиб турага чегара ёқдан.  
 Баҳри уммон жиловидан ушлаган Помпей;  
 Куч тўплаган сендан қўрқкан кимсалар аро.  
 Аламзада бўлғанларнинг бари ўшандা,  
 Мишмишларга қараганда, хафамиш сендан.

(Кетади.)

Ц е з а р ь

Худди шундай гап кутувдим бугун ўзим ҳам.  
 Ҳукмдорнинг қанақаси яхши деганда,  
 Ҳали тахтга чиқмагани маъқул, дейдилар,  
 Тиригида кўпчиликка ёқмаган ҳоким  
 Улгандан сўнг авлиёдай топади обрў.  
 Оломонни сув ўтига қилурлар қиёс:

Кетаверар оқим қайга тортқиласа гар.  
Гоҳи ўнгга, гоҳи сўлга кетар сузилиб,  
Кейин эса чирийди-да.

Иккинчи чопар киради.

### Иккинчи чопар

Келтиридим хабар.

Қўлга олди қўш қароқчи бутун уммонни.  
Бири Менас, иққинчиси бўлса — Менекрат.  
Кемалари кечакундуз ҳеч чиқмай четга  
Италия ерларига қилмоқда ҳужум.  
Улар номин эшиитганда соҳилдагилар  
Титраб-қақшаб қолишади. Ўтюрак ёшлар ---  
Юзларига қўндиromoқда ғазаб қизил ранг.  
Кемаларни уммон сари чиқди дегунча,  
Тутишар-да, талон-торож айлашар улар.  
Қўш қароқчи қаҳрамонлик қилишмас даъво,  
Аммо Помпей номин сотиб, солишар даҳшат.

### Цезарь

Эсингни йиф, Антоний, сал кўзингни очги!  
Йифиштиргин эҳтиросли ишратларингни!  
Гирций, Панса қўшинлари дабдала қилган  
(Гарчи жангда ҳалок бўлди шу икки сафир)  
Мутинадан бошни олиб қочган кунларинг,  
Очлик деган душман қувган эди изингдан.  
Шон-шавкатдан жудо бўлиб юрган бўлсанг-да,  
Бу душман-ла мардонавор туриб олишдинг,  
Арзир эди бирон ваҳший гар ҳавас этса.  
Чанқаганда ичавердинг отнинг пешобин,

Ҳайвонлар ҳам ичмайдиган ботқоқ лойқасин.  
 Қишида қолган кийик каби пўстлоқ кемириб,  
 Заҳар-заққум мевалардан единг жирканмай,  
 Альп торида бўлганингда, турқидан ҳатто  
 Одам ҳушдан кетадиган ўлакса ебсан.  
 Ӯшанда ҳам мазанг қочмай, тинканг қуrimай,  
 Ҳатто рангинг сарғаймасдан қоядек турдинг.  
 Сен ҳақиқий аскар йигит, девкор азамат,  
 Шу сабабли бормас тилим таънага.

### Лепид

Афсус!

### Цезарь

Антонийни ўсал этсин ор ила номус.  
 Биз иккимиз қўлга қурол олмасак бўлмас,  
 Бунинг учун ҳарбий кенгаш ўтказмоқ даркор.  
 Дам ғанимат, буни солсанг агар пайсалга  
 Хўп Помпейга қўл келади.

### Лепид

Эртага, Цезарь,  
 Қўл остимда қанча қўшин борлигин билиб,  
 Қуруқдаги аскар билан кемалар сонин  
 Яна бир бор чўтлаб чиқиб, айтаман аниқ.

### Цезарь

Икковимиз кўришганда келаси сафар  
 Айтажакман бошдан-оёқ. Хуш қолгин энди.

## Лепид

Яхши боргин. Келиб қолса янги хабарлар,  
 Қолиб кетмай мен ҳам четда, турайнин билиб,  
 Илтимосим чиқармагил ёдингдан.

## Цезарь

Зинҳор,  
 Буни билгум нақ ўзимнинг бурчимдай тайин.

Кетадилар.

## 5-САҲНА

Искандария. Клеопатра саройидаги хобгоҳ.  
 Клеопатра, Хармиана, Ирада ва Мардиан ки-  
 риб келадилар.

Клеопатра

Хармиана!

Хармиана

Лаббай, маликам?

Клеопатра

О-о!  
 Ушал майдан тезроқ қуйиб узатгин.

Х а р м и а н а

Нечун?

К л е о п а т р а

Антонийим токи қайтиб келгунга қадар  
Тошдай қотиб ухламоқни истайман дилдан.

Х а р м и а н а

Уша ҳақда не учундир кўп ўйлайсан-да.

К л е о п а т р а

Хиёнатдир айтганларинг!

Х а р м и а н а

Мутлоқ, маликам!

К л е о п а т р а

Қаердасан, Мардиан, ҳой, ҳарам оғаси!

М а р д и а н

Тайёрдирман маликамнинг хизматларига,  
Кўнгиллари не хизматни тилайди бу дам?

К л е о п а т р а

Чийиллаган овозингни эмас, ҳар қалай.  
Минг йилда ҳам ололмайсан кўнглимни мутлоқ.

Иқболдан-ку ёлчигансан, нега деганда  
 Юрак ёниб чорлайдиган йўқ бирор нарсанг.  
 Эҳтироснинг нелигини биласанми?

Мардина

Ҳат

Клеопатра

Қандайига? Рост биланми?

Мардина

Иўқ, унчаликмас.  
 Амалда-ку кўп нарсага эмасман қодир,  
 Лек эҳтирос менга таниш. Чунки ўйлайман  
 Венеранинг Марс-ла қилган ишларини кўп.

Клеопатра

Қани, ўзинг, Хармиана, айт инсоф билан,  
 На ишларни қилар ҳозир бизнинг Антоний?  
 Турибдими тик оёқда ё оларми дам?  
 Пиёдами ёки отда еларми олға?  
 Бахтиёрсан, эй остида ўйноқлаган от!  
 Антонийнинг вазнин сезиб қилурсан роҳат!  
 Мағрур югар, эй тулпорим, сенинг ҳамроҳинг  
 Бу оламнинг ярмин сўраб турган баҳодир,  
 Сўзламоқда ҳозир ўзи... Балки шивирлар:  
 «Қаердасан, эй мисрлик оғатижоним?»—  
 Кўрса мени атар эди кўпинча шундай.  
 Нега энди сипқорайин ширин оғуни?  
 Бу офтобнинг бўсасидан тамом қорайиб,

Кечмиш йиллар ажинига бўлган гирифтор  
 Мендайин бир бедавога ким ҳам дейсиз зор?  
 Элимизга келиб Цезарь сукқанида бош,  
 Қўл узатса етмайдиган малика эдим.  
 Помпей бўлса кеча-кундуз кетмай ёнимдан,  
 Жон бераркан, кўзларимдан изларди нажот.

**Алексас** киради.

### **Алексас**

Салом дейман, гўзал Миср маликасига!

### **Клеопатра**

Антонийга ўхшар жойинг бўлмаса ҳамки,  
 Ўлфат эдинг, у туфайли кирдинг қаторга,  
 Қўрғошин ҳам зар-тиллога 'айланди-қолді.  
 Мард Антоний кайфияти нечук, яхшими?

### **Алексас**

Сизга айтсан, о маликам, сўнгги дамда у  
 Қўлимдаги ушбу дурни босди лабига,  
 Қайта-қайта ўпиб, сўнгра узатди менга.  
 Сўзлари ҳам юрагимдан жой олди мангуди.

### **Клеопатра**

Сўзларин айт, қулоғимга қўйилиб қолсан.

### **Алексас**

«Дўстим,— деди,— маликага еткиз, албатта,  
 Садоқатда тенгсиз бўлган римлик мафтуни

Арзимаган шу совгани — бир чиғаноқни  
 Йўлламоқда. Сўнгра бир кун албат пойига  
 Муқаррардир тиз чўкиши беҳисоб юртлар». .  
 «Айтиб қўйги, унутмагин,— деди у яна,—  
 Бош эгажак Машриқ замин». Шунда, десангриз  
 Иргиб минди тулпорига, босди қамчини.  
 Тулпори ҳам қаттиқ кишинаб кўтариб кетди,  
 Шу боисдан жавобим ҳам етмади унга.

### Клеопатра

Қани айт-чи, хушҳолмиди ёки хафаҳол?

### Алексас

На иссиги, на совуғи бўлган кундуздек,  
 Хурсандлигу хафалигин бўлмасди билиб.

### Клеопатра

Одам деган шундай бўлса! Хармиана, бок,  
 Оқилона тутар ўзин, сир бой бермайди.  
 Шерикларим тағин маъюс бўлишмасин деб,  
 Кўринмасди асти ғамгин. Ўйнаб-кулишлар  
 Миср деган жойда қолди демоқлик учун,  
 Хушчақчақлик, хурсандликдан юрар нарида,  
 Қувноқлигу ғамгинликнинг нақ селаваси!  
 Қани айт-чи, бу борада ким етар унга?  
 Ҳеч ким!— Йўлда кўрмадингми элчиларимни?

### Алексас

Йигирмага яқинини кўрдим шекилли,  
 Нега тез-тез элчиларинг қатнашиб қолди?

### Клеопатра

Антонийга бирор мактуб ёзмаган куним,  
 Машъалистон олам бўлур менга зимиштон!  
 Қоғоз билан сиёҳ келтири, бўл, Хармиана.  
 Миннатдорман бугун сендан, яша, Алексас.  
 Цезарни-чи, мен бунчалар севмасдим чорги?

### Хармиана

О, Цезарь-ку — шон эгаси!

### Клеопатра

Овозинг ўчсин!  
 Дилдаги шу завқинг билан қўшмозор бўл-е!  
 Антонийни шон эгаси деб айт!

### Хармиана

Цезарь мард!

### Клеопатра

Эркакларнинг сардорию мардларнинг мардин  
 Цезарга сен яна бир бор тенг қилсанг борми,  
 Дабдалангни чиқаргумдир, Изида ҳаққи!

### Хармиана

Мени кечир, ўтмиш кунлар олиб хаёлим,  
 Эски ҳислар қўшиғини куйлаб қўйибман.

## Клеопатра

У вақтларда ёш ва думбул, ҳеч бир нарсанинг  
Фарқин билмас қони ҳам суст қиз бола эдим.  
Қани қўзғал, қоғоз билан сиёҳ келтир тез.  
То Мисрда одам зоти қолмагунича  
Чопарларни жўнатгайман, унга пайдар-пай.

Кетадилар.

**ИККИНЧИ ПАРДА****1-САҲНА**

Мессина. Секст Помпей уйидаги бўлма.  
Помпей, Менекрат ва Менас кириб келишади

**Помпей**

Гар худолар ҳақгўй бўлса, майли, у ҳолда  
Адолатли ишимизга берсинлар мадад.

**Менекрат**

Уларнинг бу сукунини, шавкатли Помпей,  
Раддия деб ўйламоқлик бўлмас инсофдан.

**Помпей**

Биз беҳуда тоатлар-ла бўлсак овора.  
Бекор кетгай бу ҳаракат, илтижолар ҳам.

**Менекрат**

Биз кўпинча ўзга зиён оламиз тилаб,  
Худолар ҳам балолардан асрashiб бизни,  
Илтижомиз рад этишар. Гоҳо тоат ҳам,  
Ибодат ҳамbekор кетар.

## Помпей

Зафар менга ёр!  
Халқимнинг ҳам кўнгли менда, денгизлар тобе.  
Куч-қудратим бўлса, гўё янги чиққан ой,  
Ошиб-тошиб, кундан-кунга борар тўлишиб.  
Миср олган Антонийни ўз оғушига,  
Айш-ишратни урушдан ҳам кўргуси аъло.  
Пулни ғамлаш билан банддир Октавий Цезарь,  
Минг-мингларча юракларнинг ичб қонини.  
Лепид эса икковига бирдай парвона,  
Аммо ичдан ёмон кўрар, улар ҳам буни  
Бир чақага олишмайди.

## Менас

Цезарь ва Лепид  
Катта қўшни тўплаб энди бошлашар юриш.

## Помпей

Ёлғон гап бу! Кимдан билдинг, айтасан ҳозир!

## Менас

Силвий айтди.

## Помпей

Бу тушига киргани аниқ,  
Антонийга римликларнинг бугун кўз тутиб  
Туришгани маълумдир. О гар Клеопатра!  
Қани энди ишқнинг сехри дудоқларингни  
Рангсизликдан қутқарсаю, ақиқлантирас!

Жодунг берса кўмак ҳусну малоҳатингга.  
 Жозибанг-чи жоду билан тароватингга.  
 Ишқибозни кўмиб ташла кайфу сафога,  
 Нозу неъмат, май, шаробдан узмасин кўзин.  
 Шулар билан овлаб-тovлаб сплжитма сира,  
 Ноинсоний ишга кимки кетса муқкадан,  
 Шавкатидан айрилади сувга чўккандаи.

**Варрий киради.**

Но хабарлар келтирмишсан, айтавер, Варрий?

**Варрий**

Айтадиган гапларим ҳам ҳаммага маълум.  
 Антонийни кутишмоқда Римда иштизор.  
 Анча бўлти, тарк этганниш Мисрни буткул.

**Помпей**

Хабар йўқдир менга бундан кўра машъумроқ.  
 Сенга айтсам, Менас, мутлақ ўйламовдим мен  
 Ишқ домидан қутулмаган бу ишратпараст  
 Урушни деб кияжагин бошга дубулға.  
 Оқиғини айтсам агар, санъати ҳарбда  
 Иккисин ҳам қолдиргуси доғда албатта.  
 Арзир бугун гуурлансак исён туфайли,  
 Нафси мисли ўпқон бўлган бу жононсевар  
 Тарк этмишдир Птоломей бевасин ишқин.

**Менас**

Цезарь билан Антонийнинг пишмайди оши,  
**Антонийнинг** бунда қўли йўқ эрур гарчи,

Хотиңи ва биродари Цезарға қарши  
Адоват-ла бош күтариб курашгани рост.

### Помпей

Қайдам, Менас? Бу бачканаш машмаша, жанжал,  
Чекилмасми күрганида зўр адоватни!  
Бизга қарши жанг қилмоққа бўлмаса мажбур,  
Фижиллашиб қолишарди уччовлари, ҳа  
Асли улар бир-бирларин қиймаламоққа  
Сабаблар ҳам топилгуси меъёрдан ортиқ.  
Аммо улар кўнглидаги қўрқув ва ташвиш,  
Қўймасмикин уччовини иноқлаштириб.  
Ана шуни билмай доғман, худолар ҳофиз,  
Бизга тақдир ато этсин. Биз-чи бор кучни  
Тўплайлик-да курашларга ташлайлик ўзни.—  
Кетдик.

Кетадилар.

### 2-САҲНА

Рим. Лепид уйидаги бўлма.  
Энобарб билан Лепид кириб келишади.

### Лепид

Қилган бўлар эдинг зўр иш, Антонийни сен  
Ховуридан туширсангу овласанг кўнглини,  
Бир шаштидан қайтарсайдинг, дўстим Энобарб.

### Энобарб

Эс-ҳушини келтиргумдир жойига албат.  
Гар ғашига тегмоқликни истаса Цезарь,  
Антоний ҳам бир ҳурпайиб, боқиб баланддан

Марс сингари бир ўкирар. Худолар ҳаққи,  
Антонийнинг башараси бўлса-чи менда,  
Шу учрашув туфайли, бас, овора бўлиб,  
Устарага ишим тушмас эди мутлақо.

### Л е п и д

Эски ҳисоб-китобларнинг эмас фурсати.

### Э н о б а р б

Мабодо иш пишган бўлса, йилнинг ҳар фасли  
Пишган ишни бажармоққа мос бўлур доим.

### Л е п и д

Майда ишлар ўзин четга олмоғи даркор.

### Э н о б а р б

Майда ишлар босиб тушар каттасин гоҳо.

### Л е п и д

Қизишка кўп. Чўгни ҳадеб пуфлайвермагин.  
Келди ана кўланкаси майдон Антоний.

Антоний билан Вентидий кириб келишади.

### Э н о б а р б

Етиб келди ҳаялламай мана Цезарь ҳам:

Цезарь, Мененат ва Агриппа кириб келишади.

А н т о н и й

(Вентидийга)

Ишларни тез адо этиб, Парфияликлар —  
Еққа юриці башлаяжакмиз.

Ц е з а р ь

(Меценатга)

Билмадим, аммо  
Агриппадан сұраб күргин, айтса әхтимод.

Л е п и д

Бизни аслян бирлаштирган олий мақсадлар  
Олижаноб ўртоқларға аёндир бари.  
Фиди-биди, майда гаплар бўлсин тез унут,  
Қамаймасин мурувватлар бир-биrimизга.  
Арзимаган нарсалар деб қолсак тортишиб,  
Эски яра тузалмайди, очилар қайта.  
Шу сабабдан ўтинаман, муҳтарам дўстлар,  
Арзимаган нарсаларни ўтинглар четлаб,  
Бўлинг юмшоқ, ғазабга ҳам берманг сира эрк,  
Бўлмаса-чи путур етар, бузилар жириш.

А н т о н и й

Яхши сўзлар...

(Имо-ишора қилиб Цезарь билан саломлашади.)

Гар иккимиз бўлсак ҳам душман,  
Жаңг олдидан сени албат қутлардим шундай.

**Цезарь**

Хүш көлибсай.

**Антоний**

Миннатдорман.

**Цезарь**

Үтир.

**Антоний**

Үзингдан бўлсин.

**Цезарь**

Майли, ихтиёринг.

Үтиришади.

**Антоний**

Қулогимга етган баъзи гапларга кўра  
Гарчи асло бўлмаса-да мутлақо дахли  
Ёқмаганмиш сенга менинг баъзи ишларим.

**Цезарь**

Келиб-келиб арзимаган ишлар учун ҳам  
Хафа бўлсам сендан, тоза қурирди шўрим.  
Гар ўзимга нодахлдор ишлар учун ҳам  
Жаҳлим чиқса, ҳар қадамда юрсам ғижиниб,  
Кўпчиликка майна бўлиб қолардим албат!

### Антоний

Менинг Миср тупроғида туриб қолганим  
Сенга қандай таъсир қилди, билсам бўларми?

### Цезарь

Римда ўзим қолганимда, не кўйда бўлсанг,  
Мен ҳам шундай аҳволотда қолганлигим рост.  
Мабодо сен турсанг ҳамки Миср элида,  
Менга қарши найрангларни ишлатган бўлсанг,  
Барибир деб кетавермас эдим мутлақо.

### Антоний

Найрангларни ишга солдинг, деганинг нима?

### Цезарь

Наҳот бунинг изоҳига қолса эҳтиёж?  
Хотининг ва биродаринг бирлашиб туриб,  
Сенинг номинг бўлган ҳолда уларга дастак,  
Менга қарши бош кўтариб қилишди жанглар.

### Антоний

Бўлмағур гап. Менинг номим бўлмаган зарур,  
Укам Люций изламаган ундан ҳеч паноҳ.  
Ўзинг билан бир тўдада жанг қилганлардан  
Тўплаганман анча-мунча тўғри гапларни.  
Наҳот укам сенга қарши бош кўтарсаю  
Бунинг билан менга асло солмаса кўлка?  
У сен билан олишсаю мен қолсам четда?  
Икковимиз бир одаммиз, ишлар ўртада,

Бу борада ўзингга ҳам йўллагандим хат.  
Мабодо сен бирор ғалва чиқармоқ бўлсанг,  
Сабабини бўлак ердан ахтар, гапим шу.

### Цезарь

Мени ҳозир ноинсофга чиқариб буткул,  
Кўтармоқчи бўляяпсан ўзингни қўкка.  
Бунинг эса баҳонадан йўқ бўлак оти.

### Антоний

Йўқ, йўқ. Сира борма бундай хаёлга, дўстим.  
Ўзинг ўйла, наҳотки мен — сенинг ҳамкоринг,  
Ишимизнинг илдиzinни қирқмоқчи бўлган  
Укамни нақ ишга солиб, гиж-гижлаб қўйсам?  
Хотинимга келганда-чи? На чора, сенга  
Шу хил хотин йўлиқишин қиласман орзу.  
Енгил экан жиловини тутмоқ жаҳоннинг  
Жиловлашдан кўра уйда шундай хотинни.

### Энобарб

Эҳ, ҳаммамизнинг хотинларимиз шунаقا жангари  
бўлишса қани эди! Ушанда юришларда ҳам хотингина-  
миз ёнгинамиэда бўларди.

### Антоний

Цезарь, мени тўғри тушун, таассуфдаман,  
Хотиниму биродарим бошлашган исён,  
Қизиқонлик шон-шуҳратга бўлиб омухта  
Сарсон қилган сени жуда, бузган ороминг,  
Ташвишларинг етмагандай қотирган бошинг.  
Сенга қандай ёрдам қиласай? Айтғин бемалол.

### Цезарь

Ўшанда мен ёздим хатлар, қилмадинг парво,  
Фарқ бўлгандинг ўшал пари базмларига.  
Чопар борса яқинингга йўлатмай асло,  
Масхаралаб, қувиб солиб, ўқимай хатин  
Бир чеккага улоқтирдинг.

### Антоний

Чопаринг бўлса  
Беижозат кирмоқ бўлган тўғри бостириб,  
Ўшанда мен уч подшоҳга бериб зиёфат  
Турган эдим, кайфиятим эди берироқ.  
Эртасига йўқлаб қолдим чопарни ўзим,  
Кечиримга баробардир бу ишим, билсанг,  
Бироқ булар арзимайди сарфлашга вақт.  
Ғалва учун бўлак сабаб ахтарсанг маъқул.

### Цезарь

Содиқликка қасам ичиб, буздинг онтингин.  
Энди эса нақ ўзимни қилмоққа айбдор,  
Қандай тилинг борар сени?

### Лепид

Ўзни бос, Цезарь.

### Антоний

Қўявер, Лепид!  
Тўкиб-солсин дилидаги иеки борини,  
Менинг шаъним шубҳалардан турар юксакда.  
Тўхтамасдан гапиравер.— Буздим онтимни...

**Цезарь**

...Илк илтимос қилдим сендан: сўзинг аяма,  
Ишинг билан мадад бергил; сен-чи, рад этдинг.

**Антоний**

Очиини айтсам агар, қилмадим диққат,  
Шароит ҳам шундай эди. Бошим айланиб,  
Мия айниб, базмларда қолгандим чалғиб.  
Гуноҳимни тан оламан, бош товламайман.  
Таң олиш-ла қадр-қимматим урмайман ерга,  
Қудратимни бўшаттириб қўймайман асло.  
Ажаб эмас, Фульвия ҳам қилганда исён,  
Қутқармоқни хаёл қилган мени Мисрдан,  
Шу тариқа кулфатларга бўлдим сабабкор.  
Ундаи бўлса ҳар нарсанинг чегараси бор,  
Мен ҳам энди ор-номусга туширмасдан дод  
Узр сўраб қолмоқчиман.

**Лепид**

Ажойиб сўзлар...

**Меценат**

Ўтган ғалва-ғавғоларнинг муҳокамасин  
Тўхтатсак-чи, барчасини этсак-чи унут,  
Эътиборни қаратсак-чи ҳозирги кунига  
Вазият ҳам, яраш, дейди.

**Лепид**

Жуда ўринли.

### Э н о б а р б

Жўироқ қилиб айтганда, бир-бирларингга меҳр деган нарсадан жиндай қарз беринглар. Помпей ҳақидаги мишишлар тўхтагандан кейин, қарздан узилиша-сизлар. Ушанда бекор қолиб, бемалол ғижиллашаве-расизлар.

Антоний

“

Аралашма бу ишларга. Жангчисан холос.

### Э н о б а р б

Унутибман, ҳақ гап ҳатто худога ёқмас.

Антоний

Тилингга эрк бераверма. Жим бўлсанг-чи, бас.

### Э н о б а р б

Майли, майли, сасим чиқмас мисоли бир тош.

### Ц е з а р ь

Гарчи қўупол айтилса ҳам аслида тўгри.  
Ҳаракатда бирлигимиз бўлмаса сира,  
Дўстлигимиз қолажакдир таҳликада хўп.  
Қани энди бизни маҳкам тутган чегани  
Қайдалигин билсам агар, топмай қўймасдим,  
Борар эдим шу дунёнинг чеккасига ҳам.

### А г р и п п а

Ижозат бер, Цезарь, менга.

Цезарь

Сўйла, Агриппа.

Агринна

Сенинг синглинг Октавия ҳуснда танҳо,  
Шон-шавкатли Антоний-чи, ҳозир сўққабош,  
Хотини ҳам ўлиб қолди.

Цезарь

Бас қил, Агриппа!

Клеопатра бу сўзларни эшитса борми,  
Беодоблик бобида хўп шўринг қуритиб,  
Ҳар қанча айб ёпиштиурса, гуноҳлар қўйса,  
Бадбаҳт деса, ҳақли бўлар.

Антоний

Уйлазнганим йўқ,  
Агриппа ўз сўзин, майли давом эттиурсин.

Агринна

Бир умрга дўсту ёрон бўлмоқлик ҳамда  
Үртадаги оқибатни маҳкамлаш учун  
Юракларни қовуштирмақ бўлғуси жоиз.  
Антонийни уйлантирмақ керак синглингга.  
Соҳибжамој Октавия қилсан бахтиёр  
Пешонаси ярқираган ушбу бандани.  
Антонийнинг одобију, муносиб хулқи,  
Ростин айтсам, таърифлардан турадар баландда.  
Бу икки қалб қовушса-чи, битар ғалвалар,

Жанжаллару қўрқувларга қолмайди ўрин.  
 Оқибатлар ҳар жиҳатдан бўлғуси яхши.  
 Кўнгилларни хира қўлган ярим ёлғонлар  
 Чин бўлса-да, кейин сизга беролмайди панд.  
 Октаия иккилигизни баробар кўрса,  
 Бир-бирингга мәҳрларинг ортгуси шаксиз.  
 Кўпчиликнинг кўнглини овлаб оласиз албат.  
 Бу фикрни виждан бурчим эслатар кўпдан,  
 Шу бисидан журъат этдим сўзлашга, узр.

Антоний

Нима деркин бунга Цезарь?

Цезарь

Аввал Антоний  
 Ушбу гапга не дейишин билдиrsa яхши.

Антоний

Фалваларнинг чокларини бостиromoқ учун  
 Агриппада кўрсанм эдим бирор ваколат,  
 Деяр эдим: «Бу гапларинг маъқул, Агриппа».

Цезарь

У ҳокимлик бобида ҳам тенглашур менга,  
 Ўйлайманки, қайтармайди синглим ҳам гапин.

Антоний

Бундай маҳкам ва баҳтиёр иттифоқликдан,  
 Бои тоҳтмоқлиқ тушимга ҳам қирмайди ҳатто.

Қўлингни бер, Цезарь, тезроқ. Иноқлигимиз  
Мангуликка. Давом этгай, чорлагай бизни  
Олий, эзгу мақсадларга.

### Ц е з а р ь

Мана, қўлим ол.  
Севолмайди синглисини ҳеч ким менчалик.  
Энди эса, тутмоқчиман сенга қўш-қўллаб.  
Синглим буткул ҳаётини бахшида қилсин,  
Юртларимиз, юрагимиз иноқлигига.  
Уртамизда меҳр бўлсин.

### Л е п и д

Шундай бўлур ҳам.

### А н т о н и й

Вақти келиб, фурсат етиб, Помпейга қарши  
Үйламовдим сира қилич кўтаришимни.  
Помпей эса пича аввал, яқингинада  
Баҳоси йўқ бир яхшилик қилганди менга.  
Энг аввало айтай унга ташаккурларим,  
Ношукур деб хаёлига келтирмасин ҳеч.  
Сўнгра эълон қилсан қилай, майлига, уруш.

### Л е п и д

Шошилмасак бўлмас сира, кечиксак борми,  
Бизлар қолиб, унинг ҳамла қилмоғи тайин.

### А н т о н и й

Манзилгоҳи қайдა?

**Цезарь**

Мизен тори пастида.

**Антоний**

Қуруқликда ҳоли қалай, баландми қўли?

**Цезарь**

Баландликка анча баланд, қудрати ҳам зўр.  
Денгизга у бошқаларни бийлатмай қўйган.

**Антоний**

Ана шундай мишмишларни эшиганим бор,  
Ҳйлайманки, куч синамоқ пайти ҳам етган.  
Аммо жиба, дубулғалар киймасдан бурун,  
Керак майда машмашалар илдизин қирқмоқ.

**Цезарь**

Бош устига, азиз дўстим, сени ҳозироқ  
Сингилгинам ҳузурига бошлайн.

**Антоний**

Лепид,

Бизлар билан бирга бўлгин.

**Лепид**

Шонли Антоний,  
Бўлсам ҳамки, ушбу дамда хастаю бемор,  
Қололмасман бу ерда ҳеч, бирга борурман.

Бургулар чалинади. А нтоний, Цезарь ва Лепид чиқиб кетишади.

### *М е ц е н а т*

Хуш келибсан, бизнинг Римга, дўстим Энобарб.

### *Э н о б а р б*

Цезарнинг ўнг қўли, ажойиб Меценат! Олижаноб дўстим Агриппа!

### *А г р и п п а*

Олижаноб Энобарб!

### *М е ц е н а т*

Бу ёги чиройли чиққани жуда яхши бўлди-я. Сизлар Мисрда роса маза қилган кўринасизлар.

### *Э н о б а р б*

Нимасини айтай! Азбаройи кеч турганимиздан хижолат бўлиб офтоб ҳам афтилизга қараёлмасди. То туннинг ранги уятдан оқармагунча манишатдан бош кўтармасдик.

### *М е ц е н а т*

Ун икки қишилик ионуштага саккизта тўнғиз гўшти кетгани ростми?

### Э н о б а р б

Бу бизга бургут чивин ютгандай гап эди. Базмларимизда шунақанги нарсалар бўлардики, ҳар қанча айтсам ҳам оз.

### М е ц е н а т

Мишмишларга ишонадиган бўлсак, Клеопатра зўр нарса эканда-а?

### Э н о б а р б

Киди дарёсидаги биринчи учрашувдаёқ Марк Антонийни ўзига ошиқу шайдо қилди қўйди.

### А г р и п п а

Уни кўрган одам алдамаган бўлса, чиндан ҳам зўр экан.

### Э н о б а р б

Ҳозир сенга барчасини айтаман бир-бир.  
 У маҳлиқ тушган кема Киди дарёсин  
 Сувларида жилва қилар мисли олтин тож.  
 Қемасининг ўмрови ҳам қўйма тилладан,  
 Елканлари тикилганди қирмиз шоҳидан.  
 Азбаройи таратгандан хушбўй исларни  
 Шамол ишқдан сархуш ҳолда бош уради, бош.  
 Най садосин мақомида кумуш эшкаклар  
 Сувга ботар эшкакларни ювган томчилар  
 Ишқ селида туғён уриб эргашар эди.  
 Маликанинг таърифига ожизман-ожиз,

Унинг ҳусну малоҳати йўқдир Зуҳрова,  
 Манман деган таърифлар ҳам лолу афтода.  
 Андак қия ёнбошлаган ҳолда ётаркан,  
 Боши узра жилваланар барқут соябон.  
 Икки ёнда турган кўркам, барно ўғлонлар  
 Ҳар биттаси кўз олгулик елпуғич ила  
 Маликага баҳш этишар роҳатбаҳш салқин.  
 Буни кўрган Антонийнинг жўш урди қони,  
 Вужудига сиғмай қолди қайноқ юрак ҳам.

### А г р и п п а

Буни кўр-а! Хўп баҳтиёр экан Антоний!

### Э н о б а р б

Маликанинг канизлари сезгир ва ҳушёр  
 Неренidlар каби ҳар зум, ҳар бир лаҳзада  
 Нигоҳидан сезишарди кўнгил тўлқинин.  
 Бир канизи борар эди кемани ҳайдаб,  
 Қўллари-чи, мисли гулдай нозик ва латиф..  
 Шул боисдан каниз қўли теккан жиҳозлар  
 Жон киргандай қолар эди зумда титрашиб.  
 Ҳар тарафга тараларди муаттар ҳидлар,  
 Одамлар ҳам бу асрордан қолишганча лол,  
 Шаҳар қолиб, силжишарди дарёга томон.  
 Антонийга макон бўлган бозор майдони  
 Шу тариқа кўз олгунча қолди тез бўшаб.  
 Ушбу дамда фақат ҳаво эди ҳамроҳи,  
 Учар эди илож топса шунда ҳаво ҳам!

### А г р и п п а .

О, баҳосиз аёл-да бу!

### Э н о б а р б

#### Соҳил томонга

Етганида маликанинг соҳир кемаси,  
 Антоний ҳам чопарларни юбориб зумда,  
 Маликані таклиф қилди базми жамшидга.  
 Назокатин ишга солиб Клеопатра ҳам,  
 Саркардані даъват этди бўлмоққа меҳмон.  
 Антонийни биласизлар — одобда ўткир,  
 Аёл сўзин қолдирмайди мутлақо ерда,  
 Соқолини ўн маргача роса қиртишлаб,  
 Базм сари юзланганда ўйнарди кўзи.

### А г р и п п а

Аёл деган шундай бўлса! Юлий Цезарининг  
 Қиличи ҳам шу малика қурбони бўлган,  
 У қўш ҳайдаб, малика-чи хирмон қўтарган.

### Э н о б а р б

Бир кун, десанг, ўшал санам кўзим ўнгига  
 Эллик одим масофадан ўтаркан чопиб,  
 Нафас деган жонвор сиқиб, ўпкаси шишиб,  
 Оғзин каппа очганича ютарди ҳаво.  
 Бундай ҳолат бошқаларни кўрсатар хунук,  
 Унинг ҳусну жамолига берарди сайқал.

### М е ц е н а т

Антоний ҳам энди ундан қутулса керак.

### Э н о б а р б

Қутулишни хаёлига келтирмас сира.  
 Клеопатра турган жойда ёшлиқ абадий,

Ғамзалару ишвалари тегмагай жонга.  
 Шундай бўлар: баъзиларнинг кўзи тушганда  
 Клеопатра юракларга ўт ёқар жуда,  
 Эсингни ҳам қелтиради зумда жойига.  
 Иштаҳада қолищмайди унча-мунчадан,  
 Лек буниси яращади ўзинга буткул.

### М е ц е н а т

Анча-мунча эси бўлган, камтар ва хушрўй  
 Аён зоти Антонийга хуш келса борми,  
 Октавия саркардага мисли бир жаннат,

### А г р и п п а

Қани энди, йўл бошланглар. Йўқ дея кўрма,  
 Шу ерларда эканингда, дўстим Энобарб,  
 Бўлажаксан азиз меҳмон.

### Э н о б а р б

Раҳмат, биродар.

Кетадилар.

### З-САҲНА

Уша жой. Цезарнинг уйидаги бўлма.  
 Цезар, Антоний, Октавия хос навкари ва  
 туғдорлари билан бирга кириб келишади.

### А н т о н и й

Зиммамдаги юксак бурчим, давлат ишлари  
 Айирмоги мумкин биэзи,

## Октавия

Хижрон кунлари

Эртаю кеч тиз чўкканча, кўтармай бошим  
Дуо қилгум.

## Антоний

Хайрли кеч, шавкатли Цезарь,  
Қулоқ солма мишишларга, қилма эътибор,  
Октавиям, гуноҳкорман сенинг олдингда,  
Булар барни ўтган-кетган ишлардир, билсанг.  
Тунинг яхши ўтсин, Цезарь.

## Цезарь

Хайрли бўлсин.

Цезарь билан Октавия кетишади. Қуръачи кириб  
келади.

## Антоний

Хўш? Согиниб қолгаидирсан Мисрни жуда?

## Қуръачи

О, қанийди, мен у ердан жилмаган бўлсам!  
О, қанийди, у ерга сен бормаган бўлсанг!

## Антоний

Сабаб-важи борми? Нима? Қани жавоб бер!

### Қуръачи

Тилим билан айтмоқлигим мушқулдир жуда,  
Аммо чиндаң сездим, тезроқ қайтгин Миерга.

### Антоний

Қани айт-чи, тақдир боқар кимга жилмайиб,  
Кимнинг қўли узун бўлар: менми ё Цезарь?

### Қуръачи

Цезарь, албат. Илож топсанг ундан йироқ бўл,  
Осмоний фариштанг-ку девкор мададкор,  
Мағлубият нелигин билмайсан асло.  
Енгилмайди сендаги руҳ ҳеч бир балода,  
Цезарь билан бўлсанг бунинг кўрасан аксия.  
Олисроқдан гаплашавер, яқин йўлама.

### Антоний

Бундоқ дема, тилингни тий, тушундингми?

### Қуръачи

Иўқ,

Сендан бўлак бир кимсага очмайман оғиз,  
Аммо шуни билиб қўйгин, Цезарь билан сен  
Неки ўйин ўйнасанг-да, ютқазнинг ҳақ.  
Сўндиргуси сенинг шуъланг унинг жилваси.  
Такрор дейман: қилолмайсан асло тириклик  
У бор жойда, йироқда-чи — қудратлисан сен!

## Антопий

Боравер! Айт Вентидийга, бу ёққа келсин.

Қуръачи кетади.

Бас, отлансии йўлга энди. Тасодифми ё,  
 Валийликми, ҳар ҳолда рост қуръачи сўзи:  
 Цезарь деса тин қолади ҳатто суяклар,  
 Тенг келолмам унга асло зафар бобида.  
 Ютқазишим турган гапдир ҳар бир ўйнида,  
 Чек ташласак унинг ғолиб чиқмоғи тайин,  
 Гар иккимиз хўроз тутиб уриштирасак ҳам,  
 Хўрозимни қочиргуси унинг дакани.  
 Мен Мисрга тезроқ бориб, муқаддас никоқ  
 Ришталарин маҳкам боғлай, ўринатай тинчлик.  
 Бахтим эса кун чиқарда чопадир албат.

Вентидий киради.

Келганингдан хурсанд бўлдим, Вентидий сенинг,  
 Парфиялик душманларга отлангил шитоб.  
 Юр, ваколат васиқасин берай қўлингга.

Кетишади.

## 4-САҲНА

Уша жой, Кўча.

**Лепид, Меценат ва Агриппа** кириб келишади.

Лепид

Бундан нари кузатмоқнинг йўқдир ҳожати,  
 Боринг энди, саркардалар қолди кутишиб.

**А г р и п п а**

Жиндай сабр, Октавия билан Антоний  
Хайр-маъзур этсин. Сўнгра жўнармиз.

**Л е п и д**

Демак,  
Ўзимизга хўп ярашиб тушган яроғлар  
Таққан ҳолда учрашамиз. Яхши қолинглар.

**М е ц е н а т**

Гапинг тўғри, Мизен тогин этакларига  
Сендан олдин боражакмиз, албатта, Лепид.

**Л е п и д**

Иш туфайли олис йўлни босмасам бўлмас,  
Сизлар эса икки кунни ютишинглар ҳақ.

**М е ц е н а т    б и л а н    А г р и п п а**

(бараварида)

Оқ йўл.

**Л е п и д**

**Хайр.**

**Кетадилар.**

## 5-САҲНА

Искандария. Саройдаги девони хос.  
Клеопатра, Хармиана, Ирада ва Алексас кириб келишади.

Клеопатра

Биздек севги қулларига хуш келадиган  
Наволарни истаб қолди бу хира кўнгил.

Мулошим

Созандалар! Қаердасиз?

Мардиан кириб келади.

Клеопатра

Кўй, ҳожати йўқ.  
Қани, бўл тез, Хармиана, соққаларни ол.

Хармиана

Қўлим оғрир, ҳарам оға билан ўйнай қол.

Клеопатра

Гапинг тўғри, фарқи йўқдир аёлга асло —  
Хотин билан ўйнайдими, иочор қул билан.  
Ўйнаймизми? Эплайсанми?

Мардиан

Уришиб кўрай.

### Клеопатра

Ким бўлса ҳам уринса бас, чиқмаса-да наф,  
Оширади муруватим, товлар меҳримни.  
Йўқ, ўйнагим келмай қолди! Унинг ўрнига  
Йўл олайлик дарё томон қўлда қармоқ-ла.  
Олислардан куй садосин тинглабон масрур,  
Қармоғимни яхши сезмай комига тортган  
Қизил қанот балиқларни тутай бирма-бир.  
Нақ ўшанда Антоний деб фараэ қиласман  
Қармоғимга тушиб қолган ҳар бир балиқни.  
Ва дейманки: «Ҳолинг қалай, тушдингми қўлга!»

### Хармиана

Эсингдами, бўлган эди тоза ҳам кулгу,  
Икковларинг кўп тутишга гаров бойлашдинг,  
Сен юборган ғоввос ғоят эпчиллик қилиб,  
Қармоғига илиб чиқсан ўлик балиқни,  
Тутдим, дея Антоний хўп бўлганди хурсанд.

### Клеопатра

Ушанги кун ўлганда ҳам чиқмас ёдимдан!  
Ушал кунги кулгим роса қўзғади жаҳлин.  
Ушал тунги кулгим эса қилди баҳтиёр,  
Эртасига субҳидамда ошириб кайфин,  
Турфа-турфа кийимларим кийдириб қўйдим,  
Узим эса Филиппдаги жангда иш берган  
Зўр қилични белга тақиб, туриб олдим тек.

Чо пар киради.

Италиядан келяпсанми? Қани, бўл тезроқ,  
Хушхабарлар айтиб қондир диллар чанқофин.

### Ч о п а р

О, малика! О, малика!

### К л е о п а т р а

Бўлдими ҳалок?

«Ҳа» десанг бас, ўлдирасан маликанги ҳам.  
Антонийнинг тириклигин, кайфи чоғлигин,  
Озодлигин ҳозир менга етказсанг борми,  
Истаганча олтин берай, қилмам зиқналик,  
Манман деган шаҳаншоҳлар қалтираб ўпган  
Қўлим чўзай, марҳаматим тутмайин дариг.

### Ч о п а р

О, маликам, юрибди у мисли жаниатда.

### К л е о п а т р а

Мана олтин. Олгин яна... Ахир марҳумлар  
Тилга тушса, уларни ҳам деймиз: «Жаннатда!»  
Мабодо сен шу маънода сўзлаган бўлсанг,  
Ўзим тутган олтинларим эритиб ҳозир  
Шундай мудҳиш калом чиққан оғзингга қўйгум.

### Ч о п а р

Маликам, бир эшитиб кўр.

### К л е о п а т р а

Майли, айтавер.  
Хушхабардан умидимни қўйғанман узиб.

Асир тушмай, соғ-саломат бўлса Антоний,  
 Шодиёна чеҳранг қани? Қовоғинг солиқ.  
 Олиб келган бўлсанг агар менга шум хабар,  
 Ҳар бир мўйи илон бўлиб биланглаётган  
 Махлуқ эмас, одам янглиғ турибсан-ку сен?

### Ч о п а р

Гапларимга қулоқ солмоқ борми кўнглингда?

### К л е о п а т р а

Юлиб ташлаш истаги бор асов кўнглимда.  
 Антонийнинг асир тушмай Цезарь қўлига,  
 Соғ-саломат юрганини гапирсанг ҳозир  
 Бошингдан зар ёмғирин ёғдиргум сени.  
 Унутмассан яхшилигим.

### Ч о п а р

У соғ-саломат.

### К л е о п а т р а

Минг бор шукур.

### Ч о п а р

Цезарь билан апоқ-чапоқ у.

### К л е о п а т р а

Сен кўнгли оқ одамсан-да..

Ч о п а р

Иккови қалин дўст.

К л е о п а т р а

Сенга борим садақадир.

Ч о п а р

Ташаккур, бироқ...

К л е о п а т р а

«Бироқ?» Ушбу сўзга йўқдир ҳеч бир тоқатим,  
 «Бироқ» сўзи ўлимидир хуш дебочанинг.  
 «Бироқ» — ҳудди зиндандаги хароб маҳбусни  
 Озод қилган зинданбонга ўхшайди. Эшит,  
 Айлантирма гапни, энди яширма мендан,  
 Борини айт, тўкиб солгин, яхши-ёмонни.  
 Озодми у? Цезарга дўст бўлгани ростми?

Ч о п а р

«Озод» деган сўзни тилга олмадим ҳали,  
 Октавия билан ҳозир қаттиқ боғланган.

К л е о п а т р а

Октавия? Хўш, нимаси ёқибди унинг?

Ч о п а р

Тўшаги.

Клеопатра

Хм... Хармиана, музлар баданим.

Чопар

Икковлари бир ёстиққа қўйишидилар бош.

Клеопатра

Худо урсин сени!

*(Чопарни уриб ағдаради.)*

Чопар

Раҳм эт!

Клеопатра

Нима дединг сен?

*(Уни дўйпослайди.)*

Йўқол бундан, ярамас қул! Йўқ эса ҳозир,  
Сочинг юлиб, кўзларингни ўйиб ташлайман!

*(Уни қаттиқ силталаиди.)*

Темир косов билан боплаб савашар сени,  
Ундан кейин паст оловда, зира-пиёзлаб  
Қовуришар сени, ҳа-ҳа.

Чопар

Тамом бўлдим-ку!

Бунда йўқдир менинг қўлим, чопарман холос.

## Клеопатра

Бу сўзларинг ёлғонлигинг айтсанг мабодо,  
 Ер-сув берай. Мартабангни оширай зумда.  
 Кек сақламай кечирайин ёлғон ғапингни.  
 Газабимни келтирдинг сен, мен эса урдим —  
 Бас, тенг бўлдик. Тортиқ қиласай сенга кўп нарса  
 Бунақасин кўрмагансан ҳатто тушингда.

## Чопар

У уйланди.

## Клеопатра

Кунинг битиб қопти, лаънати.

(Ханжарин олади.)

## Чопар

(четга)

Қочиб қолай!..

(Клеопатрага.)

Гуноҳим не? Айбим йўқ-ку ҳеч.

(Қочади.)

## Хармиана

Узингни бос, тўхта энди, шошма, маликам!  
 Наҳотки бу ишда чопар бўлса айбдор?

### Клеопатра

Уарми ҳеч чақмоқ бу хил ғуноҳкорларни?  
 Бутун Миср Нил сувига бўлсан мустагриқ!  
 Қабутарлар айлансинлар аждаҳоларга!  
 Қайтаринглар чопарни тез! Қаҳру заҳримни  
 Сочмагайман унга асло! Қайтаринглар тез!

### Хармиана

Ўтакаси ёрилди-ку.

### Клеопатра

Урмайман энди.

Хармиана чиқиб кетади.

Гар айбдор бўлсам ҳамки барига ўзим,  
 Бесҳудага қулни уриб, қийнаб ўзимни,  
 Қўлимни ҳам ҳаром қилдим.

Хармиана чопар билан кириб келади.

Киравер, қўрқма.

Қалтис ишдир шум хабарни келтирмоқ доим.  
 Хуш хабарни айтаверар кўринган одам.  
 Шум хабарни айтмаса ҳам сезилар шундай.

### Чопар

Ўз бурчимни бажардим мен.

## Клеопатра

Уйландими у?  
 Яна бир бор «ҳа» десангми, тошар ғазабим,  
 Боягидан баттар бўларди.

## Чопар

Ҳа, у уйланди.

## Клеопатра

Лаънат сенга! Бу сўзингдан қайтмайсанми ҳеч?

## Чопар

Ҳушим йўқдир ёлғонга ҳеч.

## Клеопатра

Ёлғон бўлсайди!  
 Сувга ботиб кетсин майли Мисрнинг ярми,  
 Газандалар уя қурсинунда ҳар ёққа!  
 Йўқол! Гўзал бўлсанг ҳамки оламда танҳо,  
 Менинг учун жирканч, хунук бир бедавосан.  
 Уйланганми, айт!

## Чопар

Маликам...

## Клеопатра

Уйланганми, айт!

**Ч о п а р**

Газабингни тоширганим рост, ўзингни бос,  
Итоатли бўлганимга қийнама ортиқ.  
Октаания Антонийга никоҳ бўлди-да!

**К л е о п а т р а**

Шундай ёвуз хабар билан бош сукқан одам  
Қолишарми ёвузлардан? Йўқол, тез йўқол!  
Римдан келган либосларнинг йўқдир ҳожати,  
Қурбим етмас, молинг билан қўшмозор бўлгин!  
Қоранг ўчсин!

**Ч о п а р кетади.****Х а р м и а н а**

Озроқ сабр қилгин, маликам!

**К л е о п а т р а**

Антонийни роса мақтаб, ургандим ерга  
Уша буюқ Цезарни-я.

**Х а р м и а н а**

**Жуда кўп марта.**

**К л е о п а т р а**

Мана олдим жазойимни. Кетдик. Мадор йўқ...  
Йиқиласман... Хармиана! Тез бўл, Ирада!  
Хайрият-е, ўтиб кетди. Югур, Алексас,

Тўхтатгину чопарни, сўнг Октавиянинг  
 Ҳусну кўркин, феъл-атворни, ёшии суриштири.  
 Сочин ранги қандайлигин сўрагин албат.  
 Қандай бўлса барин келиб айтасан менга.

Алексас кетади.

Айрилдим-ку мен умрбод! Иўқ, иўқ, истамам!  
 Гоҳида у туюлади мисли Горгона,  
 Гоҳи эса Марс сингари тўқар салобат.

(Мардианга )

Алексасга уқтириб айт, билсин чопардан  
 Бўйи басти қандайлигин Октавиянинг.  
 Хармиана, гапирма, бас, раҳм қил менга.  
 Қани бошланг ётогимга, тирнаманг ярам.

Кетадилар.

## 6-САҲНА

Мизен тоги этагидаги қароргоҳ.  
 Бурғулар ва ногоналар садолари остида бир тарафдан Помпей билан Менас, иккинчи тарафдан Цезарь, Антоний, Лепид, Энобарб ва Меценат навкарлари, яроқбардорлари билан кириб келадилар.

## Помпей

Гаровдаги одамларни алмашлаб олдик,  
 Жанг олдидан сўзламоққа етди фурсат ҳам.

## Цезарь

Биз ҳам асли музокара тарафдоримиз,  
 Шул боисдан йўллаб эдик анча муқаддам  
 Мактуб ила таклифларни сенга ўзимиз.

Ажаб әмас, яхши гаплар шаштинг қайтариб,  
 Қиличинги ўз қинига киритса зора.  
 Аламларинг тарқалсаю, уйни соғиниб,  
 Йўл олишса Сицилия навқиронлари,  
 Улиб кетмай бу ерларда.

### Помпей

Сўрайман сиздан,  
 Жавоб қилинг, худоларнинг ноиблари — Сиз,  
 Сиз — бу олам ҳукмдори бўлган азизлар!  
 Отам ўчи олинмасдан қолади наҳот,  
 Дўстларию ўғли унинг турганда тирик?  
 Юлий Цезарь топганди-ку ахир иложин:  
 Ул Брутга соясини рўбарў қилди,  
 Унинг учун мана сизлар олдингиз-ку ўч?  
 Нега энди рангпар Кассий ҳамда диловар,  
 Римликлардан Брут, бошқа эркесварлар ҳам  
 Юлий Цезарь бошин кесиб, Капитолийни  
 Қизил қонга бўямоққа қилдилар журъат?  
 Бир кишининг кўпчиликка бош бўлмоғини  
 Исташмади улар асло. Мен ҳам шу кўйда  
 Бор кемамни тўплаб, йифиб, юкларни ортиб,  
 Бу ғазабкор уммонни ҳам солиб ларзага,  
 Додин бериб жиноятчи ношукур Римнинг,  
 Отам ўчин олмоғим бор.

### Цезарь

Қизишма, Помпей.

### Антоний

Қўрқитмагин сен бизларни кемалар билан.  
 Денгиэда ҳам беллашмоққа кучимиз етар.  
 Қуруқликда ғоят зўрмиз, ўзингга аён.

## Помпей

Қуруқликда құдратинг-ку жуда зұр: ҳатто  
 Отам уйин ўтказдинг-ку ихтиёриңгі.  
 Уя қурмоқ одатмас-ку каккуларға, бас,  
 Сен ҳам унда яшайвергин фурсат етгүнча.

## Лепид

Бу гапларнинг ишга мутлоқ алоқаси йўқ.  
 Аввалига бизлар қилган таклифларга тез  
 Жавоб этсанг яхши бўлур.

## Цезарь

Гап ҳам шу ҳақда.

## Антоний

Елвормаймиз бизлар ҳеч вақт. Манфаатингни  
 Кўзлагину бор гапларни айтавер бир-бир.

## Цезарь

Кўнгил қурғур тусар доим анча нарсани.

## Помпей

Сизлар менга тутмоқчисиз Сицилияни,  
 Сардиния билан бирга инъом ўрнида.  
 Мен қувлайман денгиздаги қароқчиларни,  
 Бошдан-оёқ тўлдираман буғдойга Римни.  
 Шунда қилич мертиқ бўлиб, қалқон тешилмас,  
 Мақбул келса, тарқаламиз.

Цезарь, Антоний ва Лепид

(бараварига)

Ҳа, худди шундай.

Помпей

Таклифларинг дилимга хуш келгани учун  
Бу ерга бош суққанимни билиб қўйинглар.  
Марк Антоний ғазабимни келтирди бироқ.  
Үнга қилган яхшилигим юзга солсам ҳам,  
Қамайтирмай, пасайтирмай айтган бўламан.  
Билиб қўйгин, уканг сенинг Цезарга қарши  
Бош кўтарган кунларида, бечора онанг  
Сицилия тупроғида паноҳ топганди,  
Кўрган эди иззат-икром, меҳру оқибат.

Антоний

Эшитгандим буни, Помпей. Хурсандман беҳад,  
Миннатдорман, раҳмат сенга.

Помпей

Бергин қўлингни.  
Ўйламовдим сени бунда учратаман деб.

Антоний

Шарқликларнинг тўшаклари кўп юмшоқ экан.  
Мен мабодо сен туфайли қайтганимда ҳам,  
Зиён қилмай наф кўрадим — ўзимга аён.

## Цезарь

Ростин айтсам сенга, Помпей, ўзгарибсан кўп,  
Сўнгги марта дийдорингни кўргандан бери.

## Помпей

Шум тақдирнинг ажинлари из солди юзга,  
Сабабини билолмайман. Аммо қалбимни  
Қаритолмас, буни ўзим яхши биламан.

## Лепид

Учрашувдан кўп хурсандмиз.

## Помпей

Узим ҳам жуда.  
Бундан чиқди, битишуvgа келганимиз рост.  
Энди эса бор шартларни хатга тушириб,  
Муҳр босмоқ кифоядир.

## Цезарь

Галга солмай, тез.

## Помпей

Базм қуриб, бир-биримиз сийлаймиз энди,  
Ким бошлашин — ташланган чек қиласар бир ёқлик.

## Антоний

Навбат менга!

**Помпей**

Чек ташлаймиз, тұхта, Антоний.  
 Навбат сенга қачон етар бүлса ҳам, албат  
 Баб-баравар мақтагаймиз ғоят самимий,  
 Бир-биридан аъло Миср неъматларини.  
 Юлий Цезарь хўп семирмиш Мисрда энди,  
 Ҳалол намак ёққан эмиш мизожига ҳам.

**Антоний**

Кўп нарсалар эшишибсан, қойил қолдирдинг.

**Помпей**

Хафа қилмоқ хаёлимдан йироқдир сени.

**Антоний**

Иzzат-нафсга тегадиган сўзлар айтмадинг.

**Помпей**

Кўп нарсалар эшитганмиш. Айтишларича,  
 Аполлодор олиб келган елкада гўё...

**Энобарб**

Бўлди, бас қил! Олиб келса, хўш, нима бўпти?

**Помпей**

Нима олиб келган эди?

## Э н о б а р б

Цезарга атаб  
Олиб келган маликани қопига жойлаб.

## П о м п е й

Танигандай бўлдим энди. Қалай юрибсан?

## Э н о б а р б

Ёмон эмас. Бундан буён яна соз бўлур,  
Тўрт базмнинг кайф-сафосин сурамиз ҳали.

## П о м п е й

Қани, жангчи, қўлингни бер. Душман эмасман,  
Жанглардаги чиранишинг кўрганимда мен  
Минг оғарин ўқиганман жасурлигинга.

## Э н о б а р б

Сени анча мақтаганман, тонмайман бундан,  
Жуда сенга меҳрим зўрмас, рост айтсам, бироқ  
Жасоратнинг мақтовига сўз тополмайман.

## П о м п е й

Мен-чи, сенинг ростгўйлигинг учун мақтайман.  
Хозир эса кемам сари юринглар дейман.

## Ц е з а р ь, А н т о н и й в а Л е п и д

(биргаликда)

Эргашурмиз энди ёенга.

Помпей

Юринглар, кетдик.

Энобарб ва Менасдан бўлак ҳаммалари чиқиб кетишади.

Менас

(бир четга)

Помпейнинг отаси ўлса ҳам бунақа шартнома тузмаган бўларди. (Энобарбга.) Сени илгари қаердадир кўргандайман-а?

Энобарб

Денгизда бўлса керак.

Менас

Шунақага ўхшайди.

Энобарб

Сен денгиздаги ботирлигинг билан ном чиқаргансан.

Менас

Сен эса қуруқликдаги ботирлигинг билан.

Энобарб

Мақталганим яхши, албатта. Дарвоқе қуруқликда убулар қилганимдан кўз юммайман.

## Менас

Мен бўлсам — сувда.

## Энобарб

Ҳа. Шунга қарамай кўрсатган баъзи бир ишларимдан ўзим ҳам уяламан. Сен денгиз қирғинининг пирисан.

## Менас

Сен эса қуруқликдаги қароқчиликни боплайсан.

## Энобарб

Бўйин товлаш навбати энди менга келди. Қўлингни бер, Менас. Мабодо кўзларимизда ҳукм чиқариш ҳуқуқи бўлганида борми, улар оғиз-бурун ўпишаётган қўш қароқчини ҳозироқ қамаган бўларди.

## Менас

Қўллари қанчалар қонлигига қарамай ҳар бири кўринишдан фариштага ўхшайди.

## Энобарб

Чиройли жувоннинг чеҳрасига ўхшамайди ишқилиб,

**Менас**

Галингни қара-я. Хотинлар ҳусилари билан қароқчилик қилишади.

**Энобарб**

Сенлар билан күч синашсак дегандик.

**Менас**

Афсуски, энди ичкиликтозликда күч синашамиз, холос. Помпейга бугун баҳтиниң таъзиясида майшат қилиши насиб этса керак.

**Энобарб**

Энди ҳар қанча жүз ёши қылса ҳам баҳтини тирилтириб ололмайди.

**Менас**

Қаёқда дейсан. Биз, Марк Антоний бу ёққа қадам ранжида қилас, деб ўйламовдик. Унинг Клеопатрани олгани ростми?

**Энобарб**

Цезарининг синглисини Октавия деб аташади.

**Менас**

Ха. У Гай Марцеллинг хотици әди,

**Э н о б а р б**

Ҳозир Марк Антонийнинг жуфти ҳалоли.

**М е на с**

Гапларинг ростми?

**Э н о б а р б**

Бор гапни айтяпман-да.

**М е на с**

Бундан чиқди, Антоний билан Цезарь ўртасидэн қил ўтмас экан-да.

**Э н о б а р б**

Агар авлиё бўлганимда, бунақангি башорат қилишдан ўзимни тийган бўлардим.

**М е на с**

Бу никоҳда ишқдан кўра кўпроқ сиёсат борга ўхшайди.

**Э н о б а р б**

Менимча ҳам шундай. Мана кўрасан — оилавий ришталар уларнинг дўстлигини мустаҳкамлаш ўрнига

бўйинларига сиртмоқ бўлади. Октавия покиза, совуққон ва камгап жувон.

### Менас

Бунақа хотинга ким жон демайди?

### Энобарб

Марк Антоний сира ҳам унақа одаммас. У яна мисрлик маҳбубасининг ёнига боради. Ана ўшанда Октавиянинг оҳ-зори Цезарь кўнглидаги ўтни аллангалатади. Ўшанда, сенга ўзим айтганимдай, қанчалар яқин бўлишса, айрилишлари ҳам шунча оғир кўчади. Антоний ишқ лаззатини маҳбубасини қолдирган жойидан излайди. У бир мўлжал билан уйланган-ку.

### Менас

Бўлса бордир. Биз ҳам кемага борсак. Сенинг соғлиғингга ичсан дейман.

### Энобарб

Гапингга қўшиламан. Мисрдалигимизда хурмачамизни бунақага жуда ўргатиб олувдик.

### Менас

Бўлмаса кетдик.

Кетадилар.

## 7-САҲНА

Мизен буруни яқчидаги Помпей кемасининг борти. Мусиқа. Бир неча хизматкорлар шароб ва ноз-неъматлар кўтариб кирадилар.

### Биринчи хизматкор

Бу ёққа келишяпти. Манави баҳайбат эманларнинг илдизлари аранг тутиб турибди. Сал шамол бўлса борми — қулашлари аниқ.

### Иккинчи хизматкор

Лепид бўлса қисқичбақадай қизариб кетибди.

### Биринчи хизматкор

Хозир ҳаммалари ўшанинг қорнига қуишияпти.

### Иккинчи хизматкор

Улардан бири иккинчисига оғирроқ гап қилса борми, Лепид: «Етар бас!» деб қичқириб, йўқ ғалвани қўзғатмоқчи бўлади, ўзи эса май оташида ёняпти.

### Биринчи хизматкор

Уларни яраштиряпти-ю, ҳеч оёқда туролмаяпти.

### Иккинчи хизматкор

Қатта одамлар даврасига суқилишга ҳаққинги бўлмаса, ана шунаقا кўйга тушасан. Ўзинг кўтаролмаган

зилдай найзадан сенга нима наф? Ингичка хивичдан ҳам фойда чиқмагандай бир гап-да.

### Биринчи хизматкор

Манаман деганларнинг даврасига суқилсангу ўзинг ҳеч балога арзимасанг, башарани хунук кўрсатадиган кўзсиз тешикнинг ўзи бўласан қоласан.

Бургулар чалинади. Цезарь, Антоний, Помпей, Лепид, Агріппа, Меценат, Энобарб, Менас ва бошқа саркардалар киришади.

### Антоний

Мисрда бор шундай одат, ҳар бир эҳромда  
Нил сувини ўлчайдиган белги-селги бор.  
Сув мабодо баланд бўлса — ҳосил мўллиги,  
Акс ҳолда, қургоқчилик чиқар авжига.  
Сув қуригач, деҳқон ташлар лойқага донни,  
Ундан кейин ҳосил пишиб, ўрим бошланар.

### Лепид

Сизларнинг ўша томонларингизда ғалати газандалар бўлади, деб эшитувдим.

### Антоний

Бўлади, Лепид.

### Лепид

Ўша газандалар Миср ботқоқларида ўзларини Миср офтобига солиб ётишармиш. Мана, масалан, тимсоҳ.

## Антоний

Тӯри.

## Помпей

(*Lepidgə*)

Үтири. Қани ол. Лепиднинг саломатлигига!

## Лепид

Мен ўзим унчаликмас-ку... Ҳалиям тура оламан.

## Энобарб

Тўрт оёқлаб, дегин.

## Лепид

Ҳа, мен чиндан ҳам Птоломиднинг ўша Ҷхромлари ажойиблигини эшитгандим. Йўқ, йўқ, тортишманлар, буни нақ ўзим эшитганман.

## Менас

(*Pompeyga, sekinqina*)

Помпей!

## Помпей

(*Menasga, oqista*)

Нима дейсан? Аста қулоғимга айт.

Менас

Сал четроққа чиқсак, девдим. Гапим бор сенга.  
Бор-йўғи икки оғиз.

Помпей

Шошилма. Ҳозир.

(*Овозини баландлатиб.*)

Қани, Лепид соғлиғига ичайлик, дўстлар!

Лепид

Қандоқ буюм ўзи тимсоҳ деганлари, а?

Антоний

Кўринишидан худди ўзига ўхшайди. Узунлиги ҳам ўзининг узунлиги, эни ҳам ўзининг эни. Ўз оёқларида юради. Нима топса емиши ўша бўлади. Ўлса ҳидланади, жони бошқа жониворга ўтади.

Лепид

Туси қанақа?

Антоний

Ўзининг туси.

Лепид

Фалати газанда экан.

Антоний

Нимасини айтасан. Кўз ёшлари эса ҳўл бўлади.

Цезарь

Бунаقا таърифдан қониқармикин?

Антоний

Қорнига Помпей қўйган шаробларни қўшсак борми,  
бу таъриф қаноатлантирас дейман. Қаноатлантирмаса  
чинакам очопатнинг ўзгинаси бўлади.

Помпей

(Менасга, секин)

Тинч қўй энди! Нима дейсан? Нари борсанг-чи!  
Сенга ахир айтмоқдаман!

(Баланд овозда.)

Май косам қани?

Менас

(секин)

Шу жойингдан тез турсангү чиқсанг бир четга.  
Е муносиб эмасманми, эшитсанг гадим?

Помпей

(оҳиста)

Жинни-пинни бўлганмисан? Нима гап ўзи?

Помпей билан Менас бир четга ўтишади.

Менас

(секингина)

Тақдирингга содиқ бўлиб келганман доим.

Помпей

(оҳиста)

Садоқат-ла хизмат қилдинг. Гапдан тўхтама!

(Овозини баландлатиб.)

Хўш, дўстларим, нега жимиб қолдинглар?

Антоний

Лепид,

Ухшаб қопсан юмшоқ қумга ботган одамга,

Қадди-бастинг тўғри ушлаб турсанг-чи, дўстим!

Менас

(секингина)

Истайсанми сен оламга ҳоким бўлмоқни?

**Помпей**

(оҳиста)

Нима?

**Менас**

Ҳоким бўласанми оламга, дейман.

**Помпей**

(оҳиста)

Қандай қилиб юз берар бу?

**Менас**

(секингина)

Рози бўлсанг бас!

Гарчи ўзим бир чақага арзимасам ҳам,  
Сенга олам ҳадя этай.

**Помпей**

(секин)

Кайфинг йўқми, а?

**Менас**

(оҳиста)

Қосаларга ҳаттоқи лаб теккизганим йўқ.  
Истасанг бас — бўлажаксан Ер Юпитери.

Уммонлару тепадаги осмондан бўлак  
Ер-сувларинг чегаранинг нелигин билмас.

**Помпей**

(секин)

Қандай қилиб бари, бари менини бўлар?

**Менас**

(оҳиста)

Триумвирлар жам бўлишган кемангда шу чоғ,  
Бутун олам учовининг қўлига қарам.  
Мен арқонни қирқаман тез. Қейин уммонга  
Чиққанида учовини зумда бўғизлаб  
Ташлагаймиз. Сўнг оламнинг султони ўзинг.

**Помпей**

(секингина)

Ёвузликдир иш қўймоқлик ими-жимида,—  
Менинг учун доим шундоқ. Сен учун эса  
Ўз хўжангга хизмат қўймоқ — туб ўзга эмас.  
Номусимни ўз нафсимга алмашмайман ҳеч,  
Ишни расво қўлганингни ўз тилингдан кўр.  
Содир бўлган ишни кўрсам маъқуллар эдим;  
Қоралайман аммо, билгил, ёвуз ниятни.  
Бу гапларни эсдан чиқар. Май ич.

**Менас**

(чеккага)

Бас, етар.

Сўнаётган юлдузнинг мен әтагин тутмай.

Кимки бирор ишни кўзлаб, эплай олмаса,  
У ношудга қиё боқмас қайтиб омад ҳам.

### Помпей

Лепид учун сипқорайлик, дўстлар, яна бир!

### Антоний

Соҳил томон кузатмоқнинг вақти ҳам етди.  
Лепид учун алёрни ҳам айтаман ўзим.

### Энобарб

Ичаман, сен учун, Менас.

### Менас

Дўстим, сен учун.

### Помпей

Тўлдириб қуй.

### Энобарб

(Лепидни кўтариб бораётган қулни кўрсатиб.)

Менас, қара, роса кучли экан!

### Менас

Не бўти?

**Э н о б а р б**

Бу оламнинг учдан бирин опти елкага.

**М е на с**

Учдан бири кайфда экан. Агар ҳаммаси —  
Маст бўлганда,— гандираклар эди эҳтимол,

**Э н о б а р б**

Гандираклар, бу тайин гап — ўзинг ҳам оп тур.

**М е на с**

Қани майли битта-битта олайлик, дўстим.

**П о м п е й**

Бироқ, айтсам! Искандария базмларига  
Етмоғимиз кўп қийиндир.

**А н т о н и й**

Унча узоқмас.  
Қани энди, бир олайлик. Омон бўл, Цезарь.

**Ц е з а р ь**

Кечир мени, ичавериб гангиди бошлар,  
Бу дунёда бундан оғир иш йўқдир дейман.

**А н т о н и й**

Ушбу лаҳза амри шундоқ. Бўлак чоранг йўқ,

## Цезарь

Үшал лаҳза қилса эди менга итоат,  
 Тўрт-беш куннинг насибасин тиқиширгандан,  
 Тўрт-беш кунлаб оч юрмоқни кўардим афзal.

## Энобарб

(Антонийга)

Мисрликлар удумини сақлаган ҳолда  
 Шу базмнинг интиҳоси шарафига бир  
 Ерии депсиб рақсга тушсак.

## Помпей

Зўр гап бўлади!

## Антоний

Қани, тез қўл ушлашинглар! Ҳа, бўлинглар! Тез!  
 Ақлу ҳушни банд айлаган кайфлар тарқамай,  
 Ўйин бошлаб чиқажакмиз роса хумордан.

## Энобарб

Қўл ушлашиб, қани тезда ясанглар давра  
 Созандалар тушингизлар жазавага тез!  
 Худди шундоқ. Шундоқ туринг. Бошла, болажон!  
 Бизлар эса нақоратни оламиз авжда.  
 Овозларни аямасдан айтайлик қўшиқ!

Музика. Энобарб даврага бошчилик қилади.

### Құшиқ

Май худоси, ҳой Бохус,  
 Сархуш бўлиб шод-хандон,  
 Юракларни  
 Маҳкам эт.  
 Мусибатларни  
 Кам эт.

Сархуш бўлиб шод-хандон,  
 Тўлиб-тошсин бу жаҳон.  
 Тўлиб-тошсин бу жаҳон!

### Цезарь

Етар дейман?— Помпей, тунинг ўтсин хайрли!—  
 Рухсат бергил, қайиноғам, қўяй кузатиб.  
 Манишат деб хижолатмиз виждан олдида,  
 Шароблардан юзлар ёнар. Бормасак бўлмас.  
 Шундайин зўр. Энобарб ҳам беролмабди дош,  
 Ўзимнинг ҳам тилим сира айланмай қопти.  
 Қайф дегани ҳаммамизни боплабди роса.  
 Гина-кудрат вақти эмас. Яхши қолинглар.  
 Қўлингни бер, ҳой Антоний!

### Помпей

Энди соҳилда  
 Яна шундай жам бўламиз

### Антоний

Албатта! Қўл чўз!

### Помпей

Ота ҳовлим босиб олган эдинг, Антоний,  
Биз барибир эндиликда жонажон дўстмиз.  
Қайиққа туш.

### Энобарб

Хой секинроқ, ҳушёр бўлинглар.

Энобарб ва Менасдан бўлак ҳаммалари кетишади.

Мен-чи шунда қолажакман.

### Менас

Қаютам — сенга.  
Ноғоралар, бурғу найлар янграсин роса!  
Буюк мардлар билан бўлган хайр-маъзурни  
Эшитсин-да, шу уммоннинг худоси ҳам бир.  
Битирманглар қулоқларни, ҳой жин ургурлар!

Бурғулар ва ноғоралар чалинади.

### Энобарб

Қани энди, қалпоқларни отинг осмонга!

### Менас

Э-ҳой! Кетдик.

Кетадилар.

## УЧИНЧИ ПАРДА

### 1-САҲНА

Суриядаги паст текислик.

Вентидий, Силий ва бошқа римлик саркардадар қўшиллари билан кирадилар. Олдиндагилар парфиянликлар шаҳзодаси Пакорининг жасадини кўтариб келадилар.

### Вентидий

Тор-мор бўлди Парфиядек жанговар ўлка.  
Улган Красс ўчин ол, деб буюрган тақдир.  
Парфиянинг шаҳзодаси не ҳолдалигин  
Ҳар бир жангчи ўтаётуб кўриб қўйсинг бир.  
Красс ўчин шу ўғлингдан олдик, ҳой Урод.

### Силий

Сен ушлаган қилич ҳали совугани йўқ,  
Парфиянинг қони туарар унда буғланиб,  
Шундай ҳолда совумасдан қочқинларни қув,  
Мидиядан ҳамда дарё оралиғидан.  
Ана шунда Антоний ҳам эъзозлар жуда,  
Кўмиб ташлар инъомларга сени.

## Вентидий

Иўқ, Силий!

Етар шунча жанг қилганим. Билиб қўй шуни,  
Тобе одам шов-шувлардан йироқ турса соз.  
Саркарда йўқ маҳалида шуҳрат қозонсанг,  
Аҳволингга маймун йиглар, ундан маъқул саҳв.  
Цезарь билан Антоний ҳам жуда кўп маҳал  
Қозонгандар ўзга қилич ишлатиб зафар.  
Ўтмишдошим Соссий аввал Сурия келиб,  
Жангларда кўп баҳодирлик кўрсатганида,  
Тошган эди Антонийнинг қаҳру ғазаби.  
Ким қолдирса саркардасин пича орқада,  
Уша одам саркардалар шоҳи саналур.  
Шу важдан ҳам мағлубият зафардан кўра,  
Нафли бўлар саркардадан ўтмоқчи бўлган —  
Ҳарб кишисин ўпкасини босиб қўйишга.  
Антонийнинг фойдасига кўп ишлар қилсан,  
Фашини тез келтирмоғим турган гап, аён.  
Унда барча зафарларим чиқар чиппакка.

## Силий

Сен, Вентидий, исботини қўйдинг ўрнига  
Аскар нархи қиличга тенг, баробарлигин.  
Антонийга нималарни ёзасан энди?

## Вентидий

Ёзадиган гапим шундоқ. Антоний зўрдир,  
Руҳлантириб номи билан баҳш этди зафар.  
Рози қилиб олиб келган легионлари  
Бургут янглиғ ботирлари бошчилигига  
Парфиянинг аскарларин қилди тору мор.

**С и л и й**

Қайда ҳозир?

**В е н т и д и й**

У Афина томонга борар.

Афинага Антонийдан олдин етмоқ-чун,  
Қанча халал берса ҳамки ўлжаларимиз,  
Тез фурсатда сафар отин сурмасак бўлмас.  
Шундай қилиб, дўстлар, қани, чиқайлик йўлга!

Қетадилар.

**2-САҲНА**

Рим. Цезарь уйининг айвони.  
Икки томондан Агриппа билан Энобарб кириб келишади.

**А г р и п п а**

Куёв билан қайнаганинг хўшлаши қалай?

**Э н о б а р б**

Жавоб бераб Помпейга, тез уч олампаноҳ  
Мухр билан маҳкамлашди ўшал битимни.  
Октавия хўнграмоқда ҳижрон олдидан,  
Цезарь хафа, Лепид эса ўшандан бери  
Қайт қиласмиш, келолмасмиш ўзига сира.  
Бу гапларнинг барин менга билдириди Менас.

**А г р и п п а**

Зўр одам-да Лепид!

Э н о б а р б

Танҳо, монанди йўқ ҳеч!  
Цезарь деса, аямасдан жонин беради.

А г р и п п а

Антонийни ҳурматлашин бир кўрсанг эди!

Э н о б а р б

Хўш, Цезар-чи! «Ер юзининг Юпитери-ку!»

А г р и п п а

«Юпитерлар султонидир бизнинг Антоний!»

Э н о б а р б

«О Цезарь! О! Тенги йўқдир ушбу оламда!»  
«Марк Антоний! Афсонавий қушлар Ҳумоси!»

Э н о б а р б

«У — Цезардир!— демоқдан ҳам борми зўр таъриф!»

А г р и п п а

Икковига таърифни у тақсимлар бир хил.

Э н о б а р б

Кўпроғини Цезарь олар. «О, Марк Антоний!»--  
Антонийга меҳри буюқ, бундай меҳрни  
Хонаңдаю мусаввиру хотиқ, мунажжим,  
Куйлай олмас, чиза олмас, сўзлай олмас ҳеч,

Аммо Цезарь қаршисида йўқотар ўзин,  
Забони ҳам келмас сўзга.

**А г р и п п а**

Жуда хуш кўрар.

**Э н о б а р б**

Лепид эса мисли қўнғиз, улар қанотдир.

Бурғу овози  
Бас! Омон бўл, олижаноб дўстим Агриппа!

**А г р и п п а**

Оқ йўл сенга, мустаҳиқ мард, дўстим Энобарб.

Чеккага чиқиб кетишади.  
Цезарь, Антоний, Лепид ва Октавия кириб келишади.

**А н т о н и й**

Шу ергача кузатдинг, бас, қолавер шунда.

**Ц е з а р ь**

Юрагимнинг бир парчасин олиб кетяпсан.  
Хафа қилма, яхши қара.— Синглим, ўтинчим,  
Антонийга шундай хотин бўлки, оқибат  
Ваъдалару умидларим оқлансин тамом.  
Дўстлигимиз зўрлигини кечаю кундуз  
Хаёлингдан кеткизмагин, Антоний, сира;  
Йўл қўйма ҳеч, дўстлигимиз кўрмасин раҳна.  
Ғубор қўнмай порлаб турсин тиниқ, покиза,

Дўстлигимиз устунидан тўқдир кўнглимиз.  
Доғ туширмай асрасак бас.

А н т о н и й

Менга ишонмай  
Жуда хафа қилмоқдасан.

Ц е з а р ь  
Айтдим борини.

А н т о н и й

Майли, роса титкилайвер, сенда ихтиёр,  
Ваҳимангга, баҳонангга асос топилмас.  
Худолар ўз паноҳида асрасин сени,  
Римликлар ҳам кечакундуз қилсиналар дуо.  
Бизга энди ижозат бер, тушайлик йўлга.

Ц е з а р ь

Хайр, синглим, яхши боргин, бўл соғ-саломат!  
Эзгулик кўр, ғам-ғуссадан тургии йироқроқ.  
Азиз бошинг омон бўлсин! Оқ йўл, азизам!

О к т а в и я

Оғажоним!..

А н т о н и й

Севгимизниң баҳорида бу кўз ёшларинг  
Мисли апрель ёмғиридир. Қўлга ол ўзни.

О к т а в и я

(Цезарга)

Кўзинг ташлаб юр куёвинг қўналғасига,  
Яна бирор кор-ҳол бўлиб...

Цезарь

«Яна»си нима?

Октавия

Айта қолай қулогиннга.

Антоний

Тили шунаقا,  
Тили сира бўйсунмагай қалбин сасига,  
Қалби эса не учундир забондан маҳрум.  
Фақат шундай кўйга тушар оққушнинг пати,  
Ихтиёри тўлқинларга ўтган маҳалда.

Энобарб

(*Agrrippaga, oχista*)

Кўз ёш қилиб қолмасмикин, дейман, Цезарь ҳам?

Агріппа

(*Энобарбга эгилганича*)

Тиришмоқда пешонаси.

Энобарб

(*Agrrippaga, sekin*)

Эҳ, афсус, афсус!  
Пешонага доғ түнса гар бўлолмас ҳусн.  
Инсон тугул ҳатто оддий тўбичоққа ҳам.

## А г р и п п а

(Энобарбга, оҳиста)

Антоний ҳам Юлий Цезарь ҳалок бўлганда  
Сал қолганди ҳўнграб йиглаб, дод солишига.  
Филиппда ҳам Брут учун тўкканди кўз ёш.

## Э н о б а р б

(*Agrippa, секин*)

Уша йили бўлган эди Антоний тумов,  
Душманларин қириб, йиглаб улар ҳолига.  
Мен йигласам — шунда ионон кўз ёшларимга.

## Ц е з а р ь

Тўқ қилавер кўнглингни сен, меҳрибон синглим,  
Канда қилмай хат жўнатиб тураман ўзим.  
Сени ташлаб қўймайман, ҳа.

## А н т о н и й

Бўлди қил, Цезарь,  
Октавия севгисига кўпроқ ким молик —  
Бўлишини кўражакмиз. Қетар олдидан  
Бағримизга босайлик-чи бир-биrimizni.  
Сўнгра эса худоларга топшириб сени,  
Аста йўлга чиқай энди...

## Ц е з а р ь

Хуш бор. Бахтли бўл!

**Л е п и д**

Коинотнинг бор нурафшон ёритгичлари  
Йўлларингни ёруғ қилсин.

**Ц е з а р ь**

(*Октавияни ўтиб*)

Яхши бор!

**А н т о н и й**

Хайр!

Бурғулар чалиниади. Ҳаммалари чиқиб кетишади.

### **3-САҲНА**

Искандария. Ҳовлидаги бўлма.

Клеопатра, Хармиана, Ирада ва Алексас кириб келишади.

**Клеопатра**

Хўш, қаерда чопар?

**Алексас**

Чопар киргани қўрқар.

**Клеопатра**

Бўлмагур гап!

**Ч о п а р** киради.

Кир, чўчима сира.

**Алексас**

Маликам!

Ғазаблансанг боқа олмас кўзингга асло,  
Яҳудийлар рўдапоси Ирод ҳаттоки.

**Клеопатра**

Буйруқларим бажо этмоқ учун ҳаттоки,  
Бўлса борми яқинроқда бизнинг Антоний,  
Нақ калладан айриларди Ирод рўдапо.

(Чопарга.)

Яқин кел-чи.

**Чопар**

Муруватли маликам, соғ бўл!

**Клеопатра**

Қани, менга сўзлаб бер-чи Октавиядан:  
Тузук-қуруқ кўролдингми яқинроқдан ҳеч?

**Чопар**

Ҳа, маликам.

**Клеопатра**

Қайда ўзи?

**Ч о п а р**

Шаҳри Римда у,  
Яқинроқдан кўрмоқ менга бўлмади насиб,  
Ҳамроҳ эди эри билан Цезарь ёнида.

**К л е о п а т р а**

Бўйи мендан пастми, баланд?

**Ч о п а р**

Баландмас, пастроқ.

**К л е о п а т р а**

Овози-чи, жарангдорми ёки заифми?

**Ч о п а р**

Овози ҳам аранг чиқар чийиллаб...

**К л е о п а т р а**

Ҳа, ҳа...  
Антонийнинг севгиси ҳам чўзилмас кўпга...

**Х а р м и а н а**

Уни севиш? Бу мутлақо бўлмагур бир гап!

**К л е о п а т р а**

Мен ҳам шундай фикрдамаң. Чийилдоқ овоз

Ушал пакар хотин албат қолар чеккада.  
Бундай, қадам босишида салобат борми?

### Ч о п а р

Оёгини аранг судраб босганидан у  
Юряптими ёки йўқми — бўлмайди билиб.  
Кўрган одам жон борлигин билмайди унда.  
Аёл эмас, бир ҳайкалнинг ўзи, чамамда.

### К л е о п а т р а

Роса олдинг, ростми гапинг?

### Ч о п а р

Кўзларим ўткир.

### Х а р м и а на

Чопар сезгир, бир чўқишида қочирап дейман  
Ҳар қандайин мисрликни.

### К л е о п а т р а

Кўриб турибман,  
Улгудайин сезгир экан. Қурғур чопарнинг  
Гапларида маъни бор-да.

### Х а р м и а на

Бўлганда қандай.

### К л е о п а т р а

Неча ёшга борганини айтолоссанми?

**Ч о п а р**

Улгурибди эри ўлиб бева қолишга.

**К л е о п а т р а**

Эри ўлиб? Эшитдингми, Хармиана? А?

**Ч о п а р**

Үттизларга бориб қолган ёши наздимда.

**К л е о п а т р а**

Юзи қалай, чўзинчоқми ёки юмалоқ?

**Ч о п а р**

Юзи шундай ялпайганки, айнийди кўнгил.

**К л е о п а т р а**

Бундай хунук хотинларда бўлмайди ақл,  
Сочи қандай? Рангига ҳеч тушдими кўзинг?

**Ч о п а р**

Сочи қора. Пешонаси ўлгудай энсиз.

**К л е о п а т р а**

Мана олтин, олавергин. Қўй, бўлма хафа,  
Ўтган сафар қаҳру газаб қилганимга ҳеч.  
Калланг дуруст ишлар экан. Тараддудинг кўр,

Қайтараман яна сени келган йўлингга.  
Хатни ёзиб қўяй.

Ч о п а р кетади.

Х а р м и а н а

Жуда виждонли экан.

К л е о п а т р а

Ҳа, сен ҳақсан. Афсусдаман, олдинги сафар  
Бераҳмлик қилдим унга. Октавиянинг  
Арзимаган нарсалигин кўриб турибман.

Х а р м и а н а

Арзимайди ҳеч нарсага.

К л е о п а т р а

Ўткир кўз чопар  
Ажратаркан буюкликни сохтадан тезда.

Х а р м и а н а

Бўлмаса-чи! Чопар сенинг қўлингга ахир  
Куни кеча келган эмас.

К л е о п а т р а

Ҳой, Хармиана,  
Яна баъзи нарсаларни билсайдим девдим.  
Бўпти, майли, юборарсан чопарни кейин,  
Яхши бўлар ишлар дейман.

Х а р м и а н а

Ишонавер, ҳа.

## 4-САҲНА

Афина. Антоний уйидаги бўлма.

Антоний билан Октавия кириб келишади.

### Антоний

Эътиrozга, Октавия, ўрин йўқ буткул.  
 Кечирардим жоним билан, ушбу гапингга  
 Кўшган ҳолда бошқа талай нарсаларни ҳам.  
 Аканг Помпей билан яна бошлади уруш,  
 Васият ҳам ёзиб, ўқиб бермиш барчага.  
 Менинг номим айтилибди ўшандада зўрға,  
 Хизматларим тўғри санаш керак бўлганда,  
 Жуда қисқа тўхталибди мақтовларга ҳам.  
 Одам йигиб ваъзхонликлар қилганда эса,  
 Элу юртга қилган барча яхшилик билан,  
 Кўп шарафли ишларимни таъриф этганда,  
 Улганининг кунидан у олармиш тилга.

### Октавия

Естиқдошим, ишонмагин барига бирдай,  
 Ишонсанг ҳам ҳаммасига, чиқмасин жаҳлинг,  
 Ўртангизда бирор ғалва чиққудай бўлса  
 Икки хундор душманни ҳам дуо қилгувчи  
 Оламдаги бадбаҳт хотин бўламан ўзим.  
 Ибодатим хуш келмайди худоларга ҳам,  
 «Мадад беринг, қўллангизлар эримни сизлар!»—  
 Десам, сўнгра аксин қилиб ёлворсам яна:  
 «Мадад беринг, қўллангизлар аками!» ахир —  
 Муруватли худоларни кулдираман-ку,  
 Қайси биринг енгиб чиқсанг — менга мусибат.  
 Икки тараф олишганда бўлма ўртада.

## Антоний

Окта́вия, илтимосим, муҳаббатингни  
 Бағишилагин аъло кўрсанг қай биримизни.  
 Номусимдан айрилганим — ўлганим ўша,  
 Эринг бўлиб қололмайман мутлоқ номуссиз.  
 Ундан кўра сендан жудо бўлганим беҳроқ,  
 Бизни агар яраштириш бўлса кўнглингда,  
 Уриниб кўр. Эндиликда ҳозирлик кўрай  
 Аканг юзин қаро қиласа ўшал урушга.  
 Ҳаракатинг қиласавергин, қолмагин доғда,  
 Орзуларинг чиқаверсин албат рўёбга.

## Окта́вия

Миннатдорман. Ҳаммадан ҳам қудратли бўлган  
 Юпитер ҳам мадад берсин мен нотавонга.  
 Яраштирай икки жондош, қондошларимни,  
 Қилсангизлар борми уруш — дарз кетар замин,  
 Ҳамда уни тўлдиражак тоғ-тоғ мурдалар.

## Антоний

Заҳрингни соч бу ғалванинг сабабкорига,  
 Тинч қўймагин, уришавер, таюбини торт.  
 Шу ишдаги гуноҳимиз бўлса баробар  
 Олар эдинг меҳрингни ҳам бўлиб теппа-тенг.  
 Отланавер. Шерикликка танла одамлар,  
 Ҳа, кўнглингга ҳима келса, қайтарма асло.

*Кетадилар,*

## 5-САҲНА

Уша жой. Бошқа бўлма.  
Энобарб билан Эрос икки томондан кириб келишади.

**Энобарб**

Хўш, Эрос, қандай янги гаплар бор оламда?

**Эрос**

Аломат янгиликлар.

**Энобарб**

Қанақа экан?

**Эрос**

Цезарь билан Лепид Помпейга қайтадан уруш бошлишибди.

**Энобарб**

Бу эскирган янгилик. Ким кимни енгибди?

**Эрос**

Цезарь Помпейни Лепид ёрдамида енгувди, энди уни ўзига тенг кўрмай шон-шуҳратдан маҳрум қилмоқчи. Бунинг устига Лепид унинг Помпейга бир замонларда ёзган эски хатларини рўкач қилиб, душман билан тилинг бир, деб айбламоқда. Хуллас, триумвир шўрлик ҳозир ҳамоқда ётибди, ўлим то халос этгунча ўшандай ётаверадиганга ўхшайди.

**Энобарб**

Икки коми аждаҳо бор энди оламда.  
Тўймасларга берсанг ҳамки ҳар қанча озиқ,  
Бир-бирини гажир, қўймас, тинчимас сира.  
Қайда ҳозир Антоний, а?

## Э р о с

Боғда юрар у,  
Босиб юрар хўп қуриган ўтларни бир-бир.  
«Аҳмоқ Лепид» деб тинимсиз бақирганича,  
Үч олмоқчи ҳозир Помпей қотилларидан.

## Э н о б а р б

Адади йўқ денгизчилар сафарга тайёр...

## Э р о с

Босмоққа шай Италияда Цезарни. Асли  
Олиб кетмоқ учун келдим сени, Антоний.  
Кейинроқ ҳам айтовраман янги гапларни.

## Э н о б а р б

Тушмайдими менга деса осмон узилиб,  
Қани, бошла Антонийга.

## Э р о с

Кетдик бўлмаса.  
Кетадилар.

**6-САҲНА**

Рим. Цезарь уйидаги бўлма.  
Цезарь, Агріппа ва Меценат кириб келишади.  
Октавия мулозимлари билан кириб келади.

## Ц е з а р ь

Римни мазах қилмоқ ҳозир асосий иши.  
Одамларнинг айтишича, Искандарияда

Кумушсимон тепаликда Антоний билан  
 Клеопатра ўтиармиш тахти тиллода.  
 Цезарион ўйнар эмиш пойиларида  
 (Менга ота ҳисобланмиш одамнинг ўғли)  
 Ҳамда яна анча-мунча зурриётлари.  
 Миср тугул Фаластину, Лидия, Қибрис —  
 Үлкаларни бошқаришни қўш-қўллаб бутун  
 Маҳбубага топширганмиш бизнинг Антоний.

### М е ц е н а т

Халойиққа билдиришиби буларининг барин?

### Ц е з а р ь

Айтганда ҳам нақ минбардан туриб айтибди.  
 Яна икки фарзандлари шаҳаншоҳ эмиш;  
 Арманилар, парфиялик, мидияликларга  
 Ҳоким қилиб тайинлабди Искандарини.  
 Птоломей деганига айламиш тортиқ  
 Сурияю, Киликия, Финикияни.  
 Клеопатра ўшал куни кўринмиш элга  
 Изиданинг энг муборак, зўр либосида,  
 Бир мартамас, кўринибди жуда кўп марта.

### М е ц е н а т

Рим аҳлини огоҳ этмоқ лозимдир бундан.

### А г р и п п а

Кўпчиликнинг ҳафсаласи шир эди ундан,  
 Ҳалқ ҳам юзин чирт ўгирса ажаб эмас ҳеч.

## Цезарь

Халқ билади; Антонийнинг сенатга ёзган  
Айбнома рўйхати ҳам келгандир етиб.

## Агриппа

Кимни айблар Антоний? А?

## Цезарь

Албатта мени,  
Тортиб олиб Сицилияни Помпей қўлидан  
Узатмабман Антонийга унинг ҳаққини.  
Қарзга берган кемаларин олмабди қайтиб,  
Ва ниҳоят айбламоқда Лепид жўнидан.  
Триумвирлик мартабаси қўлидан кетиб,  
Мол-мулкидан айрилгани ёқмабди унга.

## Агриппа

Жавоб бермоқ лозим эди барига, Цезарь.

## Цезарь

Жавоб бордир, чопар учиб бормоқда йўлда,  
Мен хатимда ёздим Лепид бераҳмлигин;  
Мартабасин суиистеъмол қилгани учун  
Ҳайдалганин айтдим. Олар Антоний албат,  
Ўлжа бўлган мол-мулклардан ўз улушкини.  
Узи эса босиб олган арманлар элин  
Ҳамда ўзга диёллардан берсин тегишим.

## Меценат

Антонийдан ён беришни кутмагин сира.

## Цезарь

Биз ҳам унда бўш келмасдан тураверамиз.

Октавия мулозимлари билан кириб келади.

## Октавия

Салом сенга, акажоним ва ҳукмдорим!

## Цезарь

Эри ташлаб кетиб қолган сенмисан, синглим?

## Октавия

Мени бундай атамоққа йўқдир сабабинг.

## Цезарь

Нега энди билдирилмасдан писиб келдинг сен?  
 Наҳот Цезарь синглисига шу иш муносиб?  
 Триумвир жуфтига-я? Ахир авваллар  
 Доим қўшин кузатарди, келмасдан олдин  
 Хабар бериб билдириарди кишина булпорлар;  
 Шоҳларига чиқиб олган бекорчилардан  
 Эгиларди дараҳтлар ҳам беролмайин дош.  
 Бамисоли еру кўкни тутиб кетарди  
 Карвондаги туёқлардан кўтарилиган чанг.  
 Ўзинг эса оддий авом, фуқаро каби  
 Халқ хоҳишин назар-писанд қилмаган ҳолда  
 Даранг-дурунг қилмай тўғри кславерибсан,  
 Меҳр гули эътибордан қолса тез сўлар,  
 Буни эсда тутмаганинг ҳоли ҳам начор.  
 Қуруқликда эмас, балки денгизларда ҳам  
 Чиқар эдим сени қутлаб истиқболингга,  
 Ҳар қадаминг олқишлиарга кўмиб ташлардик.

## Октавия

Үзим шуни истовдим-да, меҳрибон акам,  
Буни менга бирор мажбур қилгани ҳам йўқ.  
Эрим эса, билганидан жанг бошлишингни  
Ҳасратларин бир-бир менга айлади баён.  
Ижозат бер, Римга қайтай,— дедим унга мен,  
У ҳам кўнди илтижоли бу ўтинчимга.

## Цезарь

Кўнглин бўлиб, майшатдан турсанг айириб,  
Жон-жон дея бунга кўнмай бўларми ахир.

## Октавия

Уидай гапни айтма, ака.

## Цезарь

Сезиб юрибман.  
Ишларидан хабарим бор, турибди етиб.  
Қаерда у ҳозир?

## Октавия

Ака, Афинада у.

## Цезарь

Тағин сени алдабди у! Клеопатра  
Аллақачон олган эмиш Мисрга чорлаб.  
Бор давлатин тутган эмиш ўшал расвога.  
Энди эса урушмоқни кўзлаганидан

Кун чиқарнинг подшоларин қипти жамулжам:  
 Ливиянинг подшоҳи Бокҳ ҳам ёнида;  
 Фракияликлар шоҳи — Адаллас; араб --  
 Шоҳи Малиҳ; подшойи Пафлагония --  
 Филадельф, шоҳ Ирод, яна Понтия шоҳи,  
 Каппадокия султони Архелай билан  
 Комагенлар ҳукмдори бўлмиш Митридат;  
 Мидиянинг шоҳи — Аминт; Ликаония —  
 Подшоси Полемон бор, яна қанчаси...

### Окта в и я

Шўрим қурсин! Қалбимни тенг иккига бўлиб,  
 Душман бўлган бу дўстларга бағишлар эдим.

### Цезарь

Хуш келибсан, ўзинг ёзган ўшал мактублар  
 Эринг билан ғаразимга бўлганди тўсиқ.  
 Энди бизга таҳдид қилиб, сени-чи алдаб,  
 Уртадаги душманликни айлади равшан.  
 Матонатни қўлдан берма. Тортишмагин ҳам,  
 Оқибатда ҳарна ишлар бўлар муқаррар.  
 Кейин нима бўлишини қўйиб беравер  
 Тақдир азал иродасин ўзгинасига.  
 Оламдаги бор нарсадан менга аълосан.  
 Эринг эса мана сени шармисор этди.  
 Унинг энди жазосини бермоққа бизнинг,  
 Кўнглимизга ғазаб солди худолар. Юпан,  
 Келганингдан ҳамма хурсанд.

### Агріппа

Шундай, маликам,

### М е ц е н а т

Хуш келибсиз. Сизни кўриб Рим аҳли хурсанд.  
 Юракларнинг меҳри қўри сизга аталган.  
 Faқатгина бетамизнинг, Марк Антонийнинг  
 Бошигача гуноҳларга ботгани етмай,  
 Сизни ҳайдаб ғарга бермиш ҳокимиятни,  
 Дунёга ўт қўядиган расво хотинга.

### О к т а в и я

Ростмикин-а шу гап, aka?

### Ц е з а р ь

Афсус, бари ҳақ.  
 Хуш келибсан, сингилгинам. Faқат илтимос,  
 Бардошли бўл, қаноатга зўр бер, бўшашма.

Кетадилар.

### 7-САҲНА

Акциум бурни ёнидаги Антоний қўналғаси.  
 Клеопатра билан Энобарб кириб келишади.

### К л е о п а т р а

Бир гаплашиб қўймоқчиман кўнглинг бўлсин тўқ.

### Э н о б а р б

Нима учун? Гуноҳим не? Айбим ҳимада?

**Клеопатра**

Клеопатра қўшин билан юрмасин деган,  
Гапни айтган расво кимса ўзинг бўласан.

**Энобарб**

Наҳот бўлса бу юришнинг бирорта нафи?

**Клеопатра**

Ҳамла қилса бир-бирига иттифоқдошлиар,  
Нечук энди бўлмагайман қўшин ёнида?

**Энобарб**

(чеккага)

Жавобим шу; қўшинларда сақласалар гар,  
Айғир билан бир қаторда бияларни ҳам,  
Мутлақ фойда чиқмас эди айғир отлардан:  
Устидаги суворийси билан баробар  
Бияларга сакрар эди.

**Клеопатра**

Нелар деяпсан?

**Энобарб**

Антонийга фақат халал берасан, билсанг,  
Жасорату, ақлу ҳуши ва бор вақтини  
Ҳозир сенга сарфламоқнинг эмас фурсати  
Ўшасиз ҳам, уни енгил деб юрганлар бор,

Римда қолган чўрилару ҳарам оғаси  
Зимдан роса ишляяпти, деган гаплар бор.

### Клеопатра

Қуриб кетсин ўша Риму, гап ташувчилар.  
Мамлакатнинг жиловини тутгандан кейин  
Сафарларда эркаклардан сира қолишмай  
Юраман ҳам, тураман ҳам. Қолишим аниқ,  
Қоч, йўлимда тўсиқ бўлма.

### Энобарб

Индамайман, хўп.  
Ана келди сардоримиз.

Антоний билан Канидий кириб келишади.

### Антоний

Қандоқ, Канидий,  
Бурундэй ҳамда ўша Тарентдан илдам  
Иония дengизини қолдириб ортда  
Шитоб билан Торинани ишғол этди у?  
Бундан воқиф бўлувдингми, жоним, севгилим?

### Клеопатра

Зўр эпчиллик қолдиради танбални доғда.

### Антоний

Баракалла! Жангчилардан қай бирин сендай  
Имиллашга бероларди бунчалар баҳо?  
Ҳа, Канидий, жанг қиласиз дengизда энди.

Клеопатра

Денгизда! Ҳа, қайда яна?

Канидий

Нимага энди?

Антоний

Цезарь бизни чорламоқда денгиз жангига.

Энобарб

Ол-а! Бундан бир оз олдин яккама-якка  
Олишувни қилмовдингми сен унга таклиф?

Канидий

Юлий Цезарь Помпейни хўп дабдала қилган  
Фарсалда жанг қиласиз деб, айтсанг бўларди.  
Душман қабул айламади бенаф таклифинг,  
Ихтиёринг ўзда, энди билганингни қил.

Энобарб

Кемадаги одамларнинг ҳеч мазаси йўқ:  
Деҳқонлару эшак ҳайдаб юрганлар бари  
Бир юмалаб денгизчилик касбин олганлар.  
Цезардаги денгизчилар бутунлай бошқа,  
Секст Помпей адабини бўрган шоввозлар.  
Кемаларнинг бари зилдай, уларда — акси.  
Денгиздаги жангни агар бурсанг қуруқقا,  
Сира бўлмас на уяти, па хижолати.

## Антоний

Иўқ, денгизда олишаман!

## Энобарб

Шонли сардорим!

Бу гапингни айтиш билан менсимаяисан,  
Саркардалик санъатингни ўзинг мутлақо.  
Бу, билиб қўй, ёши ўтган аскарларингни  
Довдиратар, тажрибанг ҳам. Наф бермай қолар.  
Зафарга ёр йўлдан нечук юз буриб бирдан,  
Тақдирингни таваккалга бермоқ истайсан?  
Қандай гап бу? Тасодифми?

## Антоний

Олишаман бир.

## Клеопатра

Шу чоққача Цезарь ҳали сира кўрмаган  
Бордир яна олтмиш кема менинг қўлимда.

## Антоний

Кемаларнинг баъзиларин ёндириб ташлаб,  
Одамларин мадад учун тақсимлагаймиз.  
Цезарь билан тўқиашамиз Акциумда биз,  
Гар денгизда аскарларни қилмасак мағлуб,  
Қуруқликда енгажакмиз.

Чо́лар киради.

Не хабарлар бор?

### Ч о п а р

Хукмдорим, тўғри чиқди: Цезарь олипти,  
Торинани ишғол қипти. Рост экан бу гап.

### А н т о н и й

Бўлмағур гап. Цезарь бошлиқ бўлган қўшинилар  
Шитоб билан ўтибдими манзилма-манзил.  
Канидий, бил, энди бўлар ихтиёрга  
Ўн тўққизта легиону, унга қўшимча  
Ўн икки минг отлиқ аскар, ҳазилмас сира.  
Мен кемага йўл оламан! Кетдик, санамжон!

Қ е к с а   а с к а р   киради.

### А с к а р

Сира наф йўқ олишмоқдан денгизда, шоҳим!  
Тақдирларни чирик тахта, қололмас сақлаб,  
Мана, менинг қиличим кўр, яраларим кўр!  
Финикияликлар, майли мисрликлар ҳам,  
Үрдак каби шўнғисинлар сувда — ихтиёр.  
Биз римликлар оёқ қўйиб она тупроқда  
Зафарларга эришмоқни қилганмиз одат.

### А н т о н и й

Бас, етарли! Қемаларга қараб юрайлик!

А н т о н и й, Қ л е о п а т р а в а Э н о б а р б кетадилар.

### А с к а р

Сўзларим ҳақ, Геркулес-ла ичаман қасам.

## Канидий

Сўзларинг ҳақ, аскар, сенинг, аммо саркарда  
Ихтиёрин қўлдан берган. Тизгин бирорда.  
Ҳаммамиз ҳам бир хотинга мутемиз шу дам.

## Аскар

Қуруқдаги бор аскару суворийларниң  
Ихтиёри ўзингдами?

## Канидий

Денгизчиларга

Публикола, Марк Юстий, Марк Октавий  
Ҳамда Целий бош бўлишган. Ўзимда эса  
Қуруқдаги аскарлар бор. Цезарни қара:  
Шитобию, жадаллиги солар дағдага.

## Аскар

Ҳали Римдан чиқмай туриб, аскарларин кўр:  
Шунча жойдан ҳеч сездирмай келишган ўтиб,  
Майда-майда дасталарга бўлиниб улар,  
Панд беришган йўллардаги айгоқчиларга.

## Канидий

Ким саркарда ҳозир унинг қўшинларига?

## Аскар

Мишишларга қараганда, Тавр деган зот.  
Шундай деган гап юради,

**Канидий**

Менга таниш у.

Чопар киради.

**Чопар**

Император йўқлаяпти сени, Канидий.

**Канидий**

Кўп хунукдир бу замоннинг янгиликлари  
Ҳар лаҳзада содир бўлар бирорта кор-ҳол.

Кетадилар.

## **8-САҲНА**

Акциум яқинидаги текислик.  
Цезарь ва Тавр саркорлари билан кириб келжади.

**Цезарь**

Тавр!

**Тавр**

Тинглай жон қулоқ-ла. Гапиравергил.

**Цезарь**

Денгиз жанги то бир ёқлик бўлмагунича.  
Жим туравер, киришмагин курашга сира.

Кўрсатмалар айтилган бу бурама хатда.  
Сен буларга амал қилгин. Бир нарсани бил:  
Шу ерда ҳал бўлгусидир истиқболимиз.

Кетадилар.

### **9-САҲНА**

Текисликнинг бошқа қисми.  
Антоний билан Энобарб кириб келишади.

Антоний

Суворийлар туришажак тепа ортида,  
Цезарь келса рўбарўдан чиқмоқлик учун,  
Биз душманнинг кемаларин тепадан туриб  
Санаб кўриб, не қилишни ҳал этармиз, ҳал.

Кетадилар.

### **10-САҲНА**

Текисликинг бошқа қисми.  
Канидий қўшинлари билан кириб келади. Улар саҳна-  
нинг ўнг томонига ўтишади.  
Тавр ҳам қўшинлари билан кириб келади. Улар саҳна-  
нинг иккинчи томонига ўтишади.  
Денгиздаги жанг шовқини эшитилиб туради, Энобарб кириб  
келади.

Энобарб

Тамом! Тамом! Адо бўлдик! Лаънатлар бўлсин!  
Клеопатра берган кема — «Антониада»  
Шарт бурилиб қорасини кўрсатмай қочди.

Мисрликлар инъом қилган етмиш кема ҳам  
Қуён бўлди. О, қанийди кўр бўлсам ҳозир!

Стар киради.

Стар

О, худолар! О, фалакнинг беҳад кучлари!

Энобарб

Не гап, Стар? Нима учун хит бўлмоқдасан?

Стар

Бемаънилик бошга етиб, тамом айрилдик  
Бу жаҳоннинг тенг ярмидан. Алмашдик яна  
Бўса учун вилояту ҳокимликни ҳам!

Энобарб

Нима билан тугайди жанг сенинг фикринг-ча?

Стар

Бу вабонинг оқибатин сўраяпсанми?  
Ажал билан тугайди у. Йлоҳим ўша  
Маликанинг башарасин ел есии буткул!  
Зафар билан мағлубият эгизак бўлиб  
Ҳал қилувчи лаҳза етган маҳалда эса  
Клеопатра бошлиқ бўлган жойдаги кема  
Елканларин кўтардию, мисоли ёзда  
Нақ десангиз сўна чаққан бир сигир каби  
Думин хода қилиб бирдан қочиб қолса-я!

### Э н о б а р б

Мен ҳам кўриб турдим буни. Бўлмай охири  
 Қаролмадим чидаш бермай бу манзарага.  
 Нима қилай, ноиложман.

### С т а р

#### Кема қочганда

Жодугарга ўзин тиккан Антоний тезда  
 Жангни ташлаб, мисли ошиқ ўрдак сингари  
 Елканини қанот қилиб ёзиб олганча,  
 Маъшуқасин қорасини олди жадаллаб.  
 Шу чоққача бўлмагандим бундай шармисор,  
 Жасурлигу тажрибанинг тупроқ билан тенг  
 Бўлганини энди кўриб туришим.

### Э н о б а р б

Эвоҳ!

К а н и д и й киради.

### К а н и д и й

Жони чиқиб бораётган ҳарбий шаънимиз  
 Чўкмоқдадир кўк денгизнинг қаърига ҳозир.  
 Саркардамиз айнимаса, ютардик жангда,  
 Қочиб қолиб, майдондан у шармандаларча  
 Яхши ибрат кўрсатмади.

### Э н о б а р б

(четга)

Шумиди фикринг?  
 Ундей бўлса, ҳаммамизнинг битди кунимиз.

### Канидий

Улар энди йўл олишди Пелопоннесга.

### Стар

Олис эмас. Мен ҳам кетдим. Кўрамиз ҳали  
У ёқдаги ишлар нима бўлажагини.

### Канидий

Ўз қўшиним билан таслим бўлай Цезарга.  
Иттифоқдош подшоҳлардан нақ олтитаси  
Таслим бўлиб бу борада бердилар ибрат.

### Энобарб

Сўнса ҳамки Антонийнинг бугун юлдузи,  
Гарчи ақлим бўйсунмасдан қарши шамолдай  
Турса ҳамки, мен изидан бора қолайни.

Кетадилар.

## 11-САҲНА

Искандария. Саройдати зал.  
Антоний ўз мулозимлари билан киради.

### Антоний

Эшитинглар. Гўё фарёд қилмоқда замин,  
Қийнамагин мени ортиқ, демоқчи бўлар.  
Антонийни кўтаришдан қиласр номус-ор,  
Кўз ўнгимни шундай зулмат чулғаб олганки,

Бу дунёдан йўлим топиб кетишим маҳол.  
 Нарироқда турар ҳамон олтинли кема,  
 Хазинани тезда бўлиб олинг, дўстларим,  
 Тез учинглар, Цезарь билан топишарсиз тил.

### Антонийнинг яқинлари

Бизда асло қочиш бўлмас!

### Антоний

Мен ўзим қочдим,  
 Душманларга кўрсатганча фақат елкани,  
 Қўрқоқларга мен ўргатдим:— Қочинг, дўстларим!  
 Битта йўлни танлаганман сизлардан ҳоли,  
 Жонингизни сақланг фақат. Кўрфазга боринг,  
 Хазинани топиб, сўнгра бўлиб олинглар.  
 Номусимдан ерга кириб кеттудайман мен,  
 Қочганимни эслаганда кимга эргашиб.  
 Сочларим ҳам олишмоқда бир-бири билан:  
 Оқи сўкар қорасини бемаънисан, деб,  
 Қораси-чи, оқни айблар қўрқоқлик, ишқда.  
 О, дўстларим, тез қочинглар! Хат ёзиб берай,  
 Йўлларингиз очиқ бўлгай ўшандан кейин,  
 Хафа бўлмай, оғир кунда менинг ўтинчли —  
 Таклифимга кўниб тезда чиқинглар йўлга.  
 Ўзин сотган одам яна сотилаверар.  
 Тезроқ чопинг денгиз томон, сизларга ўзим  
 Ҳадя қилдим кема билан бор хазинани.  
 Мени эса қолдиринглар. Сиздан илтимос.  
 Бўлак буйруқ бермоқликка сиғмайди ҳаддим.  
 Ўтинчим шу, биродарлар, кўришармиз боз.

Утиради.

Эрос билан Клеопатра кириб келишади. Клеопатрани  
Хармиана билан Ирада қўлтиқлаб олишган.

### Эрос

Тасалли бер, унга яқин бориб, малика.

### Ирада

Яқинроқ бор, малика.

### Хармиана

Юпат уни, бошқа чора йўқдир, малика.

### Клеопатра

Мен ўтирай. О, Юнона!

### Антоний

Йўқ, йўқ, йўқ, йўқ, йўқ!

### Эрос

Кўзингни оч, император!

### Антоний

Уят! Номус! Шармандалик!

### Хармиана

Малика!

**Ирада**

Қадри, малика!

**Эрос**

О, ҳукмдорим!

**Антоний**

Ҳа... Цезарь... У Филиппда мисли бир рақкос  
Тутган эди ўшал бенаф қиличин қўлда.  
Ер тишлатдим ўша куни ориқ Кассийни,  
Маглубият шаробини тутдим Брутга...  
Цезарь ишга солган эди бирорвлар кучин,  
У ҳарбу зарб санъатида билармонмасди.  
Мана энди... барибир...

**Клеопатра**

Оҳ! Қаранглар менга!

**Эрос**

Ҳукмдорим, малика бор, малика шунда.

**Ирада**

Яқин бориб сўзлаша қол, тенгсиз маликам.  
Уят, номус, хижолатдан боши жуда ҳам.

**Клеопатра**

Хўп... Бўлмаса сизга турай суюниб.

## Э р о с

Үрнингдан тур, олампаноҳ, эй ҳукмдорим,  
Ҳузурингга келаётир гўзал малика.  
Бошин эгиб зўрга бир-бир қадам ташлайди.  
Руҳинг тетик қил, акс ҳолда кетар кўз юмиб.

## А н т о н и й

Уз шаънимни ерга урдим, тупроққа қордим,  
Шармандаман эл олдида.

## Э р о с

Малика келди!

## А н т о н и й

Не кунларга солдинг мени, Миср гўзали!  
Мана энди қиласкергин роса мазаммат.  
Узим вайрон қилиб буткул тупроққа қорган  
Бор нарсалар қаршисида бўлдим шармисор!

## К л е о п а т р а

Бегим менинг, ҳукмдорим, валинеъматим!  
Мени қўрқоқ кемаларим учун айбситма,  
Қочади деб ўйламовдим сени мутлақо.

## А н т о н и й

Билар эдинг, ўзимдамас қалбим тизгини,  
Қайга борсанг, соянгдайман ҳозиру нозир.  
Юрагим ҳам измингдадир, Миср офати.

Билардинг-ку, менга қараб бош ирғаб қўйсанг,  
Худоларнинг қасамин ҳам қилиб нописанд,  
Қалбим тутиб, чурқ этмасдан тураверишим.

### К л е о п а т р а

Кечир мени!..

### А н т о н и й

Бечораман, мажбурман энди  
Элчиларни йўлламоққа гўдак болага,  
Ялинишга, эгилишга ва бўлмоққа хор,  
Ўйнар эдим бу оламнинг ярмини қўлда,  
Тақдирларни қиласр эдим якка ўзим ҳал!  
Сенинг севги тузогингга тушгандан бери,  
Қиличим ҳам ўралишиб ишқнинг торига,  
Сенинг севгинг қаршисида бош эгиб қолди.

### К л е о п а т р а

Кечир мени!.. Айбимдан ўт!

### А н т о н и й

Тўкмагил кўз ёш,  
Қанча дунё топган бўлсам, сарфлаган бўлсам —  
Арзимайди бари сенинг томчи ўшингга.  
Битта бўлсанг барчасининг ўрнин босади.  
Болаларим мураббийсин йўлладим бугун,  
Элчи қилиб ҳузурига, ўша Цезарнинг.  
Келмадими ҳали қайтиб? Севгилим, ҳозир  
Фазабимдан тутамоқда аъзои вужуд!

Ҳой, ким бор? Ҳой, май келтириңг, таом келтириңг.  
Парво этма! Майли қисмат қувғинди қилсан,  
У қисматдан эса доим кулганим кулган!

Кетадилар.

## 12-САҲНА

Мисрдаги Цезарь қароргоҳи.  
Цезарь, Долабелла, Тирей ва бошқалар кирадилар.

Цезарь

Майли кирсинг Антонийнинг ўшал элчиси.  
Ким экан у?

Долабелла

Болаларин мураббийсимиши,  
Гүё юлиб қанотидан кичикроқ патни  
Бизга томон әлчи қилиб йўллагани-чун,  
Антоний ҳам кучсизланиб қолгай эҳтимол.  
Элчи қилиб йўлларди у шоҳларни аввал.

Евфроний киради.

Цезарь

Яқинроқ кел. Гапиравер.

Евфроний

Нима бўлса ҳам,  
Келдим бунда Антонийнинг элчиси бўлиб.

Шу чоққача әдим унинг назаридан мен  
Одам эмас, зарраларнинг зарраси гүё.

### Цезарь

Майли шундай бўла қолсин. Не юмушинг бор?

### Евфроний

Олқишилайди Антоний ҳам ҳукмдорини,  
Ҳам Мисрда қолмоқликка сўрар ижозат.  
Бу бўлмаса, унда — оддий фуқаро каби  
Афинада ўз кунини кўриб юрмоқчи.  
Соф ҳаводан нафас олиб умр сурмоқчи.  
Клеопатра ўтинади сендан, эгиб бош:  
Птоломей тожин олма ўғилларидан.  
Не деганда, ҳозир бари сенинг ҳукмингда.  
Ўғилларнинг қисмати ҳам ихтиёрингда.

### Цезарь

Антонийнинг ўтичига қулоқларим кар.  
Клеопатра сўзларига келганда эса,  
То Мисрдан ҳайдалмаскан унинг ўйнаши,  
Ўлдирилмас экан токи расво ўйнаши,  
Қулоқ солиб ўтирмайман бу гапларга ҳеч.  
Мана шу шарт бажарилса қарашай унга.  
Икковига менинг ушбу жавобимни айт!

### Евфроний

Зафар доим ёр бўлишин тилайман сенга.

**Цезарь**

Үрдugoҳдан олиб ўтиб кузатиб қўйинг.

**Евфроний** кетади.

Ишга солгин, Тирей, энди фасоҳатингни,  
 Вақти етди, уриниб кўр, ажратишга бир  
 Антонийдан собиқ Миср маликасини.  
 Ўтинчлари бажарилар ортиғи билан.  
 Хуллас, тилга неки келса, сира қайтарма.  
 Ваъдаларни беравергин менинг номимдан.  
 Бахти келиб турганда ҳам аёл бекарор,  
 Фалокат-чи рўпочни ҳам чиқарар ишдан.  
 Шундай Тирей, бўш келма ҳеч. Мехнатинг учун  
 Не бойгоза кераклигин айтарсан кейин.  
 Не истасанг сўзсиз уни бажарай тайин.

**Тирей**

Кетдим.

**Цезарь**

Махфий кузатиб юр, ҳоли нелигин  
 Антонийнинг мағлубият аламидан сўнг.  
 Уриниб кўр, билгин ўзин тутишларидан  
 Не фикр бор манҳус бошда.

**Тирей**

Биларман, Цезарь.

Кетадилар.

**13-САҲНА**

Искандария. Саройдаги зал.  
Клеопатра, Энобарб, Хармиана ва Ирада кириб келадилар.

**Клеопатра**

Хўш, Энобарб, нима ишлар қиласиз энди?

**Энобарб**

Каллаларни бир ишлатиб, ўласиз кейин.

**Клеопатра**

Бу ишларда ким айбдор? Антоний ё мен?

**Энобарб**

Антонийнинг ўзгинаси; шаҳвоний нафса  
Ҳеч ўйламай ақлу хушни едирди қўйди.  
Авзори-ла бир-бирларин жунбишга солган  
Қўшинларни кўриб, уруш турқидан қочдинг.  
У-чи, нега қўён бўлди? Ушбу оламнинг  
Олишганда бир-бiri-ла икки қўчқори,  
Барчасига ёлғиз ўзи айбдор бўлган  
Саркардамиз ҳисни кўрди бурчдан аълороқ.  
Кемасида қочар экан кеманг кетидан,  
Ўз аскари ҳамда душман сафлари аро  
Беномуслик — енгилишдан эди оғирроқ.

**Клеопатра**

Тўхта... Жим бўл...

Антоний билан Евфроний киради.

Антоний

Шуми ҳали унинг жавоби?

Евфроний

Ҳа, тақсирим.

Антоний

Агар мени тутиб берсалар,  
Маликага ён бергум деб, ваъда қилдими?

Евфроний

Унинг сўзи шундай бўлди.

Антоний

Унга ўзинг айт.

(Клеопатрага.)

Йўлласанг гар оқ аралаш сочли бошимни  
Ушал гўдак Цезарь томон эҳтиром ила,  
Сенга инъом этар экан талай юртларини.

Клеопатра

Сенинг бошингга-я?

Антоний

(Евфронийга)

Тез қайт Цезарь ёнига.

Унга айтгин, ўн гулидан биттаси ҳали  
 Очилмаган чоғда қилиб баҳодирликлар,  
 Солиб қўйсин бу оламни роса ҳайратга.  
 Пул, мол, кема, аскар деган талай нарсалар  
 Насиб этар ҳатто қўрқоқ кимсаларга ҳам.  
 Қўл остида бўлган ҳарбий саркардалар ҳам,  
 Гарчи муте эрсалар-да гўдак болага,  
 Зафарга ёр бўлмоқлари мумкиндай эди.  
 Йиғиштириб қўйсин энди буларнинг барин,  
 Мен ҳам энди айрилганман бору йўғимдан,  
 Олишамиз энди икков яккама-якка.  
 Сенга ёзиб берайин хат. Қани юр, кетдик.

Антоний билан Евроний кетишади.

### Э н о б а р б

(четга)

Бу қандай гап! Цезарь бўлса эртадан то кеч,  
 Зафар қучгани қўшиналарин бериб жавобин,  
 Қиличбоэзлик хаёл қилас гладиатордай.  
 Одам агар айрилса-чи, ташқи файзидан,  
 Йўқолгуси кўп маънавий фазилатлари:  
 Бахт кетганда, айриламиз ақлдан паққос,  
 Айрилмаган бўлсанг ҳали ақлу ҳушингдан,  
 Үзинг қуруқ бўла туриб наҳот тенглашсанг,  
 Бўй ўлчашмоқ бўласанми улкан Цезар-ла?  
 Цезарь сени ўшал жангда мағлуб этганда,  
 Ақлингни ҳам олган экан хўп қатрон қилиб.

Мулозим киради.

### М у л о з и м

Элчи келди маликага Цезардан.

## Клеопатра

Ия!

Бедабдаба, тўппа-тўгри! Буни қаранг-а,  
 Ғунча деса муккасидан кетгучи одам  
 Лўпни гулдан бугун юзин бурмоқчи бўпти.  
 Қирсин.

## Энобарб

Тагин иш қиляпман виждонга қарши  
 Овсарликни ўзимасми овсарга хизмат?  
 Саркардаси маглубидан асло чўчимай  
 Садоқат-ла хизмат қилиб юрган одам ҳам,  
 Фолиб келган рақибидан устуноқ бўлиб  
 Ўз номини шу тариқа ёзар тарихга.

Тиреи киради.

## Клеопатра

Цезарь нени истар?

## Тиреи

Агар қолса ўзимга,  
 Холи қолиб, юзма-юз бир гаплашсак, девдим.

## Клеопатра

Хавфсирама. Булар бари менинг дўстларим.

## Тиреи

Антонийга ҳам дўст булар. Шундай эмасми?

### Э н о б а р б

Дўсти қанча бўлса агар Цезарнинг ҳозир,  
 Антоний ҳам шунчасига эгалиги ҳақ.  
 Эҳтимолки, ҳожатимиз йўқдир бизнинг ҳам,  
 Дўстлашади бизнинг хўжа Цезарь хўп деса,  
 Демак, биз ҳам дўстидирмиз улуғ Цезарнинг.

### Т и р е й

Маъқул.— Цезарь деди,— бориб айт маликага,  
 Бошга тушган кўргиликлар унут бўлсин, тез.  
 Сен Цезарнинг Цезарлигин унутмасанг бас.

### К л е о п а т р а

Шоҳона гап. Тўхтамасдан гапираверар, бўл.

### Т и р е й

Сени отган Антонийнинг багрига ишқмас,  
 Қўрқувлигин Цезарь билар жуда ҳам яхши.

### К л е о п а т р а

О!

### Т и р е й

Номусингга путур етган, шаънингда бор доғ,  
 Бу ҳаммаси зўравонлик касри, заҳмати.  
 Шу боисдан Цезарь қилмоқ бўлар мурувват.

## Клеопатра

Цезарь — худо, ҳақиқатнинг билар борини,  
Номусимга путур етса — жанг оқибати,  
Кўнгил билан қилмадим мен буни.

## Энобарб

(четга)

Наҳотки?

Антонийдан билайнин-чи бир суриштириб,  
—Жанг майдонин ташлаб қочдинг сен шўринг  
қурғур,  
Биз ҳам шундай қилиб энди қочмасак бўлмас,  
Бу борада — ўзинг ибрат, йўқса ўламиз.

Кетади.

## Тирей

Нима деяй Цезарга мен сенинг тўғринингда?  
Бағринг очиқ бўлмоғини истаркан кўнгли,  
Чўзмоқчидир ибодатга сени деб у қўл.  
Цезарь ўзин сезар эди ғоят бахтиёр,  
Мабодо сен ясаб асо суюнсанг ҳар дам,  
Тақдир унга бахш айлаган улкан омаддан.  
Антонийдан юзни буриб, бўлди тескари,  
Ҳозир сезар қанотингда ўзин bemalol,—  
Деган хабар шод айлагай ҳукмдорни хўп.

## Клеопатра

Исминг нима?

## Тирей

Тирей.

## Клеопатра

Тингла, муҳтарам элчи,  
Бориб айтгин шу сўзларни буюк Цезарга:  
Зафар қучган, шон чулғаган қўлларини мен  
Ўпажакман тиз чўкиб тез, пойида тожим.  
Оlam интиқ бўлиб турган бол забонидан  
Миср учун манзур ҳукмин эшитсан дейман.

## Тирей

Мана буни зўр гап деса бўлгуси тўғри.  
Бахт-иқболга донишмандлик бўлса тескари,  
Озига ҳам қаноатда бўлган маъқулроқ,  
Даҳшат солмас тасодифлар ана ўшанда.  
Ижозат бер: бурчни ўташ белгиси қилиб,  
Лабим қўйиб муҳр босай сенинг қўлнингга.

## Клеопатра

Бир вақтлари ота бўлмиш катта Цезарь ҳам  
Тушиб қолса улкан юриш тараддудига,  
Ушбу қўлим ушлаб, сийпаб ҳамда эркалаб  
Бўсаларга кўмиб ташлар эди бесаноқ.

Тирей унинг қўлинни ўпади.  
Антоний билан Энобарб кириб келишади.

## Антоний

Нималарни кўрар кўзим? Мадад қил, тангри!—  
Ким бўласан?

## Т и р е й

Келдим амрин этгани бажо,  
 Ҳар бир айтган сўзи мисли қонундай бўлган  
 Энг қудратли шарифул инсон сўзларин.

## Э н о б а р б

(четга)

Таъзириングни беражаклар сени.

## А н т о н и й

Эй, қуллар!  
 Шу чоққача кўрмадим-а, бундай аblaҳни!  
 Буни қараинг, ҳой иблислар, сиз ҳам, тангрилар!  
 Қайда қолди ҳукмим маним? Илгарилари  
 «Ҳой!» десам, бас, ҳамма шоҳлар гўдаклар каби  
 «Лаббай!» деся ғизиллашиб келишарди-ку.  
 Кулоқларинг кар бўлдими?

Х из м а т к о р л а р киришади.

Антонийман-ку.

Хўп савалаб дўппосланг бу масхарабозни.

## Э н о б а р б

(четга)

Жон талваса қилаётган шерга тегишмоқ,  
 Шер бачча-ла ўйнашмоқдан бўлур қалтисроқ.

## Антоний

Ой-юлдузлар, бу ишга сиз бўлинглар шоҳид!  
 Дўппосланглар ярамасни! Цезарга тобе —  
 Йигирмага яқин шоҳлар келиб мабодо  
 Лабларини теккизишга қўлига унинг,  
 Калтаклатган бўлур эдим мутлақ аямай.  
 Афталарини бужмайтириб: «Дод! Раҳм қилинг!»—  
 Демагунча уринг, тепинг, судранг ҳар томон!

## Тирей

Марк Антоний! О, Антоний!

## Антоний

Оқ калтак қилинг!  
 Шундан кейин мактубимнӣ қўлида тутиб,  
 Ҳукмдорин ҳузурига бўлсин равона.

Хизматкорлар Тирейни олиб кетадилар.

Едингдами ярим сўлиб, раингларинг кетиб  
 Қолган эди икковимиз учрашган кезда.  
 Қелганимда иссиқ ўрним совутиб бунда,  
 Хуш адo, ёш хотинимни қолдириб уйда  
 Фарзанд кўрсам бўлар эди бари қонуний.  
 Не умидлар билан келсан ҳузурингга мен,  
 Ерга уриб, расво қилдинг ишқи йўқ ўйнаш.

## Клеопатра

Ҳукмдорим!

**А н т о н и й**

Сендейларга қолмади ишонч!  
 Мабодо биз ботган бўлсак гуноҳга роса,  
 Кўр бўламиз, ақлимиз ҳам олар худолар,  
 Фаросатдан жудо бўлиб, телбарақ, манҳус,—  
 Ўлим сари кетарканмиз қаҳқаҳа отиб,  
 Суришади иккимизни қусурлар сари,  
 Хатоларга йўл қўямиз.

**К л е о п а т р а**

Шуми оқибат?

**А н т о н и й**

Марҳум Цезарь қолдирувди менга сарқитин,  
 У ҳам энди етмагандай Гней Помпей ҳам,  
 Бўлган экан бу неъматдан бир вақт баҳраманд.  
 Тўшагингга яқинлашган жуда кўп беном —  
 Қимсаларни ҳозир бир-бир санамайман ҳам.  
 Жилови йўқ иштаҳангни биламан яхши,  
 Рўпочлигу босиқликдан йироқсан тамом.  
 Ўз-ўзингни тиёлмайсан.

**К л е о п а т р а**

О, ундаи дема!

**А н т о н и й**

Бир калтафаҳм **хушомадгўй** довлаб юрагин,  
 Қўлинг ўйнаб, лабларига қўйса бемалол,  
 Жонроҳатим, дил оромим эрур қўлларинг

Дахлсизу муқаддасдир, наҳот билмасан!  
 Ўтирадим бўлсан агар Базон тогида,  
 Ҳуркиб қочар эди шунда бир пода буқа!  
 Қутурмоққа ҳозир менинг бордир ҳуқуқим!  
 Ким осилса дорга, айтмас жаллодга раҳмат,  
 Мен ҳам ҳозир оғариндан йироқман.

Хизматкорлар Тирей билан бирга қайтиб киришади.

Қалай?

### Биринчи хизматкор

Саваладик.

### Антоний

Сал-пал дод-вой солдими?  
 Ҳен ялиниб-ёлвордими?

### Биринчи хизматкор

Афв сўради.

### Антоний

Қиз бўлсайдинг бу кўйларга тушмас эдинг сен,  
 Нобакорим ўглим, дея йигласин отанг.  
 Бемаҳалда бу Цезарнинг ушлаб этагин  
 Юрганингдан ўзинг энди кўз ёш қиласер.  
 Роса калтак ейишингга шу бўлди сабаб,  
 Босаверар титроқ, кўрсанг аёл қўлини.  
 Ҳузурига бориб энди ўша Цезарнинг  
 Очиқ-ёриқ айтиб бер не кўрганларингни.

Менинг ҳозир қандай кўйга тушиб қолганим —  
Хусусида юрган эмиш Цезарь чулдираб;  
Билар-бilmас гаплар айтиб юргандан кўра,  
Илгари ким бўлганимни тутсин ёдида.  
Осмондаги чарақлаган юлдузим сўниб,  
Иўл олганда жаҳанинамнинг зулмат қаърига,  
Фазабим ҳам қўзгалади осон ва енгил.  
Ушбу ишим ва гапларим ҳукмдорингга,  
Хуш келмас, қўлидаги Гиппарх исмли  
Одамимдан олаверсин билганча ўчин.  
Осадими, қийнайдими — унда ихтиёр!  
Энди эса йўқол кўздан, гумдон бўл, йўқол!

Т и р е й кетади.

### Клеопатра

Бас, бўлдими энди?

### Антоний

Етар, моҳи пайкарим!  
Ойдай ботиб қолганингни ўзи ҳам энди,  
Антонийининг ҳоли хароб деган белгидир.

### Клеопатра

Гапиравер, чидаш бериб туравераман.

### Антоний

Назаримда, Цезарга хуш келмоқчи бўлиб,  
Оҳу кўзинг сузиг турдинг палид малайга.

## Клеопатра

Мени яхши билмайсан-да,

## Антоний

Кўнглииг қолдими?

## Клеопатра

О, азизим! Сендан кўнглим совиса борми,  
Худоларнинг иродаси кўнглим музларин  
Айлантирсин кўкдан ёгар заҳарли дўлга,  
Ўшал дўлда ўзим аввал бўлайин ҳалок,  
Ундан кейин Цезарион бўлсин жувонмарг.  
Майли, ўлсин, бирортаси қолмасин омон,  
Ўзим кўрган зурриётдан бирортаси ҳам.  
Маҳв бўлсин элу юрту бор халойиқ ҳам,  
Ҳар қадамда ер тишласин мурда-сурдалар,  
Пашшалару чивинларга ётсин таланиб.

## Антоний

Бўлди, бас қил, ишонаман, ҳар бир сўзингга.  
Қамал билан олмоқ бўлар Искандарнияти.  
Бу бир хаёл. Олишаман Цезарь билан мен.  
Қўшинларнинг руҳи ҳали тушганича йўқ,  
Пароканда кемалар ҳам жим бўлган ҳозир.  
— Ҳой, қаерда қолган эдинг мардлигим менинг?  
— Қулоқ солгин энди гапга, жангда мабодо  
Мавҳ бўлмасам, бу лаблардан ўпарман яна.  
Қайтажакман душман қонин тўкиб, қиличим  
Билан ўзим битажакман йилномага ҳам.  
Ҳа, умид бор!

**Клеопатра**

Мана менинг қаҳрамоним — ким!

**Антоний**

Куч қўшилар кучларимга, ортар мардлигим,  
Жанг қиласман паққос тиним билмай, дарғазаб.  
Зафарга ёр кунларимда бегам душманни  
Аяр эдим кўпинча мен, қиласдим халос.  
Энди эса жўнатаман Тартарга буткул  
Ким кўндаланг бўлиб қолса йўлимга менинг.  
Кел нозанин, ўтказайлик шу тунни икков,  
Майл-иштиёқ, завқ-шавққа тўлсин икки дил.  
Руҳи тушкун саркардалар келсин бу ерга.  
Қосаларни тўлдирайлик. Тун-ла олишиб,  
Бир ёзайлик кўнгилларни.

**Клеопатра**

Бунинг устиг 1,  
Мен туғилган кундир бугун. Ўуни муқаррар,  
Мусибатли бўлар девдим, йигларман девдим.  
Ўзинг яна ўзим билган Антоний бўлсанг,  
Мен ҳам сенга ўша-ўша Клеопатраман.

**Антоний**

Вақти чоғлик билан ўтар бу оқшом.

**Клеопатра**

Шоҳим,  
Саркардалар йигилишин қилмоқда хоҳиш.

## А н т о н и й

Ҳа, уларга айтажакмиз. Шу кеча роса  
 Юзлардаги чандиқлари қизарсин майдан.  
 Қани, юргин, маликам. Бор танда қувват,  
 Жанглар қилиб тортадирман душман танобин.  
 Майдонга от солганимда душман бир кўрсин,  
 Бу қиличим солажагин қанчалар даҳшат.

**Антоний, Клеопатра ва мулозимлар чиқиб кетишиади.**

## Э н о б а р б

Бу осмонда яшин, чақмоқ чақиб турса ҳам  
 Антоний ҳеч титрамайди, сира ҳам қўрқмас.  
 Қўрқув, даҳшат ваҳимаси газабга ўтса,  
 Каптар човут солар эмиш тўғри бургутга.  
 Саркардамиз ботирлиги ўзига лойиқ,  
 Ақли билан жасурлиги ортар дамодам.  
 Жасурлигинг етарлигу, бўлмасанг оқил,  
 Қиличинг ҳам ожиз қолар, заиф, афтода.  
 Назаримда тезроқ қочиб қолмасам бўлмас.

Кетади.

## ТҮРТИНЧИ ПАРДА

### 1-САҲНА

Цезарининг Искандария ёнидаги қароргоҳи.  
Қўлида хат кўтарган Цезарь, Агриппа, Меценат ва  
бошқалар кириб келадилар.

### Цезарь

Бу ерлардан тамомила қувиб солмоққа,  
Мени фаҳмлаб мисли гўдак қилмоқда таҳдид.  
Элчим борса, аямай хўп дўппослатибди,  
Ўзи билан олишувга чорлайди мени.  
Мен қайдаю у қайдадир. Ана томонча!  
Калла бўлса эди агар бу уришқоқда,  
Тушунарди, мабодо мен истасам ўлим,  
Бошқаларнинг кўмагисиз топиб олишим.

### Меценат

Улугларни тарк этғанда ақлу фаросат,  
Фарқ қилмайди қўлга тушган жондордан сира.  
Эртаю кеч юрган экан бўлиб дарғазаб,  
Қисти-басга олмоқ керак ҳеч тиним бермай.  
Жаҳл чиқса муҳофаза бўшроқ бўлади.

## Цезарь

Саркардалар ҳозир албат қўйишин билди,  
 Нақ эртага сўнгги бора жанг бўлишини.  
 Қўшин ичра бордир аввал Антоний билан  
 Бирга бўлиб, хизматини қилган одамлар  
 Уларга айт, Антонийни ушлаб олишсин.  
 Ҳар бир жангчи ўйнаб-кулсинг, бунга бор ҳаққи.  
 Антонийга ачинаман: ҳолидир хароб!

Кетадилар.

## 2-САҲНА

Искандария. Саройдаги бўлма.  
 Антоний, Клеопатра, Энобарб, Хармиана,  
 Ирада, Алексас ва бошқалар кирадилар.

Антоний

(Энобарбга)

Якка-якка олишувдан у тортдими бош?

Энобарб

Ха.

Антоний

Нимага?

Энобарб

Кучи сендан ўн марта ортиқ  
 Одам асло кўтармайди бир кишига қўл.

**А н т о н и й**

Мен эртага ҳам денгизу ҳам қуруқликда  
 Цезарь билан қиласман жанг. Ё қолиб тирик,  
 Ёки қоним тўкиб, ювай оғир гуноҳим.  
 Жангга ҳозир ташнамисан?

**Э н о б а р б**

Бўлганда қандай?  
 «Таваккал!» — деб ташланишим ҳақ.

**А н т о н и й**

Ҳазилкаш-е!  
 Қани энди, чақиравер хизматкорларни!

Хизматкорлар киришади.

Бу оқшом бир ясайдизлар катта зиёфат!  
 — Қўлингни бер, менга содиқ хизматчи эдинг!  
 Сен ҳам, сен ҳам, сен ҳам, сен ҳам; барингиз менга  
 Қилдингизлар кўп шоҳлардан ҳалолроқ хизмат.

**К л е о п а т р а**

(Энобарбга)

Бу нимаси?

**Э н о б а р б**

(Клеопатрага)

Гоҳи пайтда алам-муғабат  
 Ақли расо одамни ҳам солар шу кўйга.

### Антоний

— Сен ҳам эдинг менга содиқ.— Сен ҳам вафодор.  
 Қани энди жойларимиз қолса алмашиб.  
 Бир айланиб бўлиб қолсам сиздай хизматкор,  
 Сизлар эса менга, яъни шу Антонийга.  
 Қани энди хизмат қилсам сизларга ўхшаб.

### Хизматкорлар

Иўл қўймаслар бунга буюқ худолар.

### Антоний

#### Дўстлар

Бу оқшом ҳам хизматимда бўлинглар энди.  
 Қосаларни тўлдиринглар доим пайдар-пай.  
 Бажаринглар ҳар неки бор қилсам ихтиёр.  
 Бу оламда бўлса эди яна бир диёр,  
 Одамлари сизлар каби турса хизматда.

### Клеопатра

(Энобарбга)

Нима истар?

### Энобарб

(Клеопатрага)

Одамларни йиғлатмоқчи-да.

## А н т о н и й

Хизматимда турибсизлар ҳозирча менинг.  
 Эҳтимолки, шунинг билан тугаб насиба  
 Кўролмай ҳам қоларсизлар мени бутунлай,  
 Ё ўлигим йўлингизда бўлар кўндаланг.  
 Ажаб эмас, эрта билан янги ҳукмдор  
 Фармонларин берса сизга, қилса амрлар.  
 Шу боисдан «Хайр» дегандай қоламан қараб,  
 Сизни қувлаш эса ҳатто хаёлда ҳам йўқ.  
 Бори-йўғи икки соат қилинглар хизмат,  
 Яхшилиги худолардан қайтади ахир.

## Э н о б а р б

Кўнгилларни эзвординг-ку, йиғида ҳамма,  
 Мен бўлсам-ку тиёлмайман кўз ёшларимни.  
 Ҳаммамизни хотинлардай қўйдинг йиглатиб.

## А н т о н и й

Ўлай агар, бу нарсани кутмовдим асло,  
 Ёш-яланглар қилгусидир энди мурувват.  
 Ирод этган сўзларимдан ботибсиз ғамга,  
 Кўзингизда ёш кўринди, азиз дўстларим.  
 Ўйлагандим кўнглингизни кўтарарман деб.  
 Истар эдим, зулумотни машъаллар билан  
 Қувиб солиб, нари суриб ташлашингизни.  
 Машъалистон ҳаёт сари бошлайман сизни.  
 Ўлим бизга яқин келмас. Бир базм қилиб,  
 Ғуборларни тарқатайлик май ичиб роса.

**Кетадилар.**

**3-САҲНА**

Уша жой. Сарой олди.  
Иккита аскар кириб келади.

**Биринчи аскар**

Яхшимисан, биродарим. Эрта не бўлар?

**Иккинчи аскар**

Хамма нарса равшан бўлар. Омадинг берсин.  
Хеч нимани билмадингми?

**Биринчи аскар**

Асло, нимайди?

**Иккинчи аскар**

Миш-миш бўлса керак бари. Уйқунг тинч бўлсин.

**Биринчи аскар**

Шу нарсани ўзингга ҳам тилайман, ошна.

**Яна иккита аскар киради.**

**Иккинчи аскар**

Биродарлар, бу кечада ҳушёрлик даркор.

**Учинчи аскар**

Ўзларинг ҳам анқайманглар. Уйқу тинч бўлсин.

Биринчи ва иккинчи аскар сарой олдида соқчиликка турадилар.

**Тўртинчи аскар**

Бизларнинг жой мана шу ер.

Учунчи ва тўртинчи аскар бошқа тарафда сокчиликка турадилар.

**Эртага яна**

Бўш келмаса кемалар бас, қуруқликда ҳам  
Душманларни енгиб, зафар қучмогимиз шарт.

**Учинчи аскар**

Жангчиларнинг ҳаммаси ҳам ботир, азамат.

Саҳна остидан гобой садолари эшитилади.

**Тўртинчи аскар**

Жим! Нима бу?

**Биринчи аскар**

Эшитдингми?

**Иккинчи аскар**

Бу қандай овоз?

## Биринчи аскар

Ҳа... музика.

## Учинчи аскар

Ер тагидан келяпти, қара.

## Түртинчи аскар

Бу яхшилик белгисими?

## Учинчи аскар

Чамамда, акси.

## Биринчи аскар

Ҳай, секинроқ гапирсанг-чи... Нима экан-а?

## Иккинчи аскар

Геркулесни ҳисобларди ўзига паноҳ,  
Энди ўша худо юзин буриб тессари  
Антонийни этмоқда тарк.

## Биринчи аскар

Чақирайлик, юр,—  
Улар ҳали эшитмаган бўлишса керак.

Бошқа соқцилар турган жойга яқинроқ боришади.

## Иккинчи аскар

Бирор овоз келяптими?

**Ҳаммалари**

Қанақа овоз?  
Ҳа, келмоқда.. Бу ниманинг аломатийкин?

**Биринчи аскар**

Ажаб!

**Учинчи аскар**

Сиз ҳам бу овозни эшитяпсизми?

**Биринчи аскар**

Хизматимиз йўл қўйганча борайлик яқин,  
Билайлик-чи, қандай овоз?

**Ҳаммалари**

Қандай мўъжиза!

Кетадилар.

#### **4-САҲНА**

Фша жой. Саройдаги бўлма.  
Антоний, Клеопатра, Хармиана ва уларга  
яқин бўлган бошқа кишилар кириб келадилар.

**Антоний**

Қурол-яроғ келтири, Эрос!

Клеопатра

Етиб, ухлаб ол.

Антоний

Вақт ҳам етди, эй севгилим.— Қани, бўл, Эрос!

Эрос Антонийнинг қурол-яроғларини кўтариб киради.

Зирҳларга бурка мени, меҳрибон дўстим.  
Юзин бурса зафар мендан, билгинки албат,  
Бунга сабаб бўлган — ундан кулиб юришим.  
Қани, тезроқ бўла қол, ҳа.

Клеопатра

Кел, қарашайин  
Мана бунга борми ҳожат?

Антоний

Теккизма қўлинг!  
Юрагимнинг бўлсанг ҳамки қуролбардори,  
Нокерагин оляпсан. Анавини ол.

Клеопатра

Кел, қарасиб юборайин. Мана шундайми?

Антоний

Шундай, шундай.. Энди менга жанглар  
писандмас.—

(Эросга.)

Мана шундай, ўрган дўстим, Ўзинг ҳам отлан.

### Э р о с

Ҳозир.

### К л е о п а т р а

Тўғри солдим чоғи, илгагини, а?

### А н т о н и й

Шундай, шундай. Қойил! Энди бўлса, бесўроқ  
Буларга қўл теккизганлар бўлғуси хароб.

— Нега энди имиллайсан, бўлсанг-чи, Эрос.  
Янги қуролбардоримнинг ишин кўрсанг-чи.

— Қани энди, сен севгилим, кўриб бу жангни,  
Тушунсайдинг маънисига озроқ бўлса ҳам,  
Санъати ҳарб нелигини қўярдинг билиб.

Қуролланган а ск а р киради.

Салом, аскар. Сени шундай, бир кўришдаёқ  
Ботирлигу жасурлигинг билиб олдим мен.

Барвақт туриб борамиз-да ўз ишимизга,  
Сўнг кетармиз унга шўнфиб, ўзни унутиб.

### А ск а р

Гарчи бўлса ҳамки барвақт, олампаноҳим,  
Боидан-оёқ зирҳда бўлган минглаб одамлар  
Туришибди соҳил ёқда, сенга мунтазир.

Шовқин-суронлар. Бурғулар овози.

Саркарда билан а ск а р л а р кирадилар.

### Саркарда

Тонг ҳам отди.— Ҳукмдорга бўлсии шарафлар!

### Ҳаммалари

Ҳукмдорга шон-шарафлар!

### Антоний

Хурсандман, дўстлар,  
 Довюраклик туймоқдаман сўзларингиздан.  
 Ном чиқариш мақсадида юрган навқирон  
 Аскар янглиғ тонг ҳам отар илдам, пурзиё.  
 — Анавини бериб юбор. Бўлди, хўп раҳмат.  
 Хуш қол энди, маликам, бас бу ёғи — тақдир.  
 Бир аскарнинг бўсасини қабул этгайсан,  
 Пайти эмас, ҳозир оғиз кўпиртириб мен  
 Гаплар сотиб, сени мақтаб ўтирасам ҳадеб  
 Энди сен-ла хайрлашиб, ўрнига қўяй,  
 Менга берган эгнимдаги зирҳим амрини.  
 — Қани энди, бўшашибманглар, мард лочинларим!  
 Мен бошлайман сўнгги жангга.— Хайр, алвидо!

Антоний. Эрос ва саркардалар чиқиб кетадилар.

### Хармиана

Ижозат эт, ётогингга қўяй кузатиб.

### Клеопатра

Кетдик, қани. Аскарларин бошлади жангта.  
 Тезроққина ҳал бўлсайди жанг оқибати,

Холи қолиб икковлари олишганда бир.  
Ана шунда Антоний ҳам... Энди-чи... Кетдик.

Кетадилар.

### 5-САҲНА

Антонийнинг Искандария яқинидаги қароргоҳи.  
Бургулар чалинади. Антоний билан Эрос кириб келиша-  
ётганларидан рўбарўларидан кекса аскар чиқиб қолади.

А ск ар

Зафарни ёр қилсин сенга, албат худолар.

А н т о н и й

Ўшанда мен ишонсайдим чандиқларингга,  
Қуруқликда жанг қилардим душманим билан.

А ск ар

Ҳа. Ўшанда атрофингдан жилмасди сира,  
Мағлуб бўлган шоҳлар билан, бугун тонг саҳар  
Қочиб қолган дилга яқин одаминг бешак.

А н т о н и й

Тонг саҳарда? Қим бўлди у?

А ск ар

Қимлигин айтсан,  
Яқин тутган одамингу, мабодо ҳозир:  
«Энобарб» деб, чақирсанг гар, ажабмас шунда  
Жавоб берса у Цезарнинг қароргоҳидан:  
«Сенга хизмат қилмайман», деб.

**Антоний**

Жинни бўлдпнгми?

**Аскар**

Цезарь ёққа қочиб кетди.

**Эрос**

Хукмдор, аммо  
Қолиб кетган Энобарбнинг моллари бунда.

**Антоний**

Қочдими?

**Аскар**

Ҳал! Бошим билан бераман жавоб.

**Антоний**

Не қиласардик, майли, Эрос, жўнатиб юбор  
Топган-тутган нарсаларин битта қолдирмай.  
Мактуб ёзиб, унда менинг алвидомни айт  
Бахт тилайман, яна шундоқ умидим борки,  
Хўжасини янгиламай хизмат этсин у.  
Хатни тез ёз, унга ўзим имзо чекаман.  
О, шум тақдир! Ҳалолларни қиласан хоин.  
— Бора қолгин энди. Эрос. Эҳ, сен Энобарб!

Кетадилар.

**6-САҲНА**

Цезарнинг Искандария яқинидаги қароргоҳи.  
Бургулар чалинади. Цезарь, Агриппа, Энобарб шотирлари билан кириб келишади.

**Цезарь**

Жангни тезроқ бошламасак бўлмас, Агриппа,  
Антонийни тириклайин қўлга олишини  
Одамларга тайин қилгин.

**Агриппа**

Бажаргум албат.  
(*Кетади.*)

**Цезарь**

Биз истаган кунлар қолди анча яқинлаб.  
Шундан кейин соя ташлар зайдун шохлари  
Бу оламнинг бизга тобе уч бўлагига.

Чопар киради.

**Чопар**

Жангга кирди Антоний.

**Цезарь**

Тез Агриппага айт:  
Қочқинларни қўйсин фақат олдинги сафга.  
Ана шунда Антоний ҳам бутун қаҳрини  
Сочгусидир нақ ўзининг одамларига.

Цезарь шотирлари билан кетади.

### Э н о б а р б

Алексас ҳам чиқди хоин, Антόний уни  
 Юборганди бир иш билан Ёхудияга,  
 Боргандан сўнг, у Иродни хўп алдаб-сулдаб,  
 Цезарь томон қочмоқликка кўндириди атай.  
 Цезарь эса ажал билан сийлади уни.  
 Канидийни дўстлари-ла олди хизматга,  
 Бироқ сира ишонмайди, кўнгил эмас тўқ.  
 Мен ҳам тутдим қабоҳатга юзим охири,  
 Шу боисдан шодлик менга тамом бегона.

Цезарининг аскари киради.

### А с к а р

Ҳой Энобарб, юборибди сенга Антоний,  
 Ўша ерда не орттирган бўлсанг барини.  
 Қўйган ўзин ҳадяларин. Чодирингга чоп,  
 Туширмоқда юкларингни келган бир одам.

### Э н о б а р б

Ҳаммасини ўзинг олгин.

### А с к а р

Қўйгин ҳазилни.

Мен борини айтаяпман. Яхши бўларди,  
 Гар кузатсанг ўша ёқдан келган одамни.  
 Мен борардим, аммо имкон бермас хизматим.  
 Ҳукмдоринг сахий экан нақ Юпитердай.

### Э н о б а р б

Бу оламда ҳеч топилмас мендай палиди,  
Хўп биламан буни ўзим. Зўрсан, Антоний!  
Сахийлигинг йўқдир чеки, хиёнатни сен  
Олтин билан турганингда шунча эъзозлаб,  
Не берардинг бурчга содик ўз одамингга?  
Юрагимни алам қийнар, яқин орада  
Бу қийноқлар жондан жудо қилмаса борми,  
Топажакман бунинг осон ва аниқ йўлин.  
Аламим ҳам етар бунга, биламан аниқ.  
Антоний-ла олишайми? Йўқ, ундан кўра,  
Ахлат тўла бир ариқни топай қидириб,  
Ўша ерда майли, ўлай. Ифлос қанча мўл —  
Бўлса шунча ярашгуси разил ўлимга.

Кетадилар.

### 7-САҲНА

Икки қароргоҳ ўртасидаги жанг майдони. Жанг шовқини. Бурғулар ва ногоралар овози эшитилади.  
Агриппа саркардалар билан кириб келади.

### А г р и п п а

Ичкарига хўп кирибмиз, қайтайлик энди!  
Ушбу жангда раҳнамодир Цезарнинг ўзи.  
Биз душмандан кутмагандик бунчалар зарбни

Кетадилар.

Жанг шовқини. Антоний билан яраланган Стар киради.

## Стар

Жанг жанглигин қиласы да, эй ҳукмдорим!  
Биз шиддатлы ҳамла билан ташлансак агар  
Абжагини чиқарапдик душманни зумда.

## Антоний

Ҳамма ёниг беланибди қоп-қора қонга.

## Стар

Құш жароҳат «Т» ҳарфидай бўлиб турганда,  
Яна бир ўқ келиб тегиб унинг ёнига,  
«Н» ҳарфига ўхшаб қолди.

## Антоний

Қочиб қолди-ку!

## Стар

Биз уларни иргитамиз ифлос ариққа!  
Бўши келмайман, баданимда соғ жойларим кўп,  
Чидагайман ҳали қанча жароҳатларга.

Эрос киради.

## Эрос

Тирақайлаб қочди душман, қўлимиз баланд,  
Буни энди зафар деса ярашар жула.

## Стар

Тиним билмай қилич солиб бормоқлик керак!  
 Қўрқоқларни қуён қилиб қувсангиз борми,  
 Топилмайди бундан яхши эрмак дунёда.

## Антоний

Менга маъқул кёлди сенинг хушчақчақлигинг.  
 Үн баробар сенга берай инъомни ортиқ.  
 Кетдик!

## Стар

Кетдик, бир оёқда бўлсак ҳам ҳатто!

Кетадилар.

## 8-САҲНА

Искандария деворининг ёнида.  
 Жанг шовқини эшитилиб туради. Антоний ва Стар қўшинари билан кириб келадилар.

## Антоний

Биз душманни улоқтиридик қароргоҳига,  
 Қим бор бунда — маликага беринглар хабар.  
 Қуёш ҳали жамолини кўрсатмай туриб,  
 Биз душманнинг томирида қолган қонни ҳам  
 Тирқиратиб, жонни олмай қўймаймиз албат.  
 — Миннатдорман барчангиздан, азиз аскарлар,  
 Зиммадаги бурчингизни тушунган ҳолда  
 Матонатли жанг қилдингиз майдони ҳарбда.

Мен деганда, айладинглар жонларни нисор,  
 Ҳар бирингиз Гектор янглиғ билмайсиз қўрқув  
 Энди эса шаҳар бориб ором олинглар,  
 Дўстларни-ю, хотинларни босиб бағирга,  
 Жаңглардаги жасурликдан сўзлаб беринглар.  
 Қўзларидан тўккан севинч ёшлари ила  
 Қонингизу терингизни ювсинлар улар,  
 Жароҳатлар даволансин бўсалар билан.

(Старга.)

Кўлингни бер.

Клеопатра шотирлари билан киради.

Сўзлагайман ботирлигингни  
 Сеҳр, жоду оламининг маликасига,  
 Ўзи айтгай сенга чуқур миннатдорлигин.  
 — Кел энди, эй бу оламиниг гўзал эркаси,  
 Зирҳ ўраган бўйнимга сол латиф қўлларинг.  
 Бу шоҳона либосларинг ечмай бўлса ҳам,  
 Багримга кир, зирҳлар сира бўлмасин тўсиқ.  
 Эшигандим арабангнинг шўх шалдирашин.

Клеопатра

О, ботирим! Жасурларнинг сардори, иори!  
 Мардоналик, довюраклик сенда мужассам!  
 Ёвуз тақдир занжирларин парчалаб мағрур,  
 Юзинг ёруғ, жангдан қайтдинг.

Антоний

Сайроқ булбулим!  
 Кўплар қолди ул жанггоҳда мангу ер тишлаб

Сочларимда кўринса ҳам оқлар, малагим,  
Ўйламагин, қудратимнинг бўлган манбай  
Ақлим бордир, ҳали ўзим йўқотганим йўқ,  
Олишаман манман деган йигитлар билан.

*(Старни кўрсатиб.)*

Мана шулдир чин қаҳрамон. Қилгил муруват,  
Бер қўлингни, лабларига боссин эртароқ.  
— Қани, ўпгин, эй баҳодир!— Яхши жанг қилди,  
Одам зотин қирмоққа аҳд қилган бир худо  
Вужудига жойлашгандай қийратди кўпни.

### Клеопатра

Мендан сенга бўлар эъзоз, эй жасур дўстим,  
Подшоларнинг тилла сувли қурол-яроғи.

### Антоний

Ёқутларга сероб эди Феб араваси,  
Яроғлар ҳам қолишмасин безак бобида.  
Қўлни бергин менга, дўстим, Искандарияга  
Қилич, найза тешган ушбу қалқонларимиз  
Фолибона юриш билан олиб кирайлик.  
Қўшинимиз, афсус, сиғмас саройимизга,  
Сиғса борми, ўтирадик ҳаммамиз бирга,  
Эртанги жанг шарафиға сўнардик қадаҳ.  
Тақдиримиз ҳал этилар ушбу жангда ҳам.  
— Қани, чалинг энди, тинмай ҳой бургучилар,  
Ноғоралар бир кўтарсинг шаҳарни бошга.  
Еру осмон шарафласин бу садо ила  
Жанг майдонин ғолиблари бўлган зотларни.

Кетадилар.

## 9-САҲНА

Цезарь қароргоҳи. А ск а р л а р соқчиликда туришибди. Э н о-  
б а р б киради.

### Б и р и н ч и а с к а р

Үрнинизга одам келар бир соатдан сўнг,  
Келишмаса бориб хабар қилмоқлик даркор,  
Кеча ойдин, субҳидамги соат иккода  
Яна қайта жанг бўлади, деган гаплар бор.

### И к к и н ч и а с к а р

Ростин айтсам, кеча бўлди ҳолимиз кўп танг.

### Э н о б а р б

Сен шоҳидим бўла қолгин маним, эй кечал!

### У ч и н ч и а с к а р

Ҳой, кимдир у?

### И к к и н ч и а с к а р

Жим тур... Аста қулоқ солайлик.

### Э н о б а р б

Ой ҳам шоҳид эрур менга ҳозирги дамда!  
Хоинларни нафрат билан авлодлар эслаб —  
Қўйганида, тасдиқлагин: шўрбахт Энобарб  
Пушаймон-ла сенга кўз ёш қилганлари-ю,  
Ўқинганин...

## Биринчи аскар

Энобарбми?

## Учинчи аскар

Жим бўл... Қулоқ сол.

## Энобарб

Қайғу деган мамлакатнинг, эй ҳукмдори!  
 Ушбу тунга хўп сочибсан оғуни тўплаб —  
 Вужудимга эзиб сочгин,— майлига у жон,  
 Тутқунликда яшагунча ўлгани афзал.  
 Жиноятнинг тоши билан парчалаб юбор  
 Аламлардан адо бўлган бу юрагимни,  
 Чек қўйилар шунда барча ғаму андуҳга.  
 О, Антоний, сенсан буюк одил тождор,  
 Энобарб-чи, гоят тубан, абраҳ ва муфлис,  
 Кечиргин сен кечиргандай одамни одам.  
 Мен розиман майли, мени қўрқоқ хоинлар —  
 Рўйхатига тиркасинлар сира аямай!  
 О, Антоний!

(Ўлади.)

## Иккинчи аскар

Чақирайми, нима дейсизлар?

## Биринчи аскар

Қулоқ солиб турайлик-чи. Зора Цезарга  
 Керак бўлган бирор гапни валдираб қолса.

**Учинчи аскар**

Майли, қара, ўхшайди-ку ухлаб қолганга.

**Биринчи аскар**

Хушдан кетган бўлса керак. Ётар олдиан  
Ким бунчалар зўр ибодат қиласади, дейсан.

**Иккинчи аскар**

Уйготайлик.

**Учинчи аскар**

Тур ўрнингдан, қимирласанг-чи!  
Кимсан? Гапир!

**Иккинчи аскар**

Жавоб бер, ҳой! Эшиятсанми?

**Биринчи аскар**

Ётар ўлим қучогида.

Олисдан ногора товушлари эшитилади.

**Қара! Ноғора**

Ухламоқчи бўлганларни аста уйғотар.  
Бу ўликни топширайлик қоровулларга,  
Ўйламагин, авомлардан деб уни.

## Учинчи аскар

Қетдик.

Ажабмаски, бир оздан сўнг қолса уйғониб.

Аскарлар Энобарбнинг жасадини олиб кетадилар.

## 10-САҲНА

Иккала қароргоҳ оралиғидаги жанг майдони.  
Антоний ва Стар құшинлари билан кириб келадилар.

### Антоний

Денгизда жанг қилмоқликни күзлашар улар,  
Билишади қуруқликда келмайди омад.

### Стар

Денгиз билан қуруқликда жанг бўлмоғи ҳақ.

### Антоний

Нақ осмону оташда ҳам жанг бўлса майли!  
Ҳар ерда ҳам қодирдирмиз зарба бермоқча.  
Қани энди ишга келсак. Пиёдаларни  
Тепаликка қўяжакмиз, шаҳарга яқин.  
Кемаларнинг бари чиқиб бўлган денгизга.  
Биз у ердан туриб яхши кузатсак бўлар  
Ғанимларнинг ҳар қандайин ҳаракатларин.

Кетадилар.

Цезарь құшинлари билан киради.

### Ц е з а ръ

Жойингизда қимир этмай тураверинглар,  
 Улар ўзи то ҳужумга ўтмагунича.  
 Душман сара қўшинларни барин йўллади  
 Қема турган томонларга. Бизга зафар ёр.

Кетадилар.

Антоний билан Стар қайтиб киришади.

### А н т о н и й

Икки томон кемалари тўқнашди ҳозир,  
 Қарагайли тепаликдан кўринар бари.  
 Бораману, тезда қайтгум сенинг ёнингга.

Кетади.

### С т а р

Малиқанинг кемасининг арқонларига  
 Қалдирғочлар уя қўймиш. Авгурлар сокин,  
 Улар турқи, кўриниши хунук жуда ҳам.  
 Антоний ҳам гоҳида ҳуд, гоҳида беҳуд.  
 Куч-қувватдан қайтиб қолган, иқбол ҳам уци  
 Аввалгидай сал-пал боқиб, қилар умидвор —  
 Гоҳ зафардан, гоҳо эса роса қўрқитар.

Денгиз жангининг шовқини эшитилади.

Антоний қайтиб киради.

### А н т о н и й

Бу не қисмат! Бу не ҳолат! Жанг барбод яна!  
 Яна қилди бу мисрлик аёл хиёнат!

Барча кема қочиб ўтди душман томонга,  
 Ана кўргин, қалпоқларин отиб осмонга  
 Шаробхўрлик қилишмоқда аскарлар бирга.  
 Ҳў, лаънати, сотқин, расво! Майда болага  
 Мени сотиб юбординг-а. Юрагим энди  
 Олишгуси хўп беаёв юрагинг билан.

(Старга.)

Қўшинларни қилгин озод. Мен энди фақат  
 Жодугар-ла ҳисоб-китоб қила олсам бас.  
 Ҳаммасига жавоб бериб, қутқар ўзингни.

С т а р кетади.

О, қуёшим! Энди асло қайтиб кўрмайман  
 Тонг паллада ётоғингдан кўтаришинг бош.  
 Қўлни-қўлга бериб ҳозир хайр-хўш қилар  
 Иқбол билан Антоний ҳам шу дамда жадал.  
 Биқинимдан нари кетмай, товоним ялаб,  
 Нима десам фармонларим бажо қилганлар,  
 Эндиликда шарбат янглиг ёйилиб оқиб,  
 Қўшилмоқчи бўладилар Цезарь тўпига.  
 Барчасидан юксак бўлган бир кедр эса  
 Пўстлоқлари тилинганди турибди яккаш,  
 Мени сотиб юбординг-а, мисрлик маккор,  
 Қуриб кетсин жодуларинг, расволигинг ҳам!  
 Менга кўзинг тикканингда сеҳринг зўридан  
 Жанг пайтида тушган эди қиличим қўлдан.  
 Оғушингни ҳар нарсадан қўярдим устун,  
 Истакларим тожи билан муддаом, дердим!  
 Мана энди ишга солиб бор айёрлигин  
 Мени забун, хароб этди бу лўливачча!  
 Ҳозир эса ғирт гадоман.— Эрос! Ҳой, Эрос!

К л е о п а т р а киради.

Эй, алвости! Сенми? Иўқол!

### Клеопатра

Недир гуноҳим,  
Ғазабингни сочиб қолдинг муҳаббатингга?

### Антоний

Қоранг ўчир! Мен ҳозироқ қонингни ичиб,  
Цезарнинг бор хурсандлигин қиласман барбод.  
Зўр бўларди, Цезарь сени қора ҳалқига  
Эрмак учун эртаю кеч қилса сазойи.  
У ўтирган аравадан кейинда ўзинг  
Аёл шаънин хўп таҳқирлаб юрсанг судралиб.  
Кўрсатишса арзимаган сариқ чақага  
Ҳар қадамда санғиб юрган ҳар бекорчига.  
Окстия етар эди ўз орзусига  
Тирноқлари тиғдай ботгач жирканч юзингга.

Клеопатра кетади.

Хайриятки, кетдинг ҳозир фойдангни кўзлаб,  
Бу дунёда топиларми наф деган нарса?  
Ғазабимда қўйганимда сени ўлдириб,  
Кўп ажалдан сақлармидим сени бегумон.  
— Ҳой, Эрос! Ҳой! Эгнимда бор Несс берган  
кўйлак,  
Қувват бергин, ҳой Геркулес, мадад қил, сую!  
Қулни ҳозир отсам дейман ой ўроғига,  
Сенинг зилдай гурзинг билан йўқотмоқчиман  
Бу дунёда ўзим азиз кўрган нарсани.  
Алвастига ўлим! Мени сотди гўдакка...

Қурбониман фитнанинг мен. У эса энди  
Бунинг учун дучор бўлур ўлимга! Эрос!

## 11-САҲНА

Искандария. Саройдаги бир хона.  
Клеопатра, Хармиана, Ирада, Мардиан ки-  
риб келадилар.

### Клеопатра

Тезроқ, тезроқ! Ердам беринг! Дарғазаб жуда,  
Шиддати зўр қалқон тутган Теламондан ҳам,  
Фессалия тўнгизидай ғазабкор, ёмон.

### Хармиана

Кириб олгин хилхонага, асра ўзингни,  
Антонийга айтажакмиз сени ўлди, деб.  
Хукмдорнинг тарқ этмоғи улуғворликни,  
Жони тандан чиқмоғидан анча мушкулроқ.

### Клеопатра

Ҳа, қочайин хилхонага.— Сен-чи, Мардиан,  
Тезда бор-да Антонийнинг ҳузурига, айт:  
Клеопатра қасд қилди ўз жонига ўзи.  
Ўлаётиб айтди бир сўз фақат — «Антоний».  
Бориб тезда тушириб қўй уни ҳовридан,  
Сўнг айтарсан не кўйларга тушганин унинг,  
Югур тезроқ.— Хилхонага чопайлик энди.

Кетадилар.

## 12-САҲНА

Ўша жой. Бошқа бўлма.  
Антоний билан Эрос кириб келадилар.

Антоний

Қаршингдаги Антонийми, ё бошқа бирор?

Эрос

Сиз ҳукмдор, Антонийсиз.

Антоний

Гоҳо булутлар  
Бирдан кириб қолгусидир аждар тусига.  
Қуюқ тортган буғлар гоҳо қолади ўхшаб,  
Айик, арслон ёки қалъя деворига, ё —  
Эгилган бир қоя ёки тоғлар қатига,  
Ё бўлмаса ўрмон босган яшил тепага.  
Ҳаво шундай алдаб қўяр кўзларимизни.  
Оқшом ғира-ширасида кўрганинг борми?  
Шундайин бир мўъжизани?

Эрос

Ҳа, ҳукмдорим.

Антоний

Кўз олдингда турган бир от, ўшал лаҳзада  
Булутларнинг сингиб кетиб тезда қаърига,  
Сувга тушган томчи янглиғ кетар кўринмай.

### Э р о с

Шундай бўлиб турар баъзан.

### А н т о н и й

Меҳрибон, Эрос,  
 Ҳозир мен ҳам бир шарпаман, шундай омонат.  
 Рост бўлса-да, менинг ҳозир Антонийлигим,  
 Эриб-тугаб бормоқдаман. Наҳот Миср деб,  
 Уруш қилган бўлсам-а мен? Малика эса  
 (Юрагини багишлаган девдим ўзимга,  
 Уйловдимки, унга мафтун юрагим каби  
 Гумдон бўлган миллионларча юракка ўхшаб.)  
 Найрангларни ишга солиб, қилиб айёрлик,  
 Душманим-ла тил топишиб пинҳон ва зимдан  
 Шон-шаънимни пуллаб, унга олибди зафар!  
 Қўй, йиғлама, эс-ҳушим ҳам ўзимда экан,  
 Қандай ўлим танламоққа етади кучим.

### М а р д и а н киради.

Менга қара, ўғирлабди ўшал маликанг  
 Қиличимни.

### М а р д и а н

Асло бундай дема, Антоний.  
 Севар эди маликамиз сени бағоят,  
 Тақдирини қўшган эди тақдирингга ҳам.

### А н т о н и й

Овозингни ўчир, сурбет! Даф бўл кўзимдан!  
 Менга қилди зўр хиёнат ёвуз маликанг.  
 Бунинг учун жони кетар.

## Мардиан

Инсон икки бор  
 Жонин сира нисор этмас, ўолмайди ҳеч.  
 Узилгандир малика ҳам ушбу қарзидан.  
 Истакларинг бўлди бажо, қийнама ўзинг.  
 Мана унинг ўлаётиб айтган сўзлари:  
 «Шон-шавкатли мард Антоний! Мардим Антоний!»  
 Кўзин юмиб кетар экан, малика абад  
 Юрагига жо айлади, исминг тақрорлаб  
 Узи билан олиб кетди нариги дунёга.

## Антоний

У ўлдими?

## Мардиан

Ҳа, дунёдан кўз юмиб кетди.

## Антоний

(Эросга)

Ечиб олгин энди қурол-яроғларимни,  
 Ишларим ҳам битди бари, бўлар ухласам.

(Мардианга.)

Омон-эсон қолганингга қилгин шукурлар,  
 Шунинг ўзи, билсанг, сенга улкан мукофот.

Мардиан кетади.

Ечиб олгин!— Аякснинг бу етти қават  
 Қалқонлари мени асло сақлаб қололмас  
 Нақ бошимга тушаётган бу кучли зарбдан.  
 Вақт етди. Ёрил, кўкрак! Гавдам, юрак ҳам  
 Гар маҳкамроқ кўринса-да, сендан мустаҳкам,  
 Тез парчалаб ташла уни!— Нега сен, Эрос,  
 Имиллайсан гўё ҳолдан тойған одамдай!  
 Умримда кўп жанглар қилдим. Хуш қолинг энди.  
 Жангда ёвдан хўп асраган тиғ-яроғларим!  
 Қошингизда доим менинг ёруғдир юзим.

### Э р о с кетади.

Жудолик ҳам кўпга бормас, ҳа, Клеопатра.  
 Кўз ёш тўкиб, сендан узр сўрамоқ учун,  
 Тезда тушиб мен изингдан олгайман етиб.  
 Имилласам — катта азоб, керак шошилмоқ,  
 Чироқ ўчиб қолгандаёқ, лозим ухламоқ.  
 Курашмоқдан ҳеч маъни йўқ, бари беҳуда,  
 Ўз қудратинг ўз жонингни маҳв этар холос.  
 Тамом энди. Фақат муҳр босса кифоя.—  
 — Қайдасан, ҳой Эрос!— Мен ҳам кетдим, малика!  
 — Ҳой, Эрос!— Ҳой бир оз тўхта, севгилим, маним,  
 Қўл ушлашиб икковимиз киргаймиз албат  
 Жаннатилар сайр этажак ўшал маконга.  
 Ана шунда бизни қуршар, арвоҳлар шодон  
 Шунда бизлар Диона ҳам Эней гуруҳин  
 Ўзимизга оғдирамиз.— Эрос! Ҳой Эрос!

### Э р о с киради.

### Э р о с

Не истайди, ҳукмдорим, айлайин бажо.

## Антоний

У ўлсаю мен қолсам — гирт номуссизлик бу.  
Худоларнинг ғазабига қолиб кетмайин.  
Бу қандай гап! Қиличи-ла дунёни қайта  
Қурган ҳамда денгизларни чўнг кемаларга  
Тўлдирворган соҳибқудрат мендай бир одам  
Мардликка паст кетиб турса аёл олдида,  
Билинмаса сабот, руҳин улугворлиги!  
У ўлимни ташлаб ахир дебди ажалга:  
«Ўз-ўзимдан енгилдим мен, бирордан эмас!»  
Эсла, Эрос, онт ичгандинг, мабодо бирдан  
(Мана ҳозир ўша нарса бўлди-ку содир,)  
Шармандалиқ, тавқи ланъат туниса бошимга,  
Лйтганимни ўшал замон қилгайсан бажо:  
Бир зарб билан ўлдиргайсан. Фурсати етди,  
Ўзингни бос, мутлақ мени ўлдирмайсан сен,  
Расвосини чиқаргайсан Цезарь базмини.

## Эрос

О, худолар! Асрарингиз жангларда мени,  
Мўлжалланган қанча-қанча ўқлардан роса,  
Наҳот энди одамзодга кўтарсам қўлим?

## Антоний

Ё томоша айламоқлик афзалми сенга  
Ҳов, Римдаги деразамнинг тагида туриб:  
Икки қўли боғлиқ бўлган ҳукмдорингнинг  
Утидан бошин ердан узолмай сира,  
Магур Цезарь орқасидан судралишини?  
Фалабадан масрур бўлган Цезарнинг ахир  
Абгор бўлган асирини мазахлашини?

Э р о с

Иўқ, иўқ, асло!

А н т о н и й

Ундаи бўлса, шайлан, биродар!  
 Бир зарб етар — ўша менга бўлғуси шифо!  
 Ватан учун кўп хизматлар қилган элпарвар  
 Қиличингни яланғочла қайтадан яна.

Э р о с

Раҳм-шафқат қилгин менга, ҳашматмаобим!

А н т о н и й

Сени буткул озод қилиб, берганимда эрк  
 Илк буйруғинг адo этгум, шаксиз муқаррар —  
 Дея менга сўз бергандинг. Энди, ижро қил  
 Галга солсанг илгариги хизматларинг ҳам  
 Сувга оқар. Қани энди қиличингни ол!

Э р о с

Мангу шараф янглиғ балқиб кўзни олгулик  
 Нурли юзинг четга буриб тургин ақалли.

А н т о н и й

Майли шундай бўла қолсин.

Э р о с

**Мана... Қиличим.**

## А н т о н и й

Қани, бажар, зиммангдаги ўшал юмушни,

## Э р о с

Муруватли хўжам, раҳбар, улуг сардорим,  
Сенга ўлим зарбин ҳозир етказмай туриб,  
Ижозат бер «Узр» сўзин дадил айтмоққа.

## А н т о н и й

Хайр, Эрос.

## Э р о с

Алвидо, эй шавкатли сардор!  
Ижозатми энди қилич солмоққа?

## А н т о н и й

Ҳа, ҳа!

## Э р о с

Ундай бўлса...

(Ўзини қилич устига ташлайди.)

На чорам бор, ақалли шунда.  
Кўрмайман-ку Антонийни ўлик ҳолида.

(Улади.)

### Антоний

Олижаноб инсонликда тургайсан юксак,  
 Жуда яхши сабоқ бердинг, довюрак Эрос.  
 Сен, маликам, сен ҳам менинг қуролдош дўстим,  
 Жасурликда ҳаддан зиёд бўлдинглар ибрат.  
 Ушбу дамда ўлим билан унашганим рост.  
 Энди бўлса, Эрос, мендек бир ҳукмдоринг  
 Сенга шогирд сифатида бергусидир жон.  
 Жонни нисор этмоқликни ўргатдинг менга,  
 Шундай қилай энди.

(*Киличга ўзини ташлайди.*)

Нима? Тирикманми мен?  
 Ҳой соқчила! О... Келинглар, ўлдиринг тезда!

Деркет билан соқчилар келишади.

### Биринчи аскар

Нима шовқин бўлар бунда?

### Антоний

Чаладир ишим  
 Ўтинаман, қолганини тугалланг, дўстлар.

### Иккинчи аскар

Юлдуз сўнди.

### Учинчи аскар

Бўлар энди қиёмат-қойим.

## Ҳаммалари

О, мусибат!

### Антоний

Хурматларим ҳаққи, ўлдиринг.

### Биринчи аскар

Қўлим бормас.

### Иккинчи аскар

Мен ҳам.

### Учинчи аскар

Ҳеч ким удда қилолмас

Аскарлар кетишади.

## Деркет

Шум тақдир ҳам шум ўлиминг бўлиб омухта,  
Қочиб қол, деб уқтиromoқда одамларингга.

(Антонийнинг қиличини кўтаради.)

Бу қиличу Антонийнинг ўлган хабари  
Йўл очади менга Цезарь томон, албатта.

Диомед киради.

Диомед

Қаердадир, Марк Антоний?

Деркет

Манов ерда у.

Диомед

Жони борми, тирикми у? Толқонинг борми?  
Нега жавоб бермай туриб қолдинг серрайиб?

Деркет кетади.

Антоний

Диомед,  
Утинаман, қилич солиб ўлдир, Диомед.

Диомед

О, шавкатли раҳнамойим, бу ерга мени  
Юборганди Клеопатра хабар олгани.

Антоний

Гапир, қачон?

Диомед

Хозиргина.

## Антоний

Қаерда ўзи?

## Диомед

Паноҳ қилган подшоҳларнинг хилхонасин у,  
 Бунда ҳозир бир фалокат рўй берганини  
 Сезганидан юрагига тушган ғулгула:  
 Хиёнатда айблабсан уни беҳуда,  
 Газабинг ҳам ўшал онда сўймасди сира;  
 Малика ҳам буни яхши тушунганидан,  
 Чиқарувди ёлғондакам ўзин ўлдига.  
 Оқибатда хунук чиқиб қолишдан қўрқиб,  
 Мени сенга йўллар экан, буюрди атай  
 Сирдан воқиф этмоқликни, кеч қолдимми ё?

## Антоний

Кеч қолдинг, ҳа, кечроқ қолдинг, софдил Диомед.  
 Айтганим қил, соқчиларни чақиргин тезроқ.

## Диомед

Ҳой, ким бор? Ҳой! Саркарданинг соқчилари, ҳой!  
 Тезроқ келинг! Сизни йўқлар шонли Антоний.

Соқчилар киришади.

## Антоний

Хизмат қилинг, сўнгги марта, дўстларим, менга:  
 Клеопатра ҳузурига элтинглар жадал.

### Биринчи аскар

О, мусибат! Нечун бизнинг ҳукмдоримиз  
Кетмоқдадир бу дунёдан, қолиб бошқалар?

### Антоний

Рұхан тушиб, хурсанд қилманг, эй сафдошларим,  
Меҳрибонлик нелигини билмас тақдирни.  
Табассум-ла қарши олиб унинг зарбини,  
Етказасиз шунинг билан хўп аёвсиз зарб,  
Қани энди кўтариғлар. Мен ҳам сизларни  
Бошлиғанман кўп жангларга. Навбат сизларга,  
Юким энди елқангида. Раҳмат барига.

**Соқчилар Антонийни кўтариб чиқиб кетишади.**

### 13-САҲНА

Ўша жой. Шоҳлар хилхонаси.  
Тепадан Клеопатра, Хармиана ва Ирада кириб  
келадилар.

### Клеопатра

Хармиана! Менинг куним битиб, шу ерда  
Насиба ҳам тугар дейман.

### Хармиана

Ўзингни бос, қўй.

### Клеопатра

Йўқ, йўқ, буни истамайман. Не бўлса бўлсин,  
Барчасига тайёрдирман, гирифтор ўзим.

Тасаллини сира-сира тиламас кўнглим.  
Кулфатим-ку оғир, гам ҳам шунга яраша,  
Тасаллига бўй бермайди.

Пастдан Диомед киради.

Гапир! Ўлдими?

### Диомед

Жони ҳали ҳалқумида, ўлим шарпаси  
Кўлкасини солмоқдадир устига. Ана  
Келишмоқда олиб уни бунда аскарлар.

Пастда Антонийни кўтариб киришаётган аскарлар кўрилади.

### Клеопатра

О, қуёшим! Тилка-пора ер-осмоним ҳам!  
Зулмат энди қопламишdir бутун жаҳонни.  
О, Антоний! О, Антоний, Антоний!.. Севгим!  
Бу ён келинг! Хармиана, қарашсангиз-чи,  
Ҳой Ирада, қаердасан, жадал элtingлар,  
Олиб чиқинг тепага тез.

### Антоний

Тилсиз сукунат!  
Антонийни Цезарь эмас ииқди Антоний,  
Зўр ғалаба қозонди у ўзин устидан.

### Клеопатра

Антонийни енгар эди Антоний ўзи.  
Шундоқ эди, шунақа, ҳа... Қуриди шўрим!

**А н т о н и й**

Маликам... О... Менга ҳозир маҳталдир ўлим.  
 Гарчи ақиқ лабларингдан ўпиб минг бора,  
 Роҳату завқ қилганимга қарамай сўнг бор  
 Үпмоқ учун турибман-ку умримни чўзиб.

**К л е о п а т р а**

Ўзр, пастга тушолмайман, кечир, севгилим,  
 Иложим йўқ, истамайман тушмоқни қўлга.  
 Турса ҳамки Цезарга ёр бўлиб зафарлар,  
 Клеопатра бўлолмайди базмига безак.  
 Тураг экан қайрилмасдан ханжарнинг дами  
 Ҳамда зумда ўлдирувчи илоннинг заҳри,  
 Ҳеч нимадан тап тортмайман, чўчимайман ҳам.  
 Мўмин-қобил Октавия хўмрайиб боқиб,  
 Нафрат билан ғазаб-заҳрин роса сочса ҳам...  
 Қани, қани, бунда келгин, жоним Антоний!  
 — Ҳой, қизлар, ҳой биродарим, даст кўтариングлар,  
 Олиб чиқинг!

**А н т о н и й**

Тезроқ бўлинг. Жоним чиқадир.

**К л е о п а т р а**

Қўлларимда кўтарган ҳам вақтларим бўлган,—  
 Билмас эдик илгари биз бундай эрмакни,  
 Қанчалар зил-замбилидирсан, менинг севгилим!  
 Қудратинг ҳам вазиларга айланган дейман,  
 Нақ Юнона бўлганимда, сени албатта  
 Кўтарарди Меркурий ҳам осмон-фалакка.

Юпитер ҳам ёнгинангда бўларди бирга.  
 Шундай, шундай. Кўп бўлмағур хаёллар эса  
 Тентакларга муносибдир, хосдир ҳар маҳал.  
 — Қани, қани, бу тарафга элтинглар тезда.

Антонийни юқорига олиб чиқишиади.

Ўлимингни топишинг ҳақ ҳаёт бор жойда,  
 Бўса билан сенга, жоним, жон қилай ато.  
 Қани энди бўлолсайди қудрат лабларда,  
 Ўлим деган нарсани ҳеч қўймасдим сира.

### Ҳ а м м а л а р и

О, мусибат!

### А н т о н и й

Ўлмоқдаман... Ўламан...  
 Бирор қултум шароб бергин. Айтмоқчиман гап...

### К л е о п а т р а

Иўқ, йўқ, навбат келган менга. Айтаман ўзим,  
 Минг-минг лаънат бизни ҳазон қилган Тақдирга.  
 Чил-чил бўлсин, мажақлансин чархи кажрафтор.

### А н т о н и й

Шошма, жоним... Сен Цезардан илтимос этгил,  
 Тинч қўйишин ҳаётингу номус-орнингни.

### К л е о п а т р а

Икковини кўрмоқ мушкул эрур бир ерда.

## Антоний

Қулоқ солгии, сен дилдорим. Сира ишонма  
Цезарь деган зотга яқин бирор кимсага.  
Фақатгина Прокулей...

## Клеопатра

Цезарчиларга

Ишонмайман сира. Фақат суянарман мен  
Шиддатимга, ўз кучимга, шу қўлларимиз.

## Антоний

Тўкаверма кўз ёшиигни битса ҳам куним.  
Бахтли кунлар хотираси берсин тасалли,  
Якка ўзим ер юзининг ҳукмдорлари  
Орасида улуғвори бўлганим эсла.  
Шармандали ажал мени ютганича йўқ,  
Бошдан олмам дубулғамни мен қўрқиб-нетиб,  
Жангда голиб ғанимимга тиз ҳам чўқмадим.  
Ҳалол жангда жонни фидо этган римликдай  
Ўлимга ҳам юзим тутдим ҳалол ва мағрур...  
Жоним энди узилмоқда... Кетар мадорим,,,

## Клеопатра

Наҳот мени ташлаб кетсанг, эркаклар нори?  
Не қилайн бу оламда сенсиз тентираб?  
Менга энди оғил билан тенгдир бу дунё,  
Тоқатим йўқ унга сира.

Антоний жон беради.

Қизлар, қаранглар!

Вафот этди бу оламнинг буюк султони:  
— О, севгилим! — Сўлди зафар гулин япроги!  
Одамзод ҳам бамисоли эси кирмаган  
Ҳеч нимани билмайдиган ўсмир сингари,  
Қаҳрамонлик деган нарса кўрмайсиз энди,  
Энди тунда ёғдусини сочгувчи ой ҳам  
Ҳеч нарсани кўрмас ерда.

Хармиана

Бекачим менинг!

Үндай деманг!

Ирада

Улгандай у.

Хармиана

Маликам менинг!

Ирада

Малика!

Хармиана

Оҳ, маликам! Оҳ, бекачим менинг!

Ирада

Мисрликлар паноҳию улкан бекаси,  
Хукмдори!

Хармиана

Жим!.. Ирада, жим бўлинглар, жим!

## Клеопатра

Малика деб атаманглар, аёлман ҳалос,  
 Бамисоли бир молбоқар сезаман ўзим,  
 Қани энди худоларнинг башарасига  
 Тожу тахтим улоқтириб берсам бақириб:  
 Дил гавҳарим ўмардинглар, юлиб олдинглар,  
 Гавҳар ила ўзим ҳам нақ маъбуда эдим.  
 Кулфат эпди гажимоқда қутурган итдай,  
 Қолмай мадор, бу танимда битди тоқатим.  
 Шум ўлимнинг масканига шундай, берухсат  
 Кирмоқликнинг наҳот энди бўлса гуноҳи?  
 — Нима бўлди, сизларга ҳой, жоним қизларим?  
 Қўлга олинг ўзингизни! Хармиана, ҳой!  
 О, жонимдан азизларим! Оlam зимистон,  
 Гўё қуёш тамом ботиб кетган ҳечликка.  
 — Кўрсатинглар довюраклик, қани, аскарлар,  
 Сардоримиз кўмайлик зўр ҳурматлар билан.  
 Ундан кейин мард баҳодир римликлар мисол  
 Ажални ҳам ўйнатамиз, очдириб қучоқ.  
 Қудратли руҳ парвоз қилган, жавлонлар урган,  
 Бадан деган бу буюм ҳам унсиз ва совуқ!  
 Дўстдан ортиқ бўлган инсон етди манзилга,  
 Энди эса боражакмиз унинг изидан.

Антонийкинг жасадини кўтариб чиқиб кетишади.

## БЕШИНЧИ ПАРДА

### I-САҲНА

Цезарининг Искандария яқинидаги саройи.  
 Цезарь, Агриппа, Долабелла, Меценат, Галл,  
 Прокулей ва бошқалар кириб келадилар.

**Цезарь**

Долабелла, айтгин унга, бўлсин тез таслим,  
 Енгилгани аниқ-равшан, қаршиликтан ҳеч  
 Чиқмагай наф.

**Долабелла**

Буни адо этаман, Цезарь.

*(Кетади.)*

Деркет қўлида Антонийнинг қиличини кўтариб киради.

**Цезарь**

Кимсан ўзинг? Қўлда қонли қилич кўтариб,  
 Қандай журъат этдинг бунда кириб келмоққа?

**Деркет**

Исмим Деркет. Умрим бўйи ҳалоллик билан  
 Антонийга хизматимни қилдим аямай,

Бу борада бошқаларни қолдирдим ортда.  
 Оёғида юриб, тили сўзлаб тургунча  
 Хўжам дедим, айтганларин айладим бажо,  
 Душман билан олишганда аямадим жон,  
 Мени олсанг хизматингга садоқат билан  
 Бор кучимни аямасдан сарфлагум бешак.  
 Йўқ десанг гар жоним туар ҳозир қўлингда.

### Ц е з а р ь

Бу гапларда не маъно бор?

### Д е р к е т

Антоний ўлди.

### Ц е з а р ь

Ишонмайман. У қуласа борми, ваҳмаси  
 Бу оламни кўтарарди мутлоқ бошига.  
 Замин бунда таг-тагидан келиб ларзага,  
 Иргитарди саҳроларнинг шерларин бир-бир,  
 Шаҳарларнинг тахтиравон кўчаларига,  
 Бориб тушган бўлардилар шерлар инига.  
 Оддий инсон ажалимас унинг ажали.  
 Сабаби бор. Очиқ айтсам, «Антоний» исми  
 Бу дунёнинг ярми деган маънони берар.

### Д е р к е т

Шундай, Бироқ унинг энди ўлгани тўғри,  
 Жонин олган ҳаққоният найзаси эмас,  
 Ё бирорта йўлтўсарнинг ҳаром ханжари.  
 Тарихга зўр ишларини қайд этган қўли

Мард юракнинг амри билан иш тутган ҳолда  
Пора қилди шу юракни. Мана, кўринглар,  
Жароҳатдан тортиб олдим ушбу қилични,  
Қотиб қолган унда ҳозир табаррук қони.

### Цезарь

Бу хабардан маъюс тортиб қолдинглар, дўстлар!  
Қасам ичib айтаманки, худолар ҳаққи,  
Бунга йиғлар подшолар ҳам.

### Агринна

Буни қарангки,  
Юксак мақсад чиққанида рўёбга энди,  
Кўз ёш тўкмоқ лозимлигин айтмиш табиат.

### Меценат

Антонийнинг фазилату бор қусурлари  
Бир-бири-ла олишарди тинмай, дамо-дам.

### Агринна

Жам бўлишди унда, рости, зўр фазилатлар;  
Иллатларни эса бизга бермиш худолар,  
Худо эмас, инсон қилиб яратмоқ учун.  
Цезарь жуда изтиробда!

### Меценат

Рўбарўсида  
Пайдо бўлган жуда улкан кўзгуда, ҳозир  
Ўзин қандай одамлигин кўрмоқда.

## Цезарь

Эвоҳ,

Шундай куйга солдимми, а, Антоний, сени!  
На чораки, танимизни ўзимиз тилиб  
Жароҳатлар очмоқликка бўлсак ҳам мажбур?  
Икковимиз бу оламга қолдик сифишмай,  
Биримизнинг ўлишимиз турган гап эди.  
Таъзиянгни кўз ёш тўкиб ўтказгум ўзим,  
Ҳар томчи ёш юрагимнинг қони мисоли.  
Ижозат бер, ҳамкориму ҳамбиродарим,  
Ҳукмронлик ишларида раҳнамо эдинг.  
Сафдош эдинг менга доим майдони ҳарбда,  
Вужудимнинг ярми эдинг, жоним бўлаги.  
Тўғри келмай айрдилар ўшал юлдузлар,  
Қабул айла қайғумни сен, мусибат чексиз.  
— Ҳозир эмас, бошқа фурсат айтиб берурман  
Барчасини битта қўймай сизга дўстларим.

Чопар киради.

Айтмаса ҳам бир сўз, билгум унинг юзидан  
Келтирганин қандай хабар.— Сен ким бўласан?

## Чопар

Мисрликман. Қлеопатра, менинг маликам,  
Хилхонадир ҳозир унинг ёлғиз паноҳи.  
Ўша жойда қимир этмай кутар буйруғинг,  
Тақдирининг не бўлишин билмоқ истайди.

## Цезарь

Бориб айтгин, қўрқувларни тарк этсин мутлоқ,  
Кўп ўтмайин бориб бирор яқин одамим,

Айтар унга: «Қўражаксан хуш муомала,  
Қўяжакмиз ҳурматингни жойига албат».  
Бераҳмлик ярашмайди Цезарь шаънига.

### Ч о п а р

Худолар ҳам ёрлақагай сени агадий.

(*Кетади.*)

### Ц е з а рь

Бориб айтгин, Прокулей, маликага тез,  
Таҳқирламоқ ниятим йўқ сира кўнгилда.  
Тилга нима келса қайтмай қиласавер ваъда,  
Мағрурликни қўлдан берма, тағин малика  
Қасд қилмасин, эҳтиёт бўл, ўзин жонига,  
Мўлжалдаги ишларимиз бузиб қўймасин.  
Тирик ҳолда элтсак борми биз уни Римга,  
Зафаримиз агадиян бўлмайди унут.  
Сен буларни маликага айтгину тезда  
Олиб келгин жавобини.

### Прокулей

Бошим устига.

(*Кетади.*)

### Ц е з а рь

Ўша ёққа сен ҳам жўна, Галл.

Г а л л қетади,

Долабелла!  
У ҳам бирга бора қолсин.

А гриппа билан Меценат

(бараварига)

Ҳой, Долабелла!

Цезарь

Ҳожати йўқ, эсга тушди топшириқ билан  
Юборганим, келиб қолар зум ўтмай бунда.  
Энди эса ҷодиримга қараб юринглар,  
Кўрсатаман қўлимдаги бор мактубларни.  
Ўшандা сиз ишонасиз босиқлигимга,  
Жанг истамай тинчлик кўзлаб юрганларимни.  
Хоҳишм-ла, мен қилмадим жангни ихтиёр,  
Қани энди, кетдик дўстлар, қолманлар ортда.

Кетадилар.

## 2-САҲНА

Искандария. Шоҳлар ҳилхонаси.  
Тепадән Клеопатра, Хармиана ва Ирада чиқиб  
келишади.

Клеопатра

Бахтсизликлар бермоқдадир ҳаёт сабогин,  
Аянчлидир менга ҳозир ҳукмдор Цезарь:  
У тақдирдан зўр келолмас, қулдир қисматга,  
Бажаради тақдир азал буйруқларини.

Иродасин фармони-ла баридан кечган,  
 Тасодифни жиловлаган инсон улуғвор,  
 Гадо билан подшоҳларни бирдай боққувчи  
 Гўнг ҳидидан кўзин юмиб йўқликка кетган  
 Одамзоддан зўр, улуғи топилмас сира.

Пастдан Прокулей, Галл ва аскарлар киришади.

### Прокулей

Салом йўллар Цезарь Миср маликасига,  
 Утинади билмоқ бўлиб истакларини,  
 Хурсанд бўлар, малика ҳам айтса bemalol.

### Клеопатра

Исминг недир?

### Прокулей

Прокулей, дейдилар менин

### Клеопатра

Тилга олиб сенинг поминг Антоний менга,  
 Шу одамга ишонавер, деганди бир кун.  
 Ёлгон энди даҳшатини менга сололмас,  
 Путур кетган ҳалолликдан. На чора энди,  
 Ҳукмдоринг истаса гар, сўрашим садқа,  
 Бориб айтгин, ярашмайди ҳукмдорларга  
 Подшоҳликдан бери бўлмиш садқа сўрамоқ.  
 Шу боисдан ҳадя қилса менинг ўғлимга  
 Забт этилган Миср мулкин бутунлай, буткул,  
 Ўз мулкимни ўзгинамга қайтаргани-чун  
 Қиласар эдим мен тиз чўкиб, ҳаққига дую.

### Прокулей

Қўрқма асло, ихтиёриңг ҳукмдордадир,  
Ишонавер Цезарга сен астойдил, дилдан.  
Раҳм-шафқат жой олгандир кўнглини тўридан,  
Хуш кўради хоккорларга қилмоқ мурувват.  
Рухсатинг-ла бориб айтай унга бугуноқ  
Ишонишинг ҳукмдорнинг ҳимматларига.  
Фолибкоринг ўнглаб қўйиб букик қаддингни,  
Ўтинади, қайтармагин қўлини сира.

### Клеопатра

Бош эгаман ҳукмдорнинг баҳт-иқболига,  
Тан оламан қудратини, албат бориб айт,  
Измидадир бугун мана, буюк салтанат,  
Тобе этмоқ санъатига қойил ҳам бўлдим,  
Ўзин кўрмоқ истаги ҳам бордир қалбимда.

### Прокулей

Ҳаммасини етказаман, тўқ қил кўнглингни,  
Гар бўлса ҳам у сабабкор кулфатларингга,  
Ҳамдард эрур шу фурсатда билгил, малика.

Прокулей билан иккита аскар хилхонанинг тепасига нарвон  
қўйиб чиқиб, Клеопатрани ўрашади. Бошиқ аскарлар эшик  
тамбаларини олиб, очишади.

### Галл

Кўп қийналмай маликани туширдик қўлга,  
Энди Цезарь келгунича қўриқласак бас.

(Кетади.)

## Ирада

Буюк малика! Ҳой!

## Хармиана

Ҳой, Клеопатра!  
Атрофингни ўраб олди душманлар, ана!

## Клеопатра

(ханжарни олади)

Тез бўл, қўлим!

## Прокулей

(уни қуролсизлантиради)

Шошилмагин, малика, тинчлан!  
Сабр қилгин, етқазмагин заар ўзингга.  
Сени сотмай қутқарганиман.

## Клеопатра

Нақ ўлимдан-а?  
Мени ҳозир маҳрум қилдинг ҳатто ярадор  
Итга насиб бўладиган мурувватдан ҳам.

## Прокулей

Қасд қилгудай бўлсанг борми ўз жонингга сен,  
Урар эдинг ерга Цезарь сахийлигини.  
Цезарь, қандай юмшоқлигин қўйсинлар билиб,

Үлиб кетсанг, жумла-жаҳон қоларди билмай,  
Цезарь қандай одамлигин.

### Клеопатра

Қайдасан, ўлим?  
Тезроққина жонимни ол! Зерикмадингми,  
Чангаль солиб гадой билан гўдакларга сен?  
Мана энди, олавергин малика жонин!

### Прокулей

Сабр билан бардошга зўр бергин, маликам.

### Клеопатра

Энди менга бегонадир хобу ноз-неъмат,  
Шу тариқа жонимни ҳам қиласман нисор.  
Цезарь энди тортса ҳамки қанча ташвишлар,  
Мен занжирбанд ҳолда бўлмам унга кўндаланг.  
Октаия энди менга уюб қовоғин,  
Махрум бўлар қилмоқликдан тўйиб томоша.  
Бўёлолмайман жавлон урган римликлар аро  
Ҳам масхара, ҳам кулги-ю, ҳамда сазойи.  
Жасадимни тезда элтиб кўмсинлар майли,  
Шаҳри Римда машҳур бўлган расво ариққа!  
Ташласинлар майли мени Нил лойқасига,  
Устимдаги либосларим қилсинлар пора!  
Мени талаб пашшалару сўналар бари,  
Титигимни чиқарсинлар, она юртимнинг  
Бир эҳроми дорим бўлсин, минг-минг розиман  
Қўл-оёқда қищаң билан оссинлар унга!

## Прокулей

Қандай ҳадик сени қийнар, билолмам сира,  
Ахир Цезарь қўрқитган йўқ сени.

Долабелла киради.

## Долабелла

Прокулей,  
Хабари бор ҳукмдорининг бўлган ишлардан.  
Чорламоқда ҳузурига сени, боргин тез,  
Маликани қолдирасан менинг қўлимда.

## Прокулей

Гапинг маъқул, Долабелла. Бўлма сира қўрс.

(Клеопатрага.)

Нима деяй Цезарга мен? Етказгум унга.  
Айтавергин тортинаасдан.

## Клеопатра

Истагим — ўлмоқ.

Прокулей билан аскарлар кетишади.

## Долабелла

Мен ҳақимда гап кетганда шу чоққача ҳеч  
Бирор марта эшиганинг борми?

Клеопатра

Билмадим.

Долабелла

Билмоғинг шарт эди мени.

Клеопатра

Наҳотки, ҳозир

Бўлса бирор зарурати билганиларимнинг?

Сизларга-ку тушда кўрган нарсаларини

Айтишганда ёш болалар ёки аёллар

Кўп масхара қиласиз-да, боплаб куласиз.

Долабелла

Нима ҳақда сўйляяпсан маликам ўзи?

Клеопатра

Тушимга ҳам кирганин кўр... Бир замонлари

Бўлган экан мўътабар зот — исми Антоний...

Қани энди ҳозир яна кўрсам тушимда,

Ушандайин бир одамни!..

Долабелла

Шошма, малика!..

Клеопатра

Биз яшаган шу заминнинг аянч парчасин

Ёритувчи қуёш билан моҳтоб сингари,

Антонийнинг хўп файзиёб юзидан доим  
Нур ёғилиб турар эди.

Д о л а б е л л а

Менинг маликам!..

К л е о п а т р а

Иўлда уммон учраса гар ўтарди ҳатлаб.  
Фурсат етиб қўлин ишга солганда борми,  
Кўрк билан файз бахши этарди кекса заминга.  
Гурунглашса овози ҳам бўлиб омухта,  
Ярашарди бу оламнинг садоларига.  
Бу дунёни қутқармоқчи бўлса мабодо,  
Наърасидан гулдурак ҳам эди шарманда.  
Сахийликка келганда-чи, зиқна қаҳратон —  
Эмас, балки сахий куздай очиқ қўл эди.  
Сира тубан кетмасди у эрмак бобида,  
Дельфин каби тўлқинларга урар эди тўш.  
Отбоқардай хизматида турарди шоҳлар,  
Антоний ҳам сочар эди майдада тангадай  
Оролларни, шоҳликларни...

Д о л а б е л л а

О, Қлеопатра!..

К л е о п а т р а

Нима дейсан, кўрарманми иложин топиб  
Тушимдаги ул инсонни ўнгимда, а?

Д о л а б е л л а

Иўқ.

**Клеопатра**

Гапинг ёлғон, худолардир нақ бунга шохид!  
 Ўнгим жуда келган эди тушимдан зўрроқ.  
 Тасаввурнинг ўйинлари шу қадар нозик,  
 Бунда доим доғда қолар она табиат.  
 Табиат ҳам уни жуда арзанда қилиб,  
 Бор меҳрини бағишилаган эди аямай.

**Долабелла**

Қулоқ бергин сўзларимга энди, малика!  
 Бошга тушган бу жудолик ўзингдай буюк.  
 Мусибатинг teng келгулик жудолигингга.  
 Бунинг учун айрилсам ҳам ҳатто ўзимнинг  
 Манфаатим кўзлаб қилган ниятларимдан,  
 Тек туролмай жавоб бергум жароҳатланган —  
 Юрагингнинг ҳар садоси, ҳар инграшига.

**Клеопатра**

Муруватинг, яхшилигинг учун кўп раҳмат.  
 Цезарь мени не қилмоқчи, айтольмайсанми?

**Долабелла**

Айтмоқлигим жоиз эрур, гарчи аламли...

**Клеопатра**

Хўш, хўш?..

**Долабелла**

Бағри кенг одаму бироқ негадир...

Клеопатра

Ўзи миниб голибкорлар аравасига,  
Мени судраб бормоқчими?

Долабелла

Шундай, маликам.

Саҳна ортидан: «Ҳукмдорга йўл бўшатинглар! Йўл беринглар!» деган овозлар эшигилади. Цезарь, Галл, Прокулей, Меценат, Селевк ва бошқалар кириб келадилар.

Цезарь

Клеопатра деган малак борми шу ерда?

Долабелла

(Клеопатрани кўрсатиб)  
Мана Цезарь!

Клеопатра тиз чўкади.

Цезарь

Тур ўрнингдан. Тиз чўкмоқ нечук?  
Ўтинаман, тургин тезроқ, Миср малаги.

Клеопатра

Худоларнинг иродаси. Эгаман бошим,  
Ҷендайни зўр ва музaffer ҳукмдоримга.

### Цезарь

Бундай оғигр хаёлларнинг борми даркори?  
 Сенга етган озорларнинг барин биламиз,  
 Эсимиздан чиқмагай ҳеч, аммо тайёрмиз  
 Тасодифлар қаторига йўймоққа барин.

### Клеопатра

Эй, оламнинг ҳукмдори, энг сахий сардор!  
 Неки қилган бўлсамки, мен то шул вақтгача,  
 Демагайман, ҳаммаси ҳам гинадан йироқ.  
 Аёл зотин оламда бор инжиқликлари  
 Ўзимда ҳам борлигини қилгум эътироф.

### Цезарь

Бизлар сенинг айбларингни Клеопатра, бил,  
 Камайтириш томонига эрурмиз мойил.  
 Сен мабодо ўзимдаги бор ниятларга  
 (Улар эса ўзингга ҳам келгусидир хуш)  
 Қилмай сира монеликлар, йўл берсанг агар,  
 Бўлур сенга зиёд фойда. Мабодо тағин  
 Антонийнинг тақдирини кўриб хўп маъқул,  
 Золимларга тиркаб бизни айласанг абгор,  
 Фазабимиз ортгусидир сира билмай чек,  
 Фарзандларинг доғида ҳам куйишинг аниқ.  
 Акс ҳолда-чи, қўлимиздан келар яхшилик,  
 Хуш қол энди, гўзал малак, бормасам бўлмас.

### Клеопатра

Қаён борма, қайда кезма, ҳукмдор, албат  
 Ўз замининг тупрогида юрасан фақат.

Бизлар эса жангда олган ўлжанг қатори...  
Билганингни қиласвергин, сенда ихтиёр.

### Ц е з а ръ

Неки ишлар бўлса дахли ўзингга ҳозир,  
Маслаҳатинг аямасдан турғил ёнимда.

### К леопатра

Борки пулим, хазинам ва қақир-қуқури  
Хўп батафсил кўрсатилган, қолмаган сира  
Қўлингдаги бу рўйхатда.— Қайдасан, Селевк?

### С е л е в к

Шу ердаман, маликам!

### К леопатра

Ҳа, хазиначим шу.  
Үлдиргум деб даҳшат солиб ичиргил қасам,  
Айтиб берар ҳеч нимани яширганим,  
Қани энди, онт ич, Селевк.

### С е л е в к

Ичмайман, бекам .  
Ёлғон-яшиқ гаплар айтиб, айрилмай бошдан,  
Ундан кўра танглайимга ёпишсин тилим.

### К леопатра

Нималарни яширибман?

**С е л е в к**

Етар қолгани  
Рўйхатдаги нарсаларни сотиб олмоққа.

**Ц е з а р ь**

Бўлди энди, Клеопатра, қизараверма,  
Ҳушёргинг арзир ўзи кўп мақтовларга.

**К л е о п а т р а**

Ана, Цезарь кўриб қўйгин, бойлик қанчалар,  
Ўз домига тортишини инсонни буткул.  
Менга содиқ одамлар ҳам содиқдир сенга.  
Жойларимиз тасодифан қолса алмашиб,  
Бори яна бўлаверар албат аксинча...  
Сенинг бундай одамлигинг билмовдим, Селевк,  
Сотқин, хоин, беандиша, қуллигинг билан  
Фоҳишадай алдоқчию бебурдлигингни.  
Тисарилма орқангга ҳеч. На чора, майли,  
Тирноқларим турганида сенинг кўзларинг  
Қанот боғлаб осмон томон учолмас, дейман.  
Кўрмагандим сендайин паст, аглаҳ сотқинни!..

**Ц е з а р ь**

Үтинаман, малика, мен...

**К л е о п а т р а****Уят ва номус!**

Мендай ғариб, бенавога айлаб илтифот,  
Ул буюклик чўққисидан боққан лаҳзангда,

Битта қулим сочиб дилда бор ёвузлигин,  
 Дилемдаги барча ғаму андуҳларимни  
 Ловуллатди камайтирас ӯрнига атай!  
 Ӯзинг ўйлаб кўргин энди, эй олижаноб,  
 Олиб қолган бўлсам ҳамки баъзи нарсалар,  
 Аёлларнинг тақинчоғи, майдадчийдаси,  
 Дўстларимга бераман деб қилгандим инят.  
 Октавия билан Ливия кўнглини овлаб,  
 Хурсанд қиласай, ярасалар зора коримга,—  
 Дея олиб қолган бўлсам баъзи бебаҳо  
 Нарсаларни, йўқдир сира айби, гуноҳи!  
 Мана энди ҳузурингда бу инсофи йўқ  
 Ҳеч уялмай этмоқдадир мени шармисор.  
 О худолар! Кўринарми ҳеч бир охири  
 Мен қулаган жаҳаннамнинг!

(Селевкка.)

Кўзимдан йўқол!

Йўқса ҳозир ўз кўзинг-ла кўргунг муқаррар,  
 Гарчи устин хўрлик кули босган бўлса-да,  
 Бир ланғиллаб ўт олишин шоҳлар ғазабин!  
 Ахта қулнинг иши эмас хотинни аяш!

Цезарь

Жўна, Селевк.

С е л е в к к е т а д и .

Қлеопатра

Ҳукмдорлар масъулдир доим,  
 Не воқеа содир бўлса мамлакатида.

Бизни эса қулатганда, ўзгалар айбин  
Хеч тортниммай тўнкашади бизга, шу боис  
Оғир кўчар қуламоқ ҳам.

### Цезарь

Клеопатра,

Уз қўлинг-ла, бу рўйхатга қўшган-қўшмаган  
Мол-мулкингни тиркамаймиз ўлжаларга ҳеч,  
Билавергин хазинаигни ихтиёргингда.  
Фам-ташвишни ўйламагин. Цезарь йироқдир  
Савдогарлик деган гапдан, сен-ла тортишмас,  
Ўзга қора ўйлардан ҳеч зиндон ясама,  
Не десанг бас, бажарамиз раъйингга қараб,  
Ихтиёргинг ўзингдадир билгил, малика,  
Хоҳлаганинг еб-ичгину ўйнаб-кулавер.  
Сенга ўзим хайриҳоҳман, мисли дўстингдай  
Тақдирингдан бўлиб турай доим хабардор,  
Энди эса, яхши қолгин.

### Клеопатра

Ҳукмдор! Шоҳим!

### Цезарь

Ундай дема, дўстингман мен. Хайр, яхши қол.

Бурғулар чалинади. Цезарь шотирлари билан чиқиб  
кетади.

### Клеопатра

Ўз-ўзимдан қолдирмоқчи бўлиб кўнглимни  
Сўз тўрлари билан мени ташлади чирмаб.

(Хармианага.)

Хўп яхшилаб солгин қулоқ...

(Кулогига нималарни дир пицирлади.)

И р а д а

Бас қил, маликам.  
Зулмат чорлар, битгай бизнинг кунларимиз ҳам.

К л е о п а т р а

Тез боргину изингга қайт. Барин пиштиб  
Қўйғандирман. Сендан лозим фақат шошилмоқ.

Х а р м и а н а

О, маликам, тушунарли!

Д о л а б е л л а киради.

Д о л а б е л л а

Малика қайда?

Х а р м и а н а

Рўбарўнгда тураг мана.

(Кетади)

К л е о п а т р а

Ҳа, Долабелла?

### Д о л а б е л л а

Сенга бўлган меҳрим ундар бирдай кўришга  
Иродангни худоларнинг хоҳиши каби.  
Мен ҳам келдим энди сенга бергани хабар,  
Кетмоқчидир Цезарь шу дам Сурия томон,  
Болаларинг билан сени жўнатар жадал.  
Бундан қандай фойдалансанг ихтиёр сенда.  
Мен ваъдага вафо қилдим.

### К л е о п а т р а

Долабелла, бил,  
Мен олдингда қарздорман.

### Д о л а б е л л а

Хизматкорингмаи,  
Борай энди Цезарь томон, хуш қол, маликам.

### К л е о п а т р а

Яхши боргин, хўп хурсандман.

### Д о л а б е л л а   кетади.

Гап шу, Ирада!  
Римликларнинг кўнглин очиб, хуш-хушлаш учун,  
Бўлиб қопмиз биз Мисринг қўғирчоқлари.  
Болғаларин тарақлатиб исқирт усталар,  
Ажаб эмас, томошага қуришса саҳна.  
Биз ўшанда терга пишган бақалоқларнинг  
Сассифидан бўлажакмиз бир ёқлик албат.

### И р а д а

Йўл қўйишмас худолар, оҳ!

## Клеопатра

Йўқ, Ирада, йўқ,

Ҳаммаси ҳам шундай бўлар, мана кўрасан,  
 Ғар хотиндай қўлимизни қўйишар боғлаб,  
 Ундан кейин вайсақилар оғизга келган —  
 Сўзлар билан айлашади таърифу тавсиф.  
 Ҳар нарсага суяги йўқ масхарабозлар  
 Мисрликлар манишатин қилишар тасвир,  
 Антонийни кўрсатишар майхўр ўрнида,  
 Либосимни кийиб олиб бирорта бачча  
 Хўп чийиллаб, ётиб-туриб, қилиқлар қилиб,  
 Ерга урар маликалик шаънимни буткул.

## Ирада

О, худолар!

## Клеопатра

Бизни кутар шундай кулфатлар.

## Ирада

Қўрмагайман асло бундай даҳшатни сира:  
 Биламанки, тирноқларим кучли кўзимдан.

## Клеопатра

Гапинг тўғри, уларнинг пуч хаёлларини,  
 Ўйлайманки, чиқарамиз бутун чиппакка.

Хармиана киради.

Яхшимисан, Хармиана?— Энди, қизларим,  
 Келтириңглар маликалик лиbosларимни,  
 Яна Қиди дарёсида Антоний сари  
 Ошиққандай ошиқайин, урайин жавлон.  
 Эшитдингми буларни сен, Ирада, ҳозир?  
 Хизматингни, Хармиана, қылғил сүнгги бор,  
 Сүнгра майли, ўйнаб-кулгил дунё тургунча.—  
 Тожим билан келтириңглар бор безакларим.

Ирада кетади. Саҳна ортида шовқин-сурон эшитилади.

Нима шовқин?

Құриқчи аскарлардан бири киради,

### А ск а р

Келибdir бир мискин мевачи,  
 Маликани күрмөкликка сўрар ижозат,  
 Саватида мевалар бор.

### К л е о п а т р а

Майлига, кирсин.

А ск а р кетади.

Гоҳи пайтда хўп улуғвор ишлар ҳам тугал  
 Битгусидир арзимаган бир қурол билан!  
 Озодликни олиб келмиш шу авом менга,  
 Аҳдим шудир: «Қолмагайдир ҳеч аёллигим,  
 Мармар нима бўлса мен ҳам худди ўзиман,  
 Ой ҳам менга бегонадир буткул».

А ск а р сават кўтарган бир мискин киши билан бирга  
 қайтиб киради.

А ск а р

Мана у.

К леопатра

Сен кетавер, Мискин киши қолсин шу ерда.

А ск а р кетади.

Улим ҳадя этадиган, сездиrmай оғриқ,  
Илон билан ҳузуримга келганинг ростми?

М и с к и н киши

Нега олиб келмас эканман — олиб келдим. Қелтир-  
ган нарсам жигига тегсанг ҳам тек тураверадиганлар-  
данмас. Шунақанги чақадики, асти қўяверасан! Тишла-  
шини айтмайсанми! Тиши текканлардан жуда ози омон  
қолган, тил тортмай кетаверишган.

К леопатра

Чаққанидан ҳам ўлганлар борми?

М и с к и н киши

Э, раҳматилар анча-мунча. Эркаклардан ҳам, ҳатто  
аёл жинсидан ҳам топилади. Бир воқеани эшитганим  
бор. Ҳар қандай аёл сингари ростгўйроқ бўлай деган  
мақсадда гапига унча-мунча ёлғон қўшиб турадиган  
ҳалол бир кампир бор. Ана ўша менга илон чаққан  
одам ўлишини гапириб берувди. Шунақанги тасвир  
қилгандики! Бироқ ҳар қанақа афсонага учган одамни

аҳмоқ, дейдилар. Бироқ бир нарсани айтмасам бўлмайди — келтирганим илонларнинг сараси.

### Клеопатра

Кетаверсанг бўлади.

### Мискин киши

Бу илондан кўнглинг тўлсин, дилинг хуш бўлсин.

### Клеопатра

Хайр.

### Мискин киши

*(саватни ерга қўйиб)*

Илон бўлгандан кейин илонлик қилишини ёдингдан чиқарма.

### Клеопатра

Хўп, хўп, хайр.

### Мискин киши

Илон баҳаъни одам қўлида бўлса ҳам унга ишониш мушкул. Ундан нимаям яхшилик чиқарди, дейсан.

### Клеопатра

Хавотир олма. Эҳтиёт бўламан.

## Мискин киши

Бўпти. Овқат бера кўрма. Бунга у арзимайди.

## Клеопатра

Мени еб қўймайдими ишқилиб?

## Мискин киши

Мен унақа соддалардан эмасман, биродар. Асл турганда илон тугул шайтоннинг ўзи ҳам тил тортмай ўлади. Иблис панд бермаса борми, аёл ҳудоларга ем бўларди. Лаънати иблислар доим ҳудоларни додга қолдинириб юришади. Ҳудолар ўнтача аёлни яратгунча бўлмай иблислар бештасини йўлдан уриб улгуришади.

## Клеопатра

Яхши. Энди бор. Хайр.

## Мискин киши

Мен бор гапни айтапман-да. Хўп, илондан ҳожатроҳат кўр, ишқилиб.

(Кетади.)

Ирада маликанинг мантияси, тожи ва бошқа нарсаларини кўтариб киради.

## Клеопатра

Порфирани узат тезроқ. Қийгиз тожимни,  
Мангуллик ҳам тарафига турибди чорлаб.

Бундан кейин сезмам узум шарбатин таъмин,  
 Бўлғусидир гирт бегона шу лабларимга.  
 Бўлгин тезроқ! Чорлаяпти Антоний қўймай,  
 Бу мардона ишларимни маъқул кўриб у  
 Келмоқдадир хўп ошиқиб истиқболимга.  
 Ичак узиб кулади у Цезарь бахтидан;  
 Худолар ҳам бахтни олдин этишиб ато.  
 Сўнг кибрини пайқаб роса қувиб солишар.  
 Бормоқдаман ҳузурингга, азиз рафиқам,  
 Мардлик билан бу ишимга олганман ҳуқуқ.  
 Ҳозир мени кўрсанг борми — ўту ҳавоман,  
 Бошқа ёмон офатлардан қутулганим рост.  
 Ҳамма нарса тап-тайёрми? Унда илтимос,  
 Лабда қолган жиндай тафтим айланглар қабул.  
 Хўш, алвидо.— Яхши қолгин, ҳой, Хармиана,  
 Яхши қолгин, Ирада!

*(Икковини ўпади.)*

Ирада йиқилиб жон беради.

О, ўлиб қолдими?

Лабларимда қолганмикин заҳри илоннинг?  
 Сен ҳаётдан кўз очгунча бўлдинг-кў жудо,  
 Үлим деган бамисоли севгили ёрнинг  
 Жон оғритиб ўнишидай деганлари ҳақ.  
 Ун чиқармай тарқ этганда ушбу дунёни,  
 Арзимайди, дегандилар, видолашувга.

### Х а р м и а н а

Еғдир энди жолаларинг, эй қора булут,  
 Йиглашини кўрай токи худоларнинг мен!

### Клеопатра

Қандай уят! Антонийга кўринса мейдан  
 Олдин бориб бу Ирада! Шунда Антоний  
 Бўса ҳадя этиб қўйса! Бу бўсани мен  
 Ортиқ кўргум ахир осмон-фалаклардан ҳам!

(Илонни кўкрагига солади.)

На чора бор, қани узгин, кичкина қотил,  
 Үткир тишинг ишга солиб, тақдирни азал  
 Ҳукми билан ҳосил бўлган қаттиқ чигални.  
 Жаҳлинг чиқиб, ғазаб сочиб тишлагил, тентак,  
 Қани энди сенда ҳозир бўлганида тил,  
 Эшак деган ном берардинг Цезарга албат:  
 Иккимиз ҳам қолдирдик уни хўп доғда.

### Хармиана

Шарқ Юлдузи!

### Клеопатра

Жим, жим! Аста! Солмагин шовқин,  
 Кўрмайсанми, кўкрагимни эммоқда гўдак,  
 Онаси ҳам кўзи кетиб қолгуси мутлоқ.

### Хармиана

Пора-пора бўлгин, юрак!

### Клеопатра

Заҳар мисли бол.

Гўёки бир оромижон, малҳамга ўхшар.  
 Гўё майин бир шаббода!— О, Антоний! О!  
 Кел, эй сен ҳам қўлимга чиқ, қўлимни яла.

(Иккинчи илонни қўлига қўяди.)

Яшаб нима қилай энди...

(Иккисиб жон беради.)

### Х а р м и а на

...Расво дунёда?  
 Хайр энди, эй маликам.— Фурурлан, ўлим,  
 Чангалингга тушди ҳозир бебаҳо аёл.  
 Ундайлари учрамайди дунёда сира,  
 Юмилгандир агадиян туйғун кўзлари.  
 Олтин қўёш сари энди талпинмас э, воҳ,  
 Маликанинг нурдай ёниқ нигоҳи буткул.  
 Тожи бир оз қийшайибди, қўяй тўғрилаб.  
 Юмушлар ҳам битди ҳисоб.

Қўриқчилар югуриб киришади.

### Б и р и н ч и а ск а р

Малика қайдা?

### Х а р м и а на

Жим бўлинглар. Уйғотмангиз уни.

### Б и р и н ч и а ск а р

Ҳукмдор

Юборувди бизни унга.

Х а р м и а на

Кечиккан чопар...

(*Кўкрагига илон солади.*)

Қани, тезроқ бўлгин энди. Тишлашинг заиф.

Б и р и н ч и а ск а р

Бу ёққа, ҳой! Зўр фалокат! Цезарь алданган.

И к к и н ч и а ск а р

Долабелла шу ердадир, Цезарь элчиси,  
Чақирайми?

Б и р и н ч и а ск а р

(*Хармианага*)

Нима бўлди бу ерда ўзи?  
Наҳот сизга бу қилиқлар ярашса?

Х а р м и а на

Зеро

Меросхўри эди шонли ҳукмдорларнинг,  
Тўғри қилди малика ҳам шундай йўл тутиб.  
Эҳ, аскар-ей...

(*Ўлади.*)

Д о л а б е л л а киради.

Д о л а б е л л а

Нима бўлди?

### Иккинчи аскар

Ҳаммаси ўлди.

### Долабелла

Хавотириинг тўғри эди сенинг, Цезарь, ҳа,  
Етиб келиб тез орада суққанингда бош,  
Кўражаксан ўзинг олдин ололмай қолган  
Энг даҳшатли воқеанинг содир бўлганин.

Саҳна ортидан: «Цезарга йўл беринглар! Йўл беринглар!» деган овозлар эшитилади.

Цезарь шотирлари билан кириб келади.

### Долабелла

Башоратда тенгинг йўқдир, Цезарь, рост айтсам,  
Содир бўлди ўзинг қўрқкан ишларнинг бари.

### Цезарь

Мана буни атагайлар мардона иш деб.  
Ниятимнинг қандайлигин билгандан кейин,  
Энг муносиб чорасини олибди топиб.  
Улимига сабаб нима? Кўринмас-ку қон?

### Долабела

Ким кирганди бу ерга, а? Кўрганлар борми?

### Биринчи аскар

Келтирганди битта мискин мева-чевалар,  
Мана шунда савати ҳам.

## Цезарь

Заҳарланишган!

## Биринчи аскар

Биз кирганда жони ҳали чиқмаган эди,  
 Маликанинг ёш канизи — Хармиананинг.  
 Бекасининг тожини у қўйди тўғрилаб,  
 Сўнгра бирдан совқотгандай дир-дир қалтираб,  
 Юмалади-қолди ерда.

## Цезарь

Шонли заифлик!

Гар ичишган бўлишсайди заҳарни улар,  
 Баданлари шишиб кетар, кўпчирди буткул.  
 Клеопатра бамисоли ширин уйқуда,  
 Бундан сархуш бўлур эди бошқа Антоний.

## Долабелла

Қаранг, ана кўкрагида бордир жароҳат,  
 Сал шишганроқ. Қўлида ҳам кўринар бири.

## Биринчи аскар

Илон чаққан,

(Саватга қараайди.)

Япроқларда қолган сўлаги.  
 Нил горларин макон этган ўткир илонлар  
 Сўлакларин қолдиришар тупроқда.

## Цезарь

Демак,

Улимига шу сабабчи бўлгани аниқ.  
 Шифокор ҳам маликанинг беоғриқ, бедард  
 Улим сари элтадиган дору илтимос  
 Қилганига бўлиб иқрор, олди бўйнига.  
 — Қани энди келтиринглар тўшакни бунда.  
 Канизларни маликадан кейин ётқизинг,  
 Антонийни малика-ла қўйинг ёнма-ён,  
 Дафи этайлик. Маросимнинг бундайини ҳеч  
 Заминимиз шу чоққача кўрмаган сира.  
 Аламангиз бу фожиа оғир мусибат.  
 Изтиробга солмай қўймас айборни ҳам,  
 Авладларнинг хотиридан узоқ асрлар  
 Мағлубларга ачинишу ҳамдардлик буткул  
 Голибларнинг шавкатидек ўчмайди мудом.—  
 Кўшиниларга буюрамиз, бу майитларни  
 Шараф билан элтишларин қабристон томон.

(Долабеллага.)

Булар барин топширамиз сенинг ўзингга.—  
 Дафидан сўнг йўл олурмиз гўзал Рим сари.

Кетадилар.